

## San Juan

*Cristo, chë Bëngbe Bëtsabe Uámana Oyebuambnayana ca Uabainá*

<sup>1</sup> Quem luare ndobojátsa ora, Cristo, chë Bëngbe Bëtsabe Uámana Oyebuambnayana ya yojtsemna; chora cha, chë chca uabainá, Bëngbe Bëtsáftaca yojtsanmëna, y cachá Bëngbe Bëtsá inamna.

<sup>2</sup> Ndegombre cha, chë tempscana Bëngbe Bëtsáftaca yojtsanmëna.

<sup>3</sup> Cháftaca, Bëngbe Bëtsá lempe tojanma; cháftaca ndóñesna, lempe ntšamo mora yomncá, Bëngbe Bëtsá tondaye matënjanma.

<sup>4</sup> Cachábeñe nyets vida inamna, y quem vídaca tojánabo quem luarentša entsangbe juabnënga jabuábinÿnayama.

<sup>5</sup> Cha tonjánabo moye, chë entsangbe juabnënga ndoñe binÿniñe yonjamnoye, chiñe jabobínÿnayama. Cha sempre chca yobínÿna, y Satanás chë entsangbe juabnënga ndoñe binÿniñe chaondëtsemnama amá, ndoñe yondobena chë binÿnayabe obenana jtsejuánana.

<sup>6</sup> Inamna canÿe boyabása, Juan ca uabainá; y Bëngbe Bëtsá tbojanichmó,

<sup>7</sup> binÿnayabiama chaóyebuambama; entsángbeñe binÿnayabiama cháuyanama, chca, ntšamo Juan chë binÿnayabiama tojayana soyëngaca, nyetscanga Jesúsbeñe chamotsošbuáchema.

8 Juan ndoñe yonjamna chë binÿnayá. Cha inamna canÿe ichmoná, chë nda binÿnayá yomnabiama entšángbeñe chauabáyanama.

9 Chë ndegombrá quem luaroye tonjánabo chë entšangbe juabnënga jabuábinÿnayama.

10 Chë Bëngbe Bëtsabe Uámana Oyebuambnayana quem luariñe yojtsanmëna; masque cháftaca Bëngbe Bëtsá quem luare tojanma, nda cha yojamnama muentša oyenënga ndoñe monjántatšëmbo.

11 Cachabe luare entšángbioye tonjánabo, y entšanga ndoñe tmonjánbošena cha jofjana.

12 Nÿetscanga, ndëmuanÿenga cha tmojanëbuaja y chábeñe tmojtsošbuáchenga, cha derecho tonjanatšatá jtobenama Bëngbe Bëtsabe básenga ca jtsabáinama.

13 Quem ošbuáchiyëngna, chca jtsemnama ndoñe tmonjanobená entšangbe buiñentšana tmojanonÿnáyeca, o ndaye entšabe juabnentšana. Nÿe Bëngbe Bëtsábeyeca chca chabe básenga imojtsabaina.

14 Cha, chë Bëngbe Bëtsabe Uámana Oyebuambnayana, entšá tojanóbema, y quem luare bëngaftaca yojëftsiyena. Cha yomna chë Bëngbe Bëtsabe nÿe canÿe Uaquiñá; chíyeca bënga tifjáninÿe chabe bëts obenana y chabe tšabe juabna, chë Bëngbe Bëtsábentšana tojanóyëngañana. Cha corente jtsababuánÿeshanëse šojánanÿena y yojëftsiyena ntšamo ndegombre inamncá.

15 Juan mëntsá chabiamá yojanáyebuache: “Chabiamá sënjanoyebuambná, chë ndabiamá chora atše sënjánayana, chë átšbentšana jabamana

atšbiana más uamaná endmēna, er atše cabá ndonyna orna, cha ya yojtsemna ca.”

<sup>16</sup> Cha tša tšabe ainana bómnyeca, bēnga nŷetscanga mallajta tšabe bendicionēnga tmojóyēngacñe.

<sup>17</sup> Moisesbiajana tifjanóyēngacñe chē Bēngbe Bētsá tojanmandá soyēnga. Pero Jesucristbeyeca, Bēngbe Bētsá tšabe bendicionēnga bēngbiana tojama y chē ndegombre soyēnga bēnga tmojēftsashjache.

<sup>18</sup> Ndocná, ndocna te Bēngbe Bētsábioye tbonjinŷe. Chē nŷe canŷe Uaquiñá ibobomná, cach Bēngbe Bētsá yomna; y cha, Bēngbe Bētsá chē Taitáftaca cánŷiñe mo canŷacá yomna. Mua, chē Uaquiñá, bēngbiana tojama, Bēngbe Bētsá juabuátmanama chaotsopodénama.

*Juan chē Ubayaná Jesucristbiana tojanabuayená*

*(Mt 3.11-12; Mc 1.7-8; Lc 3.15-17)*

<sup>19</sup> Canŷe te, Jerusalenoca judiēnga tmojanichamó básefta chēngbe bachnanga y levitēnga, chē Bēngbe Bētsabe bēts yebnoca trabájayēnga, Juan yojtsemnoye, cha nda bétsemnama chamuatjayama.

<sup>20</sup> Chocna, Juan chēngbeñe ndegombre tojanobuambá: —Atše, chē Bēngbe Bētsabe Uámana Uabuayaná ndoñe quetsátsmēna ca.

<sup>21</sup> As chora, cachiñe tmojantjá: —As, ¿ndase cojtsemna? ¿Chē Bēngbe Bētsabe juabna oyebuambnáyá Elías ca?

Y Juan tojanējua: —Atše cha ndoñe quetsátsmēna ca.

Chora chënga tmojantjá: –As, ¿chë Bëngbe Bëtsabe juabna jabóyebuambayama jabamá ca?

Y Juan tojanējua: –Ndoñe ca.

<sup>22</sup> Chora chënga tmojanianyana: –Asna, ¿aca ndase cojtsemna? Bënga šontsamna nda aca cojtsemnama jtsetatšëmbuana, as chë šonjadespachenga jacúntama. ¿Ndayá cojtsobena cach acbiama jayanama ca?

<sup>23</sup> Y Juan mëntšá tojanējua: –Atše sëntsemna chë ndabiama Bëngbe Bëtsabe juabna oyebuamb-nayá Isaías mëntšá tojanábema: “Entšanga ndoyenoca canye abuyayinayá echántsemna, y entšanga mëntšá echántsabuyayinaye: Bëngbe Utabná echanjabo ca. Mo nda canye benache tojtseprontacá, tšëngaftángnaca cachcá, cha jabama tšabe juabnëngaca šmochtseprontana ca.”

<sup>24</sup> Chorna, báseftanga chë fariseungbe ichmónënguentsana,

<sup>25</sup> Juan tmojantjá: –Chë Bëngbe Bëtsabe Uámana Uabuayaná, Cristo ca uabainá, ndoñe tcontsemnésna, ni Elías, ni chë Bëngbe Bëtsabe juabna jabóyebuambayama jabamá ndóñesna, ¿ndáyeca entšanga cojtsëbayana ca?

<sup>26</sup> Chora Juan tojanējua: –Atšna, béjayeca entšanga sëndëubáyana. Pero tšëngaftangbeñe canya entsemna; cha ndoñe quešmatábuatma;

<sup>27</sup> y cha atšbe ústonoye echanjášhango. Atše mercedo taitatobuajoñe, ni mo jotsejbiyama, chabe shecochëtjonëshentsa corriëja jajafjonama ca.

28 Chca tojanopasá, canye pueblo Betania ca uabáinentše, Jordán béjaye chenguana. Cach béjayiñe, Juan entsanga yojanëbáyana.

*Jesús chë Bëngbe Bëtsabe Oveshatema ca uabainá*

29 Yëfsana, Juan yojtsemnoye Jesús yojtsebéconaye, y chë cháftaca imojtsemna entsanga tojanéyana: “Smochjinýe. Chë nda Bëngbe Bëtsá tbojichmó y iytanana Oveshatemcá entsobiamná cha, entsashjajuana ca. Cha jóbanëse, quem luarentša entsanga bacna soyëngama perdonánënga mochántsemna.

30 Atše chabiamna chonjutsëtsná, mëntsá sënjánayana ora: ‘Atšbe ústonoye canya echanjáshjango. Cha atšbiamna más uamaná endmëna, er atše cabá ndonýna ora, cha ya yojtsemna ca.’

31 Tempna, cach atše ndoñe quetsjátantatšëmbo nda cha bétsemnana. Pero atšna ínýenga béjayeca ubáyana sëndabó, Israeloca entsanga quem boyabása chamuábuatmanama ca” –Juan tojanéyana.

32 Chentsana Juan mëntsánaca tojanobuambá: “Chabiamna mëntsá bominye sënjanjajó: chë Uámana Espíritu, mo canye palomatemcá, celocana tonjánastjango y quem boyabásabe juatsbuañe tonjanototoná.

33 Atše cabá ndoñe quetsjátantatšëmbo nda cha bétsemnana, pero chë béjayeca jubáyama šonjanichmó cha, mëntsá šonjanियana: ‘Nda chacojinýe, chë Uámana Espíritu jastjanguana y chabe juatsbuañe jototonana, chábeyeca atše chanjíchmua chë Uámana Espíritu entsangbe ainaniñe cháumashënguama ca.’

34 Y morna, atše aíñe chca tijinjë, y ndegombre tšëngaftanga cbëyana, cha chë Bëngbe Bëtsabe Uaquiñá entsemna ca” —cha tojanëyana.

*Chë Jesusbe natsana ústonënga*

35 Yëfsana, Juan chabe uatsjëndayënguentšana útataftaca cachoca yojtésemna.

36 Jesús yojtsachnëjuanama, Juan tbojáninjë ora, tojanëyana: “Sochjinjë. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca.”

37 Chora chë Juanbe uta uatsjëndayata, chca tbojanuena ora, Jesús tmojanasto.

38 Jesús tojesanontješé y tojánanjë chata imojétsëstonama. As, tojanatjá: —¿Ndayá šojtsenguá ca?

Y chata tbojaniyana: —¿Rabí, ndayentše icoyena ca? (Rabí endayana “Buatëmbayá ca”.)

39 Chora Jesús tojanëjua: —Mabo y šochjinjë ca.

As chata tbojána y tbojáninjë ndayentše cha yojaniyenana. Y chentše cháftaca tojéftsana jëtana, ya jetiñe mo las cuatro ora yojtsemna causa.

40 Chë Jesusbiana oyebuambnayana Juánbioye tbojanóyeunata y Jesús tbojanasto útatentšana cánjyana Andrés ca yojanabaina; cha yojamna Simón Pédrëbe catšata.

41 Andrés, cabá ndocna injë soye ndëma ora, tojána chabe catšata Simón janguanguama. Y tbojáninjëna ora, Simónbioye tbojaniyana: “Chë Bëngbe Bëtsabe Uámana Uabuyaná, Cristo, fsënjínjëna ca.”

42 Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninjë

ora, tbojaniyana: “Aca condmëna Simón, Jonasbe uaquiñá, pero Cefas ca cochantsabaina ca.” (Chcana endayana “Pedro o ndëtsbé ca”).

*Jesús, Felipe y Natanael tojánachembo chamuas-tama*

<sup>43</sup> Yëfsana, Jesús tojanjuabó Galilea luaroye jama. Benachiñe Felípbioye tbojáninýena y tbojaniyana: “Smasto ca.”

<sup>44</sup> Chë boyabása Felipe, Betsaida pueblócá inamna. Andrés y Pédrëna cach pueblócata ibnamna.

<sup>45</sup> Chentšana Felipe tojána Natanael janguanguama; y tbojaniyana: —Chë ndabiamama leyënga librëšangañe Moisés tojanábema cha fsënjínýena ca. Cachabiamama, Bëngbe Bëtsabe juabna oyebuambnayeñgnaca tmojanábema. Cha Jesús entsemna, Josebe uaquiñá, chë Nazaretocá ca.

<sup>46</sup> Chora Natanael tbojaniyana: —¿Ndaye tšabe soye Nazaretocana nanjopódia jóbocnama ca?

Y Felipe tbojanjuá: —Mabo y cochjinýe ca.

<sup>47</sup> Natanael yojtsebëconama, Jesús tbojáninýe ora tojánayana: —Moye canýe entsá entsabó; cha ndegombre endomerecena Israelbentšana entsá jtsemnama. Cha tšabe entsá endmëna; ndocnábioye quebnatsíngña ca.

<sup>48</sup> Chora Natanael Jesúsbioye tbojantjá: —¿Ntšamo atše šcuabuatma ca?

Y Jesús tbojanjuá: —Felipe cabá aca ndëchembo ora, atše tcbonjinýe, chë higo betiye tēchetsoye condëtsomñe ora ca.

<sup>49</sup> As, Natanael tbojaniyana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entsangbe Rey ca!

<sup>50</sup> Chora Jesús tbojanjuá: —¿Aca átsbeñe cojtsošbuaché, nÿe chë higo betiye tēchetšoye tbojinÿe ca tbojauyanama? Ndegombre, chë soyama más bēts soyēnga cochanjinÿe ca.

<sup>51</sup> Chentšana Jesús tojanēyana: —Ndegombre šcuayana: Tšēngaftanga šmochanjinÿe celoca atēfjniñe, y Bēngbe Bētsabe angelotēmēnga jtsetsjuajnana y jtsastjajuanana Bēngbe Bētsá Entšá tbojanbemabe tatsētsoaca.

## 2

*Canÿe casamento Galilea luaroca, Caná pueblentše*

<sup>1</sup> Chentšana unga tianoye, canÿe casamento inamna, canÿe pueblentše Caná ca uabáinentše, Galileoca. Chë oboyejuayoca Jesusbe mamá yojtsemna.

<sup>2</sup> Jesús y chabe uatsjéndayēngnaca chë casamentoca ófjanēnga imojtsemna.

<sup>3</sup> Chë oboyejuayentše, vínoye yojtsopochóca y Jesusbe mamá tbojanियana: —Ya tondaye vínoye quemátsbomna ca.

<sup>4</sup> As, Jesús tbojanjuá: —Mama, ¿ndáyeca chca atše šcojtsatsá? Atšbe ora cabá ndoñe ntjoshjanguana ca.

<sup>5</sup> Chentšana, chabe mamá, chentša oservénēnga tojanēyana: —Lempe šmochjama, ntšamo cha chacmojuayancá ca.

<sup>6</sup> Chocna, chnēnguana ndētsbé matbaja inamna. Chca matbajēnguentša bējayeca, judiēnga imojanamana jtsacuéntšabiana cabá ndēse ora, ntšamo tempo entšanga imojanamancá, Bēngbe



Bëtsabe delante tšábenga jtsatsmënana. Cada matbajiñe, mo shachna o canyësëfta bnëtsanáua béjaye yojanába.

7 Chora Jesús chë oservénënga tojanamëndá: “Quem matbajënga béjayeca mobuajutetjé ca.” Y chënga, chora lempe tmojanbuajutetjé.

8 Y Jesús tojanëyana: “Morna, báseye mobuat-sjo y chë fiesta otocanábioye mabuyamba ca.” Y chënga chca tmojanma.

9 Chora, chë fiesta otocaná, chë béjaye Jesús vínoye tojanbemiye tojanftantiá, ndëmocana yojóbocnana ntsetatšëmbcá. Pero chë oservénëngna aïñe imojtsetátšëmbo ndëmocana, er cachënga chë béjaye tmojanbuatsjo. As, chë fiesta otocanana, chë bobontse bouamnábioye tbojanchembo,

10 y tbojanianyana: “Nyetscanga monduamana natsana chë más uámana vínoye jushebëcana, y chë ófjanënga becá tmojatëmo ora, chë más batšá uámaniye. Pero acna, chë más uámana vínoye morscama tcojtsabofjajó ca.”

11 Ntšamo Jesús tojanmcá Caná pueblentse, Galileoca, yojamna chabe natsana bëts soye Bëngbe Bëtsabe obenánaca. Y chca, chabe bëts obenana y uámanana cha tojaninýanyé; y as, chabe uatsjëndayënga chábeñe imojtsošbuaché.

12 Chca tojanopasá chentšana, Jesús canye pueblo, Capernaum ca uabáinoye tojtsanoñe. Chorna, chabe mamá, chabe catšátanga y chabe uatsjëndayënga cha tmojantjëmbambá, y choca baseftatescama tmojanoquedá.

*Jesús Bëngbe Bëtsabe bëts yebnentsana bacna entšanga tojtanëbuacna*

*(Mt 21.12-13; Mc 11.15-18; Lc 19.45-46)*

<sup>13</sup> Ya canÿe judiëngbe bëts fiesta, chë Bashco fiesta yojétsobeco, chë ntšamo Bëngbe Bëtsá chëngbe bëts taitanga Egiptocana tojánatsebacama jtenójuaboyama. Chë fiestama Jesús Jerusalenoye tojána.

<sup>14</sup> Jerusalenoca, Bëngbe Bëtsabe bëts yebnentsë, Jesús tojánanÿena uacnënga, oveshënga y paloma enënga, y entšángbioye crocénana atrócyënga, chëngbe luarënguenache imojtsetbiámana.

<sup>15</sup> Jesús chca tojánanÿe ora, biajënga tojanaca, tjanjanëja tojanobopormá, y Bëngbe Bëtsabe bëts yebnentsana nÿetscanga tojtanëbuacna, chëngbe oveshënga y uacnëngaca. Chentšana Jesús, Bëngbe Bëtsabe bëts yebnentsama yojanoservena crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca.

<sup>16</sup> Chë paloma enëngna Jesús tojanëyana: — ¡Quem soyënga lempe muentšana matábocana! ¡Ndoñe matsbuamnana ni mátenana atšbe Bëtsabe yebnentsë, mo cánÿentšë jiyama luarentšë cuaftsemncá ca!

<sup>17</sup> Y as, chabe uatsjëndayënga tmojanenojuabó ntšamo Bëngbe Bëtsabe uabemana palabrënguiñe iuayanama: “Bëngbe Bëtsabe yebna jtseboguanama juabna, nÿets átšbeñe entsemna ca.”

<sup>18</sup> Chora, judiënga Jesús tmojantjá: —¿Ndaye bëts soye cochjama bënga chašcuinÿanÿema, aca ndaye deréchoca bëngaftaca chca cojtsobenama ca?

19 As Jesús tojanějua: —Quem Bëngbe Bëtsabe yebna menásatajchca, y atše unga tese chtëtsbaná ca.

20 Chora chë judiënga tmojanianyana: —Canta bnëtsana chnënguana uatiñe, quem Bëngbe Bëtsabe yebna tmojanjebo. ¿Y aca, nÿe unga tese lempe cochtëtsjebo ca?

21 Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye.

22 Chama, Jesús obanënguentshana tojtanayena ora, chabe uatsjëndayënga tmojanenujabó ntšamo muentše cha tojanëyanama. Chca ora, Bëngbe Bëtsabe uabemana palabrenguiñe y Jesús chora tojánayana palabrenguiñe más chënga imojtsošbuaché.

### *Jesús nÿetsca entšangbe juabna iuábuatma*

23 Jesús Jerusalenoca chë Bashco fiestama yojtsemnëntscuana, entšanga tmojáninÿe Jesús jamana bëts soyënga Bëngbe Bëtsabe obenánaca. Chíyeca, ba entšanga chábeñe imojtsošbuaché.

24 Pero Jesús chëngbeñe ndoñe yontsošbuaché, cha nÿetscanga yojanëbuatma causa.

25 Y Jesús ndoñe bonjanájaboto chë entšangbe soyëngama chabotsebuayiynama, er cachá entšangbe ainaniñe nÿetsca juabnënga yojanábuatma.

## 3

### *Jesús y Nicodemo*

<sup>1</sup> Inamna canÿe boyabása Nicodemo ca uabainá. Cha yojamna fariseunguentśá y judiëngbe canÿe amëndayá.

<sup>2</sup> Chana ibeta Jesúsbioye tojána y tbojaniyana: —Buatëmbayá, bënga fsëntsetatśëmbo aca canÿe buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chíyeca bënga chca fsëntsetatśëmbo ca —cha tbojaniyana.

<sup>3</sup> Chora Jesús tbojanjuá: —Ndegombre cbëyana, nda ndoñe cachiñe tontonÿná, cha ndoñe quenátobena Bëngbe Bëtsabe amëndayana jinÿama ca.

<sup>4</sup> Y Nicodemo tbojantjá: —¿Ntsamo, canÿe entśá ya bëtsá tojtsemna ora, nantsobena cachiñe jtónÿnama ca? Ndegombre, cha ndoñe ntsoybenana cachabe mamabe cuerpiñe jtamashënguana cachiñe jtónÿnama ca.

<sup>5</sup> Chora Jesús tbojanjuá: —Ndegombre cbëyana, béjayeca y chë Uámana Espíritbeyeca ntjonÿnacá, ndocná quenátobena Bëngbe Bëtsabe amëndayoye jamashënguama.

<sup>6</sup> Nda bëtsëtsabentśana tojonÿná cha, quem luarentśa entśangcá jtsemnana; pero chë Uámana Espíritbeyeca tojonÿná chana, jtsemnana canÿa chë Uámana Espiritu ainaniñe bomná.

<sup>7</sup> Ndoñe matenjnanana ntśamo tcbonjauyanama: “Nÿetscanga entsamna cachiñe jtónÿnama”.

<sup>8</sup> Chë binÿia ndëmuajana tojtseboşe jtsemnana, chëjana jtsanana. Masque entśanga, chë binÿiyama jtsuenanana, ndoñe ntsetatśëmbuana

ndémocana yobama y ndémoye yojsoma. Cachcá, tšëngaftanga ndoñe quešmátstatšëmbo ntšamo entšanga chë Uámana Espíritbeyeca tmojtsónyñama; pero tšëngaftanga šmontsetátšëmbo aíñe chca yomnama ca —Jesús tbojaniyana.

<sup>9</sup> Chora Nicodemo tbojantjá: —¿Ntšamo chca nántsemna ca?

<sup>10</sup> Y Jesús tbojanjuá: —Aca, canye Israeloca abuatambayá, ¿chë soyëngama ndoñe condëtatšëmbo ca?

<sup>11</sup> Ndegombre cbëyana, bëngna chë fststátšëmbo soyëngama fsëntsoyebuambná, y chë tifjinye soyëngama ndegombre bëtsemnama fséntsichamo. Pero tšëngaftangna, chë cbontsëtsëtsná soyënguñe ndoñe quešmatošbuaché.

<sup>12</sup> Atše, quem luarentša soyëngama sënjoyebuambá y tšëngaftanga átšbeñe ndoñe chešmatošbuaché. Y as, ¿ntšamo átšbeñe šmochtsošbuáchiye, celoca soyëngama cbojtsëtsëtsnase?

<sup>13</sup> “Ndocná, nye cachábeyeca Bëngbe Bëtsábioye tonjátsjua. Nye chë celocana tojabá aíñe, chë Bëngbe Bëtsá Entšá tbojanbemá.

<sup>14</sup> Y chcase, ntšamo Moisés entšanga ndoyenoca bronze mëtšcuaye tsbanánoca tbojananguësëtcjá, šoquënga tšabá chamotsatsmënama; cachcá entsemna, Bëngbe Bëtsá Entšá tbojanbemá entšanga chamuatsbanama;

<sup>15</sup> chca, nyetscanga chábeñe tmojtsošbuáchenga, chë nyetsca tescama yomna tšabe vida chamotse-bomnama ca” —Jesús Nicodémioye tbojaniyana.

*Ntsachetsá Bëngbe Bëtsá entsanga  
iuababuánÿeshana*

<sup>16</sup> Mëntsánaca Jesús tojánayana: — Bëngbe Bëtsá quem luare entsángbiye tša yojánababuanÿeshanayeca, chë nÿe canÿe Uaquiñá ibobomná, bëngbiye tbojichmó, nÿetsca chábeñe ošbuáchiyënga ndoñe chamondóbanama, y aíñe chë nÿetsca tescama yomna tšabe vida chamotsebomnama.

<sup>17</sup> Er Bëngbe Bëtsá chabe Uaquiñá quem luaroye ndoñe tbonjichmó quem luare entsangbiana jabáyanama ntšamo tmojamama castigánënga chaotsamnama ca, sinó, entsanga chábeyeca atsebácanënga chamotsemnama.

<sup>18</sup> “Nda Bëngbe Bëtsabe Uaquiñábeñe tojtsošbuáchebiana, Bëngbe Bëtsá ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiana, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nÿe canÿe Uaquiñá ibobomnábeñe ndoñe yontsošbuaché causa.

<sup>19</sup> Chca, chë ndoñe tmontsošbuáchengbiamna cha ya tojayana, ntšamo tmojamama castigánënga chamotsemna ca; er chë entsangbe juabnënga binÿnayá quem luaroye tojabo, pero ba entsanga tmojábošëna jtsomñana, chë entsangbiana bacna juabnëngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñama.

<sup>20</sup> Chë bacna soyënga tojtsamá ndoñe ntsebošana, chë binÿnayá chabe bacna soyënga

chabuñyinyema, ni chabe bacna soyëngama chabuácacanamama. Chíyeca, chë bacna soyënga jtsamëse oyená, chë binÿnayábioye jtsáboyënjana, y chë binÿnayábioye ndoñe ntjabana.

<sup>21</sup> Pero nda sempre tojtsiyena ntšamo ndegombre yomncá jtsamëse, chana aíñe chë binÿnayábioye jabana, chë binÿnayá chabiama chabuñyinyema, chë tojama soyëngna, ntšamo Bëngbe Bëtsá tojtsebošcá tojamama ca” —Jesús tojánayana.

*Juan chë Ubayaná cachiñe Jesucristbiamama tojanabuayená*

<sup>22</sup> Chca tojanopasá chentšana, Jesús chabe uatsjëndayëngaftaca básefta Judeoca pueblëngoye tojtsanoñe. Chiñe, baseftatescama chë uatsjëndayëngaftaca tojanoquedá, entšanga ubáyana.

<sup>23</sup> Cach tempo, Juanënaca entšanga yojanëbáyana Enonoca, Salim béconana, er chocha bëtscá béjaye inabinÿna. Ba entšanga choye imojtsaye, y Juan chënga yojanëbáyana.

<sup>24</sup> Chca tojanopasá, chë Heródesbe soldadënga Juan cabá ndutame ora.

<sup>25</sup> Chë tempo, básefta Juanbe ústonënga tmojanontsé inÿe judíoftaca enatsëtsnayana ntšamo tempo judiënga chë jtsacuëntšabiama imojanámanama.

<sup>26</sup> Chora, chënga Juánbioye tmojánabo y tmojanianyana: —Buatëmbayá, chë Jordán chenguánoica ácaftaca enjamná, ndabiama tša tšabá conjanoyebuambná, mora entšanga entsëbayana y nyëtscanga cha montsëstona ca.

27 As Juan tojaněyana: —Ndocná quenátobena tondaye ntsebomnana, Běngbe Bětsá ndoñe tbonjatšetase.

28 Cach tšěngaftanga tšabá šmonjanuena y šmontsobena ndegombre yomnama jayanana, atše ndoñe chě Běngbe Bětsabe Uámána Uabuayaná tsjanměna ca sěnjánayanama; sinó, Běngbe Bětsá atše šojanichmó chě Uabuayanabe natsana, chabiama entšanga jabábuayenama.

29 Chě tobiaše tojtsobouamá ora, chě bobontse chábioye jtsebomnana; y chabe amigna, chabiama jtsobátmanana y chě bobontse bouamnabe oyebuambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chě Uabuayaná yojtsamama y yojtsóyebuambnama sěntsuenana ora, átšnaca corente oyejuayá sěntsemna.

30 Cha bontsemna más uamaná jtsemnana, pero atše šontsemna más nduamaná jtsemnana ca — Juan tojaněyana.

### *Ntšamo yomna chě celocana tojabá*

31 Měntšánaca Juan tojánayana: “Chě tšbanánocana tojabá, nyetsca entšangbiama más uamaná endměna. Chě quem luare oyená quem luare entšangcá jtsemnana y quem luarentša soyěngama jtsóyebuambnayana, pero chě celocana tojabana, nyetsca entšangbiama más uamaná endměna.

32 Cachá ntšamo tojině y tojouencá entsoyebuambná, pero chě entsichamo soyěnguiñe ndocná quenatošbuaché.



<sup>33</sup> Nda ntšamo cha tojtsóyebuambnañe tojtsošbuaché y chca tojtsama, jtsinŷanŷnayana Bëngbe Bëtsá ndegombre soyënga inetsichámuama.

<sup>34</sup> Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámana Espíritu, nŷets tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama.

<sup>35</sup> Chë Taitá Uaquiñábioye bondbobonshana, y chë Uaquiñábioye obenana tbojatšetá nŷetsca soyënguiñe jtsemándayama.

<sup>36</sup> Nda chë Uaquiñábeñe tojtsošbuaché, chë nŷetsca tescama yomna tšabe vida echántsebomna; y nda chë Uaquiñábioye ndoñe tbontsašbuaché, chana chë vida ndoñe queochátsbomna, y chë Bëngbe Bëtsabe uabouana castigo nŷetsca tescama chábeñe echántsemna ca” –cha tojánayana.

## 4

### *Jesús y chë Samaria luaroca shembása*

<sup>1</sup> Chë fariseunga tmojanuena Jesús, Juanbiamá más ústonënga yojtsabamnana, y más entšanga yojtsëbáyanama.

<sup>2</sup> Pero ndegombre, cach Jesús ndocnábioye bonŷanábayana, sinó chabe uatsjëndayënga.

<sup>3</sup> Bëngbe Utabná Jesús, ntšamo chë fariseunga tmojanuena tojántatsëmbona ora, Judea luarocana tojëftsanbocna y Galileoye tojtana.

<sup>4</sup> Choye jtamna ibojamna Samaria luarëjana jachnënguana.

<sup>5</sup> Samariocna, canÿe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaquiñá Josébioye tbojëftsanlargá fshantse béconana.

<sup>6</sup> Choca yojamna cánÿentse atëfjóniñe, búyeshe jobuatsjuama, Jacobëbe atëfjóniñe ca uabáiniñe. Mo nÿetsto ora, chentse Jesús yojtsemna, aniñe uamëntsnayá, chë atëfjóniñe batsjaca yojótbema.

<sup>7-8</sup> Chabe uatsjéndayëngna chë puebloye tmojána saná jobuámiñama. Chora, canÿe shembása Samariocá, chë atëfjónoye tojánashjango, búyeshe jauafcama; as Jesús tbojaniana: —Búyeshtema šmabuatssetá ca.

<sup>9</sup> Y chë shembása tbojanjuá: —Aca canÿe judío condmëna y atšna canÿe samaritaná. ¿Ntšamo cojtsobena atše búyeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtsná.)

<sup>10</sup> Chora Jesús tbojanjuá: —Aca mo cojtsetátšëmbo nÿe ntšamo Bëngbe Bëtsá aca jatšetayama yojtsebošcá, y nda chë búyeshe cmojtsábuatjanañama, acna más cha catjuábuatjañe, y chana béjaye vida bomniye cmatjuabuátšetaye ca.

<sup>11</sup> Y chë shembása tbojaniana: —Señor, tondaye quecátsbomna nÿe mo ndayecnaca búyeshe jabuat-sjuama, y chë atëfjóniñe corente tbocha endmëna; y as, ¿ndayentsana cochjobenaye béjaye vida bomniye atše juabuatssetayama?

<sup>12</sup> Bëngbe tempsca bëts taitá Jacob, quem atëfjóniñe bëngbiana tojëftsanboshjona. Cachá, chabe básenga y chabe bayënga muentšana

búyeshe tmojëfťsanofšé; y ¿aca chabiamá más bĕťsá comna ca? —chĕ shembása vojťsichamo.

13 As Jesús tbojanjuá: —Nĕťscanga chĕ quem búyeshentšana tmojofšenga, chĕnga cachiĕne echantĕťjuendaye.

14 Pero chĕ chanjuabuátsetaye búyeshentšana tojofšé chana ndocna te cachiĕne quebochĕťajuendaye. Cha chanjuabuátsetaye búyeshna, chábeĕne echántsemna mo cánĕťentšĕ bĕjajtema obocanińcá, chĕ nĕťsca tescama yomna tšabe vida jtsebomna ca —cha tbojanijana.

15 Chora chĕ shembása tbojanijana: —Seńor, chca búyeshe šmabuatšetá, as atšĕ ndoĕne cachiĕne chašondetsajuendama, ni búyeshe juafcoma moye jtsaboyama ndoĕne chašondĕťsemnama ca.

16 As Jesús tbojanijana: —Motsa acbe boyá jachembuama y cochĕśabo ca.

17 Chora chĕ shembása tbojanjuá: —Boyá ndoĕne quetsáťsbomna ca.

As Jesús tbojanijana: —Tšabá tcjayana boyá ndoĕne condbomna ca.

18 Er, aca shachna boyanga conjánabamna, y chĕ mora contsebomnana, acbe boyá ndoĕne quenáťsmĕna. Nťšamo tconjayancá ndegombre entsemna ca.

19 Chĕ shembása chca tojanuena ora, Jesúsbioye tbojanijana: —Seńor, mora atšĕ sĕntsetatšĕmbo, aca canĕya Bĕngbe Bĕťsabe juabna oyebuambnayá comnama.

20 Bĕngbe tempsca bĕťs taitanga quem tjoca Bĕngbe Bĕťsá monjánadorana; pero tšĕngaftanga, judiĕnga šmondbĕťsichamo, bĕnga Bĕngbe Bĕťsá jadóramna, Jerusalenoca chĕ luare canmĕna ca.

21 Chora Jesús tbojanjuá: —Shembása, šmoyeuná; canye tempo echanjóshjango y chora tšëngaftanga ndoñe quecmochátamna Bëngbe Bëtsá jadóramna, ni quem tjoye jabana, ni Jerusalenoye jana.

22 Tšëngaftanga samaritanënga ndoñe quešmatábuatma nda šmetsadoránama; pero bënga aíñe fsënduábuatma, er chë atsebacayá judiënguentsana endabó.

23 Pero ora entsoshjajuana, ya chë tempo tocjbuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnëngaca chábioye mochántadorana. Er chë Taitá entseboše chë chábioye adórayënga chca chamotsamama.

24 Bëngbe Bëtsá, Espiritu endmëna; y chë chábioye adórayënga entsamna, chë Uámana Espíritbeyeca y ndegombre juabnëngaca cha jtsadoránana ca — Jesús tbojaniana.

25 Chora chë shembása tbojaniana: —Atše sëndëtatšëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojášhango orna, cha nyetsca soyëngama cašochjabuayená ca.

26 As Jesús tbojaniana: —Atše, chë ácaftaca entsoyebuambná cha, cha entsemna ca.

27 Chëntscuana, Jesusbe uatsjëndayënga tmojtashajna, y tmojtsanëuatjaná, Jesús canye shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndáyeca cháftaca cojtsoyebuambná ca?

28 Chorna, chë shembása chabe uafcanëja tojésanboshjona, y chë pueblöye betesco tojtaná. Chocna, entšanga tojanéyana:

29 “Mabënga canÿe boyabása jinÿama ca. Cha atše šonjauyana lempe ntšamo tijamcá. ¿Chë boyabása, chë Cristo tanántsemna ca?” –cha yojtsichamo.

30 As chë entšanga chë pueblöcana tmojánbocana y Jesús yojtsemnoye tmojánashajna.

31 Chca yojtsopasánëntscuana, chë uatsjéndayënga Jesúsbioye imojtseimpadana: –Buatëmbayá, batšatema mose ca.

32 Pero cha tojanéyana: –Atše canÿe soye jasama sëntsebomna. Tšëngaftanga chë soyama ndoñe quešmátstatšëmbo ca.

33 Chora chë uatsjéndayënga tmojanontsé entjanayana: –¿Nderado nda jasama chabiana tojiyëbo ca?

34 Y Jesús tojanéyana: –Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiana entsemna.

35 Tšëngaftanga šmondbétsichamo: “Cabá canta ishinÿe entsashbena jaja saná chaotsebínÿnama ca”; pero atše cbéyana: Minÿënga tša entšanga moye montsabëbana; chënga montsemna mo jajañe saná játbanama tojtseprontancá.

36 Tšëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanánana jtsësháchiñana. Cachcá, tšëngaftanga cmontsamna atšbiana entšanga júbuajana, chë nÿetsca tescama yomna tšabe vida chamotsebomnama. Chë jaja saná átbanaye ora,

jenënga y chë atbanayënga cánÿiñe oyejuayënga jtsemnana. Cachcá, chë entsanga átsbeñe chamojtsošbuaché ora, nÿetscanga, chë atšbiana obuájajanënga y chë atšbiana trabájayëngnaca cánÿiñe oyejuayënga mochántsemna.

<sup>37</sup> Quem entsangbe ichámuana, canÿe ndegombre soye endmëna: “Chë jená canÿa jtsemnana, y atbanayana inÿa ca.”

<sup>38</sup> Atše tšëngaftanga cbonjichamó canÿe soye játbanama, y tšëngaftanga tondaye chešmatsma chca chaotsebínÿnama. Inÿenga chiñe bëtscá tmonjëftsetrabája, y tšëngaftangna, chëngbe trabajënguentsána šmojolograñe ca —Jesús tojánayana.

<sup>39</sup> Bëtscá entsanga, Samarioca pueblentšënga Jesúsbeñe imojtsanošbuaché, ntšamo chë shembása tojanëyanama. Chë shembása tojanëyana: “Lempe ntšamo atše tijamcá cha šonjauyana ca.”

<sup>40</sup> As chë samaritanënga, Jesús yojtsemnentše tmojánashjajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjëtana.

<sup>41</sup> Y más entsanga, cach ntšamo Jesús yojtsanëtsëtsnacá tmonjanuena ora, chábeñe imojtsanošbuaché.

<sup>42</sup> Y chë shembása chë entsanga tmojanियana: “Mora cocayé fsëntsošbuaché, ndoñe nÿe ntšamo aca šcojáuyanama, sinó cach bënga chábioye oído fsënjabuajóyeca; y mora fsëntsetatšëmbo ndegombre cha yojtsemna chë quem luare entsangbiana Atsebacayá ca.”

*Jesús, canýe mandado uajabuachanabe básabioye tbojanshná*

<sup>43</sup> Uta te chentšana, Jesús Samariocana tojáisanbocna y Galileoye tojataná.

<sup>44</sup> Cach Jesús mēntšá tojánayana: “Canýa Bēngbe Bētsabe juabna oyebuambnayá, cachabe luarentše oyenēnga ndoñe bētsá ntjabemēngana ca.”

<sup>45</sup> Galileoca oyenēnga Jerusalenoye tmojána, y tmojáninýe nýetsca bēts soyēnga ntšamo Jesús Bashco fiesta ora choca tojanmcá. Chíyeca, Jesús Galileoye tojtanashjango ora, chēnga tšabá tmojtano fja.

<sup>46</sup> Galileocna, Jesús cachiñe Caná puebloye tojésanashjango, chē béjayeca vínoye cha tojānbementše. Choca yojtsemna canýe mandadbe uajabuachaná, y chabe uaquiñana Capernaum puebloca šocá yojtsejájona.

<sup>47</sup> Jesús Judeocana Galileoye tojánashjanguama, chē uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuetseshnáñama, er ya jtsóbanama yojtsemna ca.

<sup>48</sup> As Jesús tbojaniyana: –Tšēngaftanga, Bēngbe Bētsabe obenana jinýanýiyama bēts soyēnga atše jamama ndoñe šmonjinýēse, átšbeñe ndocna te ntsošbuáchiyana ca.

<sup>49</sup> Chora, chē mandadbe uajabuachaná Jesúsbioye tbojaniyana: –Taita, betesco mabo, atšbe uaquiñá cabá ndóbana ora ca.

<sup>50</sup> As Jesús tbojaniyana: –Acbe yebnoye mot-satá. Acbe uaquiñá ainá endētsomñe ca.

Chë boyabásana tojanošbuaché ntšamo Jesús tbojaniyancá y tojtaná.

<sup>51</sup> Cha yojtsataye orna, chabe oservénënga tmojánbocana jajébenguama y tmojaniyana: —Acbe uaquiñá tšabá entsatsmëna ca.

<sup>52</sup> As cha tojanatjá: —¿Ntseco orscana tbënjatëcja ca?

Y chënga tmojanjuá: —Tonjopasá yëfse, mošenana orscana chë calentora tbonjábosana ca.

<sup>53</sup> Chora chë taitá tojanenojuabó, cachca ora Jesús tbojaniyana: “Acbe uaquiñá ainá endëtsomñe ca”. Y cha y nÿetscanga chabe yebnentše oyenënga Jesúsbeñe imojtsanošbuaché.

<sup>54</sup> Ntšamo Jesús chora, chë uajabuachanabe uaquiñabiama tojanmcá, Judeocana Galileoye yojtsataye orna, yojamna chabe utama chca bëts soye jamama, Bëngbe Bëtsabe obenana jinÿanÿiyama, Galilea luaroca.

## 5

### *Jesús canÿe jama ndobenábioye tbojanshná*

<sup>1</sup> Baseftayté chentsana, chë judiënga canÿe oboyejuaye te imojtsebomna ora, Jesús Jerusalenoye tojana.

<sup>2</sup> Choca, chë Oveshëngbe amashjuana ca uabáinentše yojamna canÿe binche uafjajónaye, entsangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna.



<sup>3</sup> Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana.

<sup>4</sup> (Nderado nderado, Bëngbe Bëtsábioca canÿe ángel yojanamana jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënana.)

<sup>5</sup> Chë šoquënguiñe canÿe boyabása inamna, unga bnëtsana y posufta uatama jama ndobená.

<sup>6</sup> Jesús chë jajonábioye tbojáninÿe ora y ba uatama chca yojamna tojántatšëmbona ora, tbojantjá: —¿Quecojtseboše tšabá jtsatsmënana ca?

<sup>7</sup> Y chë šocá tbojanjuá: —Taita, ndocná quetsátsbomna nda chašuájabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inÿa atšbe natsana jtsamashënguana ca.

<sup>8</sup> Y Jesús tbojaniyana: —Matëtsbaná, acbe tjuashe mesocñe y matontšé jóyenana ca.

<sup>9</sup> Cach ora chë boyabása tšabá yojtsatsmëna, chabe tjuashe tojésanocñe y tojanontšé jtsanana. Chca tojanopasá ora, chë ochnayté inamna.

<sup>10</sup> Chíyeca, chë tbojanshnábioye chë judiënga tmojaniyana: —Mëntena ochnayté. Mënté ndoñe quenátopodena aca tjuashe jtsecutsnana ca.

<sup>11</sup> Y chë boyabása tojanëyana: —Chë šonjashná cha mëntšá šonjauyana: “Acbe tjuashe mesocñe y montšé jóyenana ca”.

<sup>12</sup> As chënga tmojantjá: —¿Nda yojtsemna chë “acbe tjuashe mesocñe y montšé jóyenana ca” tmojauyaná ca?

13 Pero chë shnaná ndoñe yontsetátšëmbo nda tbojanshnama. Chocna bëtscá entsanga imojtsemna; chcasna, Jesús chëngbe tsëntsajana tojanenatjërmba.

14 Chentšana, Jesús Bëngbe Bëtsabe bëtš yebnentše chë boyabásabioye tbojáninýena y tbojaniana: —Mouena; mora aca ya ndoñe šocá quecásmëna; bacna soyënga ndoñe cachiñe cattsama. Aíñese, acbiana puerte mal echanjopása ca.

15 Chë boyabása tojtsanoñe y chë judiënga tojanëyana: —Chë šonjashná cha Jesús entsemna ca.

16 Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama.

17 Pero Jesús tojanëyana: “Atšbe Taitá nyets tempo tšabe soyënga endbëtsama; cachcá, átšnaca tšabe soyënga sëntsama ca.”

18 Jesús tojanma ntšamo ochnayté ndoñe yonjanapodencá, y Bëngbe Bëtsabiana tojánayana “Atšbe Taitá ca”. Mëntšá Jesús yojtsanobiamná cach Bëngbe Bëtsacá. Chama, chë judiënga más imojtseboše Jesús jóbama.

### *Bëngbe Bëtsabe Uaquiñabe obenana*

19 Chentšana Jesús tojanëyana: “Ndegombre šcuayana: Bëngbe Bëtsabe Uaquiñá, nýe cachabe cuenta tondaye quenátobena jamana. Cha jtsonýayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana.

20 Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinýinýná; y más bëtš soyënga

bochanjinjinyiye, chë soyëngama tšëngaftanga chašmenjnanama.

21 Chë Taitá endama obanënga chámuatayenama y tšabe vida chamotsebomnama; cachcá, chë Uaquiñá entsama tšabe vida chamotsebomnama, ndëmuanjyënga cha tojtsebošcá.

22 Chë Taitá ndocnabiamama jatichámuana tšabá o ndoñe tšabá yontsama ca. Chabe Uaquiñábioye nyets obenana tbonjatšetá nyetscangbiamama jayanama tšabá o ndoñe tšabá tmontsamama.

23 Chca, chënga chamuinjinyé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nyetscanga mondbetsinjinyaycá. Nda chë Uaquiñábioye ndoñe más uamaná tbontsebiamná, cach ndoñe más uamana ntsebiamnayana chë Taitábioye, nda chë Uaquiñá tbojichmóbioye.

24 “Ndegombre šcuayana: Nda ntšamo atše sëntsichamcá šojoyeuná, y chë muentše šonjichmó chábeñe tojtsošbuaché, chë nyetsca tescama yomna tšabe vida jtsebomnana. Chabiamama chë Uaquiñá ndoñe queochátayana castiganá chaotsemna ca. Chca, Bëngbe Bëtsabiamama cha ya ndoñe más mo obanacá queochátsmëna, chábeñe ndošbuáchiye causa; y ya ndoñe nyetsca tescama castiganá queochátsmëna. Y aïñe, chë nyetsca tescama yomna tšabe vida echántsebomna.

25 “Ndegombre šcuayana: Chë jobuáchama te ya tocjobuache. Chë te, chë Bëngbe Bëtsabiamama mo obanëngcá imomnënga mochanjouena Bëngbe Bëtsabe Uaquiñá jtsóyebuambnayana. Nda chca tšabá chašojoyeuná cha, tšabe vida

echántsebomna.

<sup>26</sup> Er ntšamo Bëngbe Taitá obenana endbomncá, cachá jamama entšanga vida chamotsebomnama, chabe Uaquiñábioynaca obenana tbojatšetá entšanga vida chamotsebomnama jamama.

<sup>27</sup> Chë Uaquiñá endmëna nda Bëngbe Bëtsá Entšá tbojábema; chíyeca chë Taitá chábioye obenana tbojatšetá nyetscangbiana jayanama tšabá o ndoñe tšabá tmontsamama.

<sup>28</sup> Chama ndoñe matenjnanana. Er canye tempo echanjobuache, y chora chë Uaquiñá obanënga echántsachembuana; chënga mochanjouena y cach ora, chëngbe oyenocana mochanjésebocana.

<sup>29</sup> Tšabe soyënga tmojëftsemënga, obanënguentšana mochántayena, chë nyetsca tescama yomna tšabe vida jtsebomnama. Pero bacna soyënga tmojëftsemëngna obanënguentšana mochántayena nyetsca tescama castigánënga jtsemnama ca” —Jesús tojanéyana.

*Jesús, ndegombre Bëngbe Bëtsabe ichmoná in-  
amna*

<sup>30</sup> Mëntšánaca Jesús cachatbiana tojánayana: “Nye átsbeyeca tondaye quetsátobena jamama. Chë Taitá šontsemánda ntšamo nyetscangbiana jayanama tšabá o ndoñe tšabá tmontsamama. Nye chca atše sentsobena chë soye jamama. Ndoñe quetsátsboše jamana nye ntšamo cach atše stsebošcá; pero sempre sëndbétseboše jamama, ntšamo Taitá, chë šonjichmó cha tojtsebošcá. Chíyeca atše nyetscangbiana sentsichamo tšabá o ndoñe tšabá tmontsamama; y ntšamo nyetscangbiana sentsichamcá, ndegombre endmëna.

<sup>31</sup> “Ntšamo cach atšbiana tijayanama, ndegombre entsemna ca stsichámëse, ntšamo stsichamcá, nyetscangbiana tondaye ntsámanana.

<sup>32</sup> Pero inya entsemna. Cha endétatšëmbo y entsichamo ntšamo ndegombre atšbiana yomncá; y sěntsetatšëmbo ntšamo cha atšbiana yojtsichamcá, nyetscangbiana aíñe yojtsámanama.

<sup>33</sup> Tšəngaftanga ínŷenga šmojanichamó atšbiana Juan jatjayama; y ntšamo cha tcmojauyancá ndegombre endmēna.

<sup>34</sup> Masque chē soyēnga cha tcmojáuyana, ndoñe quešnatájaboto ndocna entšá atšbiana chaotsichamo ‘cha aíñe chca endmēna ca’. Atše quem soyēnga sěntsichamo ndayá nŷe tšəngaftanga atsebácanēnga chašmotsemnama.

<sup>35</sup> Juan enjamna mo canŷe uajuinŷanēsha tojtsajuinŷana y tojtsabuashinŷinŷancá. Tšəngaftanga chabe buashinŷinŷanana šmonjinŷe, y šmonjábošena rato cháftaca oyejuayēnga jtsemnama.

<sup>36</sup> Pero chē atše sēnjama soyēngacna más entsinŷinŷena ntšamo atšbiana ndegombre yomncá, chē ntšamo Juan atšbiana tojánayanama. Ndayá atšbe Taitá šojabonŷé jamama, ntšamo atše sěntsamcá, entsinŷinŷná ndegombre chē Taitá šojichmoma.

<sup>37</sup> Atšbe Taitá, chē šojichmó chánaca entsichamo ntšamo atšbiana ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátinŷe.

<sup>38</sup> Pero tšəngaftangbe ainanoye chabe palabra ndoñe tonjómashēngo, cha tbojichmóbeñe tšəngaftanga ndoñe quešmatošbuaché causa.

<sup>39</sup> Tšëngaftanga, Bëngbe Bëtsabe palabra tša jtsat-sjëndayana, er šmondobátmana, chca jtsamëse chë nyëtsca tescama yomna tšabe vida jónyënama. Y Bëngbe Bëtsabe uabemana palabrënguiñe atšbiana endayana ntšamo ndegombre yomncá;

<sup>40</sup> pero masque chca, tšëngaftanga ndoñe quešmátsboše atše jtsëstonana, y chca, tšabe vida jtsebomnama.

<sup>41</sup> “Atše ndoñe quetsátsboše entšanga yapa tšabá atšbiana chamotsichámuama.

<sup>42</sup> Y inye soye, atše puerte cbondëbuatma, y sëndëtatšëmbo tšëngaftanga Bëngbe Bëtsá ndoñe šmondbobonshánama.

<sup>43</sup> Atsna atšbe Taitabe cuenta sënjabo, y tšëngaftanga ndoñe quešmátsboše atše jofjana. Pero inya, cachabe cuenta tojabábioye cocayé aíñe šmatjofja.

<sup>44</sup> Tšëngaftanga corente jésebošana, ínÿenga tšëngaftangbiana tšabá chamotsichámuama, y ínÿengbiana tšabá jtsichámuama; pero ndoñe ntsebošana chë nyë canÿe Bëngbe Bëtsá tšëngaftangbiana cachcá chaotsichámuama. Chca šmojtsamëse, ¿ntšamo šmochtsobena Bëngbe Bëtsábeñe jtsošbuáchiyana?

<sup>45</sup> Ndoñe šmattsejuabnaye, atšbe Taitabe delante tšëngaftangbe contra atše chjayana ca ntšamo tšëngaftanga šmojtsamama. Tšëngaftanga tša jtsobátmanana atsebácanënga jtsemnama, chë ntšamo Moisesbe leyíñe endayancá šmojtsamama; pero ndegombre, ntšamo cha tojayancá, cach tšëngaftangbe contra entsemna.

<sup>46</sup> Tšëngaftanga, chë Moisés tojëftsanabema soyíñe šmojtsošbuachese, átšbeñnaca

šmattsošbuáchiye, er cha atšbiamá tojanábema.

<sup>47</sup> Pero chë tojanábema soyiñe tšëngaftanga ndoñe šmontsošbuachesna, ¿ntšamo šmochjobenaye chë atše sěntsichamo soyënguiñe jtsošbuáchiyana ca?”  
—Jesús tojaněyana.

## 6

*Jesús shachna uaranga boyabásenga saná tojanacaredadó*

*(Mt 14.13-21; Mc 6.30-44; Lc 9.10-17)*

<sup>1</sup> Chë soyënga tojanopasá chentšana, Jesús chabe uatsjëndayëngaftaca tojána Galilea uafjajónaye chenguana. Chë uafjajónayna Tiberias cánaca inauabaina.

<sup>2</sup> Ba entšanga imojtsěstona, er chënga tmojáninýe cha běts soyënga jtsamana, šoquënga jtsashnayëse.

<sup>3</sup> As Jesús tjoye tojántsjuá, y choca chabe uatsjëndayëngaftaca tojanótbema.

<sup>4</sup> Ya judiëngbe canýe fiesta, chë Bashco fiesta, yojétsobeco.

<sup>5</sup> Jesús tojanótbema ora, tojanontješé y tojánanýe ba entšanga chábioye imojetsebéconaye. As Felípbioye tbojaniyana: —¿Ndayentšé saná cuanjabuámiye nýetsca quem entšanga chamosama ca?

<sup>6</sup> Jesús chca tbojaniyana, ana Felípbioye jinýama ntšamo cha tabuanjojuama; er cach Jesús tšabá inatátšëmbo ndayá jamama.

<sup>7</sup> Y Felipe tbojanjuá: —Ni mo uta patse denario crocenánaca nanjopódia tanděše jabuámiyama, nýetsca entšanga nýe mo batšatémnaca chamuétšesama ca.

<sup>8</sup> Chorna, Jesusbe canÿe uatsjendayá, Andrés ca uabainá, Simón Pédrëbe catsata, Jesúsbioye tbojaniana:

<sup>9</sup> —Muentše entsemna canÿe básetema y cha shachna cebada tandëse y uta beónata entsebomna. Pero, ¿ndayase nÿe nÿetsatema chëfta entsangbiana ca?

<sup>10</sup> As Jesús tojánayana: —Entsanga mëyana chamotbiana ca.

Becá shácuana chë luariñe inamna, y nÿetsca entsanga chiñe tmojanoshëntsjatbiana. Chë entsanguentše shachna uaranga boyabásenga imojtsemna.

<sup>11</sup> Chora Jesús, chë tandëse chabe cucuatshiñe tojanca, y Bëngbe Bëtsábioye chë tandëshama tbojtanchuá; y chabe uatsjédayënga tojanëjatá, y chë uatsjédayëngna nÿetsca entsanga imojtsetbiámanënga tmojanatsatá. Cachcá Jesús chë beónaca tojanma, y ntšamo entsanga imoianbošcá tmojanatsatá.

<sup>12</sup> Nÿetscanga tmojanse y tmojtanoshachá ora, Jesús chabe uatsjédayënga tojanëyana: —Chë ojamnëtemënga šmochtsatbananga, tondaye nÿe cachcá ntjëftsonÿayama ca.

<sup>13</sup> As chënga tmojanatbaná, y chë tmojanse shachna cebada tandësentšana tojanójamëtemëngaca, bnëtsana uta sbarëcua tmojanajutjë.

<sup>14</sup> Chë entsanga quem bëts soye Jesús jamama tmojáninÿe ora tmojánayana: “Ndegombre quem boyabása, chë quem luaroye jabama Bëngbe Bëtsabe juabna jabóyebuambayama cha entsemna ca.”



15 Jesús yojtsetátšëmbo entsanga chëngbe rey jabemama imojtsebošama. Chíyeca cach tjoye tojtsaisanoñe canÿa jtsomñama.

*Jesús bėjaye juatsbuacá yojtsaye*

*(Mt 14.22-27; Mc 6.45-52)*

16 Tojanibétata ora, Jesusbe uatsjéndayënga chë uafjajónayoye tmojantsmá;

17 barquëshañe tmojtanenojayé, y tmojanontsé jenashbuachénguana, chca, Capernaumoca jen-bocnama. Ya ibeta yojtsemna, y Jesús cabá ndoñe chëngbioye ntashjanguana.

18 Chca imojtsenashbuachnëjuana orna, chë bėjayiñe jabuache binÿia tojanóshjango y bëts olëshënga chë barquëshoye yojtsójantšetaye.

19 Shachna o chnënguana kilómetro chënga tmojána ora, tmojáninÿe Jesús chëngbioye yojtsebéconaye, bėjaye juatsbuacá yojtsaye. Chënga chca tmojáninÿe ora tša tmojanocochauatjaná,

20 pero Jesús tojanéyana: “Atše sëndmëna; ndoñe matauatjëngana ca.”

21 Chora chë uatsjéndayënga oyejuayënga imojtseboše Jesús chë barquëshoye jofjana, y ndoñe bënëntscose ya chë imojtsaye luaroye tmojánashjajna.

*Entsanga Jesús tmojánguango*

22 Yëfsana, nÿetsca entsanga, chë uafjajónaye chenguánoica tmojanoquedanga tmojáninÿe, chë inÿe yëfsana chë nÿe canÿe barquësha yojuamnëshañe Jesusbe uatsjéndayënga tmojtsanoñama, y Jesús chëngaftaca ndoñe tonjánama.

<sup>23</sup> Pero chēntscuana, Tiberias pueblentšana inye barquëshangá tojanáshjajna canye luarentše, chē Bēngbe Utabná Jesús chabe Taitábioye tbojtanchuá chentšana, entšanga saná tmojanse luare béconana.

<sup>24</sup> Asna, ni Jesús ni chabe uatsjéndayēnga chentše ndoñe montsemnama chē entšanga tmojáninýe ora, chē barquëshangañe tmojtanenojayé y Capernaumoye tmojána Jesús jetsenguangama.

*Jesús, chē nyetsca tescama yomna tšabe vida jtse-bomnama tandēse*

<sup>25</sup> Chē uafjajónaye chenguánoye tmojánashjajna ora, Jesús tmojáninýena y mēntšá tmojantjá: —¿Buatēmbayá, ntseco ora muentše tcojášhango ca?

<sup>26</sup> Y Jesús tojanéyana: —Ndegombre cbéyana, tšēngaftanga ndoñe atše quešmatsngué, chē bēts soyēnga tijamama, sinó nýe chē jtoshachaye nyētšá tandēse šmojasama.

<sup>27</sup> Ndoñe matenángmenana chē nýe ndoñe bēn y jopochócana sanama; chē ndmopochócaye saná, chē nyetsca tescama yomna tšabe vida jtse-bomnama saná šmochjánguango. Chē saná, Bēngbe Bētsá Entšá tbojanbemá cmochanjátšataye, er Bēngbe Bētsá chē Taitá tonjinýanýé, tšabe soyēngaca, cha chábioye tbojuábuayanama ca —tojánayana.

<sup>28</sup> Chora chē entšanga tmojantjá: —¿Ndayá fch-jama ntšamo Bēngbe Bētsá yojtsebošcá chaotsemnama ca?

<sup>29</sup> Chca tmojantjá ora, Jesús tojanéyana: —Chē Taitá entseboše tšēngaftanga chabe ichmonábeñe chašmotsošbuáchema ca.

<sup>30</sup> Chora chënga tmojaníyana: —¿Ndaye tšabe soye cochjama acbe obenana bënga jinÿanÿiyama ca? Chë soye chaftsjinÿëse, ácebeñe fchantsošbuáchiye. ¿Bëngbiama taicochjama ca?

<sup>31</sup> Bëngbe tempsca bëts taitanga entšanga ndoyenoca maná ca uabaina saná tmojanse. Bëngbe Bëtsabe uabemana palabrénguiñe mëntsá endayana: “Cha celoca tandëse tonjanatšatá chamosama ca” —chënga tmojánayana.

<sup>32</sup> Chora Jesús tojanéyana: —Ndegombre cbëyana, Moisés chënga ndoñe chë celoca tandëse tonjanatšatá; Bëngbe Bëtsá Bëngbe Taitá chëngbioye tojanatšatá chë maná ca uabaina tandëse; y cha endmëna nda celocana chë ndocna te ndmopochócaye tandëse ndegombre cmondatsatná.

<sup>33</sup> Er Bëngbe Bëtsábiocana tandëse entsemna chë celocana tojastjanguá; y cha quem luare entšangbiama entsama chë nÿetsca tescama yomna tšabe vida chamotsebomnama ca —cha tojanéyana.

<sup>34</sup> Chora chënga tmojanimpadá: —Taita, chë tandëse sempre šcochtsatšatnaye ca.

<sup>35</sup> Y Jesús tojanéjua: —Atše sëndmëna entšanga chë nÿetsca tescama yomna tšabe vida jtsebomnama tandëse. Nda atše chašojtsëstona, sempre oyejuayá echanjëftsemna y Bëngbe Bëtsabe soyënga nÿets tempo echanjesóbomñe, mo nda nÿets tempo saná totsobomñcá, y ndocna te tbontsishëntsancá.

<sup>36</sup> Pero ntšamo ya tcbonjauyancá, tšëngaftanga atše šmonjinÿe y cabá ndoñe átsbeñe quešmatošbuaché.

37 Nda atšbe Taitá atšbiana tbojabocacá, cha atše šochantséstoná; y nda átšbioye šojtséstoná, átšbentsána quichtétábocna.

38 Er atšna celocana sēnjabo chē šojichmó cha ntšamo yojtsebošcá jamama, y ndoñe nýe ntšamo atše stsebošcá.

39 Y chē šojichmó cha entseboše, ni mo canya chē atšbiana tojabacacá chentšana, atše chailesenciá pochocaná chaotsemnama; y quem luare jopochócama tena, nýetscanga atšbiana tojábacacangbiana chámuatayenama atše chaimama.

40 Er atšbe Taitá entseboše, nda chabe Uaquiñábioye tbojinýe y chábeñe tojtsošbuaché, chē nýetsca tescama yomna tšabe vida chaotsebomna, y quem luare jopochócama tena, cha cháuatayenama atše chaimama ca —Jesús tojanéyana.

41 “Atše sēntsemna chē celocana tojóshjango tandēse ca” Jesús tojanéyana causa, chē judiēnga tmojanontsé chabiana podesca ichámuana.

42 Chēnga mēntšá imojtsichamo: —¿Mua ndoñe Jesús yondmēna, chē Josebe uaquiñá? Chabe bētsétsata bēnga tmotsábuatmñe. ¿Ntšamo cha mora yochjátichamo celocana tojástjango ca?

43 As Jesús tojanéyana: —Atšbiana ndoñe podesca matichámuana.

44 Ndocná quenátobena atše juastana, chē Taitá, chē šojichmó cha, ainaniñe chca chaotsebošama ndoñe tbonjuajabuáchēse; y atše chanjama cha cháuatayenama quem luare jopochócama te.

45 Chē tempsquēnga Bēngbe Bētsabe juabna oyebuambnayēnga mēntšá tmojanábema: “Cach Bēngbe Bētsá nýetscanga echanjabuatambá ca.”

Chcasna, nda atšbe Taitábioye tbojoyeuná, y ntšamo chë Taitá tbojabuatëmbacá tojuatsjinÿe, cha atše sochanjuasto.

<sup>46</sup> “Ndocná atšbe Taitá tbonjinÿe. Nÿe chë Bëngbe Bëtsábiocana tojabá aíñe.

<sup>47</sup> Ndegombre šcuayana: Nda átšbeñe tojt-sošbuaché, chë nÿetsca tescama yomna tšabe vida echántsebomna.

<sup>48</sup> Atše sëndmëna entšanga chë nÿetsca tescama yomna tšabe vida chamotsebomnama tandëse.

<sup>49</sup> Masque tšëngaftangbe bëts taitanga, entšanga ndoyenoca chë maná ca uabaina saná tmojanse, pronto tmojanóbana.

<sup>50</sup> Pero atše sëntsoyebuambná ndayá chë celocana tojóshjango tandëšama. Nda chë tandëse tojase, ndoñe queochatóbana.

<sup>51</sup> Atše sëntsemna entšanga chë nÿetsca tescama yomna tšabe vida jtsebomnama tandëse, chë celocana tojóshjanguëse. Nda quem tandëse tojase, nÿetsca tescama nÿe ainá echanjesomñe. Chë chanjátšataye tandëšna, cach atšbe cuerpo entsemna. Chca chanjama quem luare entšanga chë nÿetsca tescama yomna tšabe vida chamotsebomnama ca” —Jesús tojánayana.

<sup>52</sup> Chora chë judiënga tmojanontsé enatsëtsnayana: —¿Ntšamo cha yochjobenaye cachabe cuerpo jatšatayana bënga jasama ca?

<sup>53</sup> As Jesús tojanëyana: —Ndegombre šcuayana: Tšëngaftanga Bëngbe Bëtsá Entšá tbojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmochátsbomna.

<sup>54</sup> Nda atšbe cuerpo tojase y atšbe buiñe tojofsé, chë nyetsca tescama yomna tšabe vida echántsebomna, y quem luare jopochócama te atše chanjama cha cháuatayenama.

<sup>55</sup> Atšbe cuerpo ndegombre saná endmëna, y atšbe buiñe ndegombre ofšësnayiye.

<sup>56</sup> Nda atšbe cuerpo tojase y atšbe buiñe tojofsé, átseftaca cányiñe mo canyáca echántsemna, y átšnaca cháftaca.

<sup>57</sup> Atšbe Taitá, chë šojichmó cha, vida endbomna, y atše chábeyeca vida sëndbomna; cachcá, nda atšbe cuerpo tojase, chana átšbeyeca vida jtsebomnana.

<sup>58</sup> Chë ndaye soyama atše sëntsoyebuambná, atšbe cuerpo y atšbe buiñe, entsemna chë celocana tojóshjango tandëse. Masque tšëngaftangbe bëts taitanga chë maná ca uabaina tandëse tmojanse, pronto tmojanóbana; pero quem tandëse ndoñe cachcá quenátsmëna. Nda quem tandëse tojase, nye nyets tempo vida echanjesóbonñe ca — Jesús tojánayana.

<sup>59</sup> Chë soyëngna Jesús tonjanabuatambá Capernaum pueblentše, chë judiëngbe enefjuana yebnentše.

*Chë nyetsca tescama yomna tšabe vida jtsebomnana palabrënga*

<sup>60</sup> Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

61 Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsëtsnacá ndoñe tšabá cmontsëuenana ca?

62 Y chcasna, Bëngbe Bëtsá Entšá tbojanbemá, chë cha tempo inamna luaroye tojëtstsjuama šmojinÿese, ¿ntšamo šmattsejuabnaye?

63 Bëngbe Bëtsabe Espiritu entsama entsanga chë tšabe vida chamotsebomnama. Chë cuerpo ndoñe uámana soye quenátsmëna; chë tcbonjáuyana soyënguiñe entsemna chë Uámana Espiritbe uajabuáchenana y chë tšabe vida.

64 Pero masque chca entsemna, tšëngaftangbentšana banga átšbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entsanga jábuayenama Jesús tojanbojatsé orscana, cha inatátšëmbo ndëmuanÿenga chábeñe ndoñe mochanjanošbuáchiye, y nda chë uayayëngbe cucuatšinë yochjëftsayentšbashejuanana.

65 Y Jesús yojtëtóntša oyebuambnayana: —Chíyeca, atše tšëngaftanga tcbonjáuyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

66 Chë causa, chentšana, ba chabe ústonënga cachcá tmojesanonÿá, y cháftaca ya ndoñe imontsajna.

67 Chora Jesús, chë bnëtsana uta uatsjëndayënga tojanëyana: —¿Y tšëngaftángnaca, jtsoñama y atše jéseboshjonama šmojtseboše ca?

68 Chora Simón Pedro tbojanjuá: —Bëngbe Utabná Jesús, ¿chcasna ndábioye fchjanga ca? Nÿe

aca šcontsëtsëtsná chë nyetsca tescama yomna tšabe vida jtsebonnama palabrenga.

<sup>69</sup> Acbeñe fsëntsošbuaché, y mora fsëntsetatsëmbo aca chë Bëngbe Bëtsabe Uamaná comnama ca.

<sup>70</sup> Chora Jesús tojanëyana: —Atše tcbonjabacacá, chë bnëtsana útata; pero canya tšëngaftanguentsana, mo Satanasbe canye trabajacá entsemna ca.

<sup>71</sup> Judas Iscariote, chë Simonbe uaquiñabiamama chca Jesús tojánayana. Er chana masque canya chabe bnëtsana uta uatsjendayënguentsá inamna, Jesús uayayëngbe cucuatšinë yochjáftsayentšbashejuana.

## 7

*Jesusbe catšátanga chábeñe ndoñe montsanošbuaché*

<sup>1</sup> Chë soyënguentsana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse chá jóbama. Chíyeca, Jesús ndoñe yontseboše Judeoye jama.

<sup>2</sup> Chora, judiëngbe canye bëts fiesta semana yojtsobeco. Quem fiestënguentscuana, chë judiënga imojanamana tambënguiñe jtsiyenana.

<sup>3</sup> As chora Jesusbe catšátanga tmojanianana: —Muentše ndoñe catjoquéda; Judeoye motsa, choca condbomna ústonënga, ntšamo contsamcá chócna chaminýama.

<sup>4</sup> Er nda tojtseboše chamotsábuatmama, chabe soyënga ndoñe iytecana ntsamana. Aca bëts soyënga Bëngbe Bëtsabe obenánaca contsamësna,



motsa y n̄yetscangbe delante chca cochjama ca — chēnga tmojaniana.

<sup>5</sup> Er ni mo cach Jesusbe catsátanga chábeñe ndoñe montsanošbuaché. Chíyeca chēnga chca tmojaniana.

<sup>6</sup> Chora Jesús tojanējua: —Atšbe ora cabá ndoñe quentóshjango, pero tšēngaftangbiana mocna órnaca tšabá endětsomñe.

<sup>7</sup> Chē n̄ye quem luarama enójuabnaye entsanga ndoñe quemátobena tšēngaftanga jtsěbuayēnjana, pero átšbioyna aíñe, er atše puerte tšabá sěntsin̄yan̄ná n̄tsamo chēnga imojtsamcá ndoñe tšabá yontsemnama.

<sup>8</sup> Tšēngaftanga chē fiestama šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.

<sup>9</sup> Jesús chē soyēnga tojanējyana y cach Galileoca tojtsanoquedañe.

### *Chē tambēnguiñe jtsiyenama fiesta*

<sup>10</sup> Chabe catsátanga chē fiestoye tmojána chentšana, Jesúsna tojána, masque ndoñe entsángbeñe, sinó mo iytēcana cuenta.

<sup>11</sup> Chē fiestocna, judiēnga Jesús imojtsenguaye y imojtsichamo: —¿Ndayentše chē boyabása yojtsemna ca?

<sup>12</sup> Entšángbeñe ba soyēnga chabiana iytēcana imojtsichamo. In̄yēnga chabiana imojtsichamo: “Cha tšabia endmēna ca”; pero ín̄yēnga: “Cha entsanga entsángña ca”.

<sup>13</sup> Pero ndocná Jesusbiana becá añémoca yontsoyebuambná, chē judiēngbe amēndayēngbiana imojtsauatja causa.

14 Chë fiesta semana tsëntsañe yojtsó ora, Jesús Bëngbe Bëtsabe bëts yebnentše tojánamashëngo, y tojanontsé jabuátambana.

15 Chentše chë judiënga, ntšamo Jesús tojanabu-atambacá tmojanuena ora, ojnánänënga imojtsichamo: —Bëtscá ntjuatsjinýcá, ¿ntšamo nyëtšá nantsetátšëmbo ca?

16 As Jesús tojanéjua: —Atšbe buatëmbayana ndoñe nye átšbentšana quenatóbocana, ndayá chë šonjichmó chá bentšana.

17 Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe bu-atëmbayana Bëngbe Bëtsábiocana yóbocanama o nye átšbentšana.

18 Nda nye cachabe juábnaca tojtsoyebuambná, jtsebošana entšanga más bëtsá chamobemama; pero nda bëtscá tojtsama, chë tbojichmóbioye entšanga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseíngñayana.

19 “Ndegombre, Moisés tšëngaftangbiana ley tojëftsanaboshjona. Pero masque chca, tšëngaftanguentšá ndocná quenátama ntšamo cha tojëftsanmandacá. Y ¿ndáyeca šmojtseboše atše jóbama ca?” —Jesús tojanatjá.

20 Chora entšanga tmojanjuá: —¡Ndegombre aca bacna bayëjbe juabna contsambá! ¿Nda yojtseboše aca jóbama ca?

21 Chora Jesús tojanéyana: —Nyetsca tšëngaftanga ojnánänënga atše šmontsonýá, atše canýe ochnayté canýe entšá tijashnama.

22 Pero, Moisés tcmónjanamëndá bášetema base bobachtema chë más delicadentše jatëtšana,

chaotsinÿnama (ndoñe nÿe Moisésbeyeca chca, sinó Moisesbiamama más tempsca bÿets taitanga chca jamama imojanamánayeca); y tšëngaftanga canÿe básetema base bobachtema chë más delicadentše jatëtšana, masque chë te canÿe ochnayté totsomñëse.

<sup>23</sup> Y mora, ntšamo Moisés tcmojëftsanamëndacá ndoñe cachcá ntjonÿayama, canÿe básetema chca jatëtšana masque ochnayté; as, ¿ndáyeca atše šmojtsayaná, atše ochnayté canÿe entšabe nÿets cuerpo tijashnama?

<sup>24</sup> Nÿe batšá jinÿëse, ínÿengbiamama ndoñe matichámëngana tšabá o ndoñe tšabá tmonjama ca. Ntšamo chë soyënga ndegombre bëtsemnama natsana lempe tšabá jshétsetatšëmbëse, šmochjayana tšabá o ndoñe tšabá tmonjama ca —Jesús tojánayana.

*Jesús tojánayana ndëmocana cha tojánabama*

<sup>25</sup> Chora báseftanga Jerusalemoca oyenënga tmojanontšë ichámuana: —¿Mua ndoñe yontsemna chë jóbama montsenguá cha ca?

<sup>26</sup> Masque ba entšangbe delante entsoyebuambná, ndocná chábioye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámama Uabuayaná yojtsemna ca?

<sup>27</sup> Pero bënga mondétatšëmbo ndëmocá quem boyabása yomnana; y chë cuenta, chë Cristo chaojabo ora, ndocná queochátstatšëmbo ndëmocana cha yochjabama ca —chënga imojtsichamo.

<sup>28</sup> Chca tojanuena ora, Bëngbe Bëtsabe bÿets yebnentše Jesús yojtsabuátambayëntscuana,

cha jabuache tojánayana: —¡Tšëngaftanga šmojtsejuabná atše ndegombre šmabuatma, y ndémocana tijabama šmojtsetátšëmbo ca! Pero nÿe atšbe cuenta, ndoñe chiyátabo, ndayá canÿa šojichmóyeca, nda ntšamo ndegombre yomncá nÿetsca soyëngama endbétsoyebuambnaye; y tšëngaftanga cha ndoñe quešmatábuatma.

<sup>29</sup> Atšna aíñe cha sënduábuatma, er atše chábentšana sënjabo y cha quem luaroye šonjichmó ca —Jesús tojánayana.

<sup>30</sup> Jesús chca tojánayana ora, chënga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjánóshjango.

<sup>31</sup> Banga chentše Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiamá más tšabe soyënga yochjama ca?”

### *Chë fariseunga tmojánbošena Jesús jishachama*

<sup>32</sup> Chë fariseunga tmojántatsšëmbona ntšamo entšanga Jesusbiamá iytëcana imojtsencuéntaye. As, chënga y chë bachnangbe amëndayënga tmojanichamó báseftanga Bëngbe Bëtsabe bëtš yebnoca josticiënga, Jesús chamuishachama.

<sup>33</sup> Chora Jesús tojánayana: “Muentšana nÿe baseftayté tšëngaftangaftaca chanjëftsemna; chentšana, chë šojichmó chábioye chanjëtpadésa.

<sup>34</sup> Chora tšëngaftanga atše šmochántšenguaye, pero ndoñe quešmochátinÿena; y ndayentše chántsemnoca ndoñe quešmochatobenaye jashjanguama ca.”

35 Chora chë judiënga tmojanontsé entjanayana: “¿Ndëmoye quem boyabása yochjá, y bënga ndoñe mochanjobenaye jinÿenama ca? ¿Inÿe fshantsëngoye, judiënga tmojuashanëngbioye yochjá, y choca chë ndoñe judiënga yochjabuatambá?

36 ¿Ntšamo yojtsentsáyana cha šonjauyancá, chë ‘tšëngaftanga atše šmochántseguaye, pero ndoñe quešmochátinÿena; y ndayentše chántsemnoca ndoñe quešmochatobenaye jashjanguama ca?’ —chënga imojtsichamo.

### *Béjayënga vida bomniye*

37 Chë fiesta jopochócama te yojamna chë más uámana te. Chë te, Jesús entšángbentše tojantsá y jabuache tojánayana: “¿Nda tbojtsajuendá, átšbioye chauabo y chaofšé!

38 Ntšamo Bëngbe Bëtsabe uabemana palabrënguiñe endayancá: ‘Nda átšbeñe tojtsošbuaché, cha echántsemna mo ndabe ainanentsana vida bomna béjayënga tojtsobocancá.’ Chca echántsemna átšbeñe ošbuáchiyëngbiamama ca” —cha tojánayana.

39 Chë sóyeca, Jesús yojtseboše jayanana, chábeñe ošbuáchiyënga chë Uámana Espíritu mochjanóyëngacñe ca; er chë Uámana Espíritu cabá ndoñe tonjánabo, Jesús corente bëtsá yojamnama cabá ndoñe tmonjaninÿinÿé causa.

### *Nÿetsca entsanga ndoñe cachcá Jesusbiamama imontsejuabnaye*

40 Chca tmojanuena ora, ínÿënga imojtsichamo: —Quem boyabása ndegombre chë Bëngbe Bëtsabe

juabna oyebuambnayá entsemna, chë Cristbe nat-sana jabamá ca.

<sup>41</sup> Inyënga imojtsichamo: —Ndegombre cha chë Cristo, chë Uámana Uabuayaná entsemna ca.

Pero ínÿengna: —Ndoñe, er chë Cristo Galileo-cana ndoñe queochátabo.

<sup>42</sup> Ndegombre, Bëngbe Bëtsabe uabemana palabrënguiñe endayana, chë Cristna rey Davídbentsana entsá canmëna, y Belenocana caochjabo ca, cach puebllocana ndayentsá David inamna ca —chënga imojtsichamo.

<sup>43</sup> Y chca, ínÿengna Jesusbe pavor imojtsemna, y ínÿengna chabe contra.

<sup>44</sup> Inyënga imojtseboše Jesús jishachama, pero ndocná tbonjánishache.

*Chë amëndayënga Jesúsbeñe ndoñe montsanošbuaché*

<sup>45</sup> Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtanashjajna ora, tmojanatjá: —¿Ndáyeca ndoñe Jesús šmonjuánatse ca?

<sup>46</sup> Chora chë josticiënga tmojanëjua: —Ndocná quenatoyebuambná ntšamo chë boyabása ton-joyebuambacá ca.

<sup>47</sup> Chora chë fariseunga tmojanëyana: —¿Tšëngaftángnaca šmojalesenciá cha chac-maingñema ca?

<sup>48</sup> ¿Nderado bëngbe amëndayënguentsá o bënga fariseunguentšá nÿe mo canÿa chábeñe tajojt-sošbuaché?

49 Pero quem entšanga, ntšamo leyiñe iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

50 Chora Nicodemo, canya fariseunguentšá, chë Jesúseftaca jencuéntama ibeta tojana cha, tojanayana:

51 —Ntšamo bëngbe leyiñe endayancá, bënga ndoñe quemuátobena jayanana canye entšá castiganá jtsemnama ibojtsemna ca, cha cabá ntjeyenaycá, ndayá cha tojamama jtsetatsëmbuama ca.

52 Chora chënga Nicodemo tmojanjuá: — ¿Acnaca chábeñe cojtsošbuaché y mo canye Galileoca entšacá cojtsejuabná ca? Bëngbe Bëtsabe uabemana palabrënguiñe cochjuatsjinye, y cochanjinye ni canya Bëngbe Bëtsabe juabna oyebuambnayá Galileocana yochjabo ca.

### *Chë shema boyábioye ínñaftaca ingñayá*

53 Fariseunga y bachnangbe amëndayënga chë josticiëngbioye tmojanëcácanentšana, cada ona cachabe yebnoye imojtsatónënga.

## 8

1 Pero Jesusna canye tjoye, Olivos ca uabáinoye tojtsanoñe.

2 Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Njetsca entšanga tmojanobeconá jouenama, y Jesús tojanótbema y tojanontsé jabuátambama.

3 Chorna, báseftanga ley abuátambayënga y fariseunga tmonjánashjajna, y canye shembása tmojanëshjango. Chana tmojáninýena chabe

boyábioye ínÿaftaca ibnetsoíngñañëntscuana; nÿetscangbe tsëntsaca tmojanatsá,

<sup>4</sup> y Jesús tmojaniyana: —Buatëmbayá, quemuá fsënjínÿena chabe boyábioye ínÿaftaca bondëtsoíngñañëntscuana.

<sup>5</sup> Leyiñe Moisés šonjanamëndá mëntśá uamana shembásengna ndëtśbéngaca jtsëbáyama. ¿Aca ntšamo catjayana ca?

<sup>6</sup> Jesús chca tmojaniyana ana jisháchichiyama, chca chënga jtsebomnama ndáyeca chabe contra jayanana. Pero Jesús nÿe fshantsoye yojotsejbéna y yojóntśa ntšabuáfjaca fshantsiñe juabemama.

<sup>7</sup> Chënga nÿe imojtsetjanaye causa, Jesús tojantsbaná y tojanéyana: —Nda tšëngaftanguentśá tondaye bacna soyënga tondbomná, chaobojatśë ndëtśbeca jatëchënjama ca.

<sup>8</sup> Chentśana Jesús cachiñe fshantsoye yojtotsejbéna, y yojtëtóntśa fshantsiñe jtëtabemama.

<sup>9</sup> Chca tmojanuena ora, entśanga tmojanontśë canÿánÿa chentśana jésebocanana; natsana chë más bëtsanánënga y chë ínÿengna ústonoye. Canÿa Jesús tonjanoquedá y chë shembásanaca.

<sup>10</sup> As, Jesús tojtantsá y tbojantjá: — ¿Shembása, ndayentśe chë acbe contra ichámënga imojtsemna? ¿Ndocná acbiana tonjayana castiganá chacotsemna ca?

<sup>11</sup> Ndoñe, Taita, ndocná ca —chë shembása tbojanjuá.

Chora Jesús tbojaniyana: —Atśe cach ndoñe acbiana quichátayana castiganá chacotsemna ca. Morna, motsatoñe, pero ndoñe más bacna soye cattsama ca.



*Jesús yomna quem luarentša entsangbe juabna binñayá*

<sup>12</sup> Jesús cachiñe Bëngbe Bëtsabe bëts yebnentše yojtsabuátambaye, y entsanga mëntšá tojanëyana: —Atše sëndbínÿna quem luare entsangbe juabnënga. Nda atše chašojtsëstona, cha echantsiyena atše chë binñayáftaca; y ndoñe mo ibetiñcá queochátaye, y chca, tšabe vida echántsebomna ca.

<sup>13</sup> Chora chë fariseunga Jesús tmojanियana: —Aca nÿe cach acbiamá chca contsoyebuambná; chcana, chë ntšamo contsichamcá tondaye quenatámana ca.

<sup>14</sup> As chora Jesús tojanëjua: —Ntšamo cach atšbiamá sëntsichamcá aiñe entsámana, masque nÿe atše stsichamo ntšamo atšbiamá ndegombre yomncá. Er atše sëndëtatšëmbo ndëmocana tijabo y ndëmoye tstsá. Pero tšëngaftanga ndoñe chca quešmátstatšëmbo.

<sup>15</sup> Tšëngaftanga šmondbétsichamo ínÿengbiamá tšabá o ndoñe tšabá tmontsamama, chca, nÿe ntšamo entsanga mondbetsejuabnaycá. Pero atšna ndocnabiamá chca quetsátichamo.

<sup>16</sup> Atše ndoñe nÿe canÿa quetsátsmëna ínÿabiamá jayanama tšabá o ndoñe tšabá tontsamama; ndayá atšbe Taitá, chë šonjichmó cha, átšeftaca chca jayanana. Chíyeca, atše ínÿabiamá tšabá o ndoñe tšabá tonjama ca stsichamo ora, ntšamo stsichamcá ndegombre jtsemnana.

<sup>17</sup> Tšëngaftangbe leyiñe enduábemana, uta entsata ndayámnaca cachcá tbojayanëse, ntšamo chata tbojayancá puerte jtsámanana ca.

18 Y morna, atše séntŝichamo chë ntšamo cach atšbiama ndegombre yomncá, y atšbe Taitá, chë šonjichmó chánaca entsichamo ntšamo atšbiama ndegombre yomncá ca —Jesús tojánayana.

19 Chora chënga tmojantjá: —¿Ndayentše acbe Taitá yojtsemna ca?

Y Jesús tojanějua: —Tšëngaftanga ndoñe quešmatábuatma ni atše ni atšbe Taitá. Atše šmojšásábuatmësna, atšbe Taitánaca šmattsábuatma ca.

20 Bëngbe Bëtsabe bëts yebnoca, chë crocénana jacjayama luarentše yojtsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

*“Chë chanjá luaroye, tšëngaftanga ndoñe quešmatobena jama”*

21 Chora Jesús yojtétóntša oyebuambnayana: —Atše chantá, y chora tšëngaftanga atše šmochántŝenguaye. Masque chca, šmochanjóbana tšëngaftangbe bacna soyëngama ndëperdonánënga. Chë chanjá luaroye, tšëngaftanga ndoñe quešmatobena jama ca —Jesús tojánayana.

22 Chora chë judiënga tmojanontsé enatsëtsnayana: —¿Mo nderado yojtsejuabná jtsenóitanama, y chíyeca yojtsichamo chë cha yochjá luaroye bënga ndoñe montsobena jama ca?

23 Chora Jesús tojanéyana: —Tšëngaftanga quem luaroquënga šmondmëna; atšna tsbananocá, celocá sëndmëna. Tšëngaftanga nÿe quem luarama enójuabnayënga šmondmëna, pero atše ndoñe.

24 Chíyeca atše chca tcbonjáuyana, chë “tšëngaftangbe bacna soyëngama ndëperdonánënga šmochanjóbana ca”. Er, nda atše ndegombre bétsemnama ndoñe chašmontsošbuachese, tšëngaftangbe bacna soyëngama ndëperdonánënga šmochanjóbana ca.

25 Chora chënga tmojantjá: —¿As aca ndase cmëna ca?

Y Jesús tojanëyana: —Entšanga jabuátambama sënjanbojatsé orscana chama tcbonjáuyana.

26 Atše ba soyënga sëntsebmoma tšëngaftangbiamama jayanama, tšëngaftangbe contra jayanama; pero chë šonjichmó cha nyetsca soyëngama ndegombre endbétsichamo, y atšna ntšamo chábensana tijouencá, cachcá quem luare oyenënga sentsëtsëtsná ca —cha tojanëyana.

27 Pero chënga ndoñe tonjanësertá Jesús cachabe Taitabiamama chca tojanëyanama.

28 As Jesús tojanëyana: —Bëngbe Bëtsá Entšá tbojanbemá chašmojatsbaná ora, šmochántsetatšëmbo nda sëndmëná atše bétsemnama. Cachcá, tšëngaftanga šmochántsetatšëmbo, nýe cach atšbe juábnaca atše tondaye jamama sëndobenama. Nýe ndayá atšbe Taitá šojabuatiëmbacá atše sëndoyebuambná.

29 Y chë šonjichmó cha ndoñe nýe canýa quešnátsboshjuana. Chca endmëna, er atše sempre sëndbétsama ntšamo cha oyejuayá jabemama tojtsemncá ca —Jesús tojánayana.

30 Jesús chca tojánayana ora, banga chábeñe imo-jtsanošbuaché.

*Bëngbe Bëtsabe básenga y chë nÿe bacna soye jt-samama vida bomnënga*

<sup>31</sup> Chora Jesús, chë chábeñe imojtsošbuaché judiënga tojanëyana: –Ntšamo cbontsëtsëtsnacá tšëngaftanga sempre šmojtsamëse, ndegombre atšbe uatsjëndayënga šmochántsemna.

<sup>32</sup> Ntšamo ndegombre yomncá šmochántsetatšëmbo; y ntšamo ndegombre yomncá jtsetatšëmbëse, atsebácanënga šmochántsemna ca.

<sup>33</sup> Chora chënga tmojanjuá: –Bëngna Abrahámbentsana entšanga fsëndmëna, y ndocná ndocna te chešnáisishëche nÿe chabiamama nÿets tempo jtsoservénama. As, ¿ndáyeca šcojtsëtsëtsná bënga atsebácanënga fchtsemna ca?

<sup>34</sup> Chora Jesús tojanëyana: –Ndegombre šcuayana: Nda bacna soyënga tojtsama, cha nÿe bacna soyënga jamama juabnëngaca mandaná jëftsemnana.

<sup>35</sup> Canÿe oservená ndoñe nÿets tempo chë pamillentsá ntjëftsemnana, ntšamo canÿe uaquiñá sempre chë pamillentsá jesomñancá.

<sup>36</sup> Y chca, Bëngbe Bëtsabe Uaquiñá chacmojátsebacase, tšëngaftanga ndegombre atsebácanënga šmochántsemna bacna soyënga juabnënguentšana.

<sup>37</sup> Atše sëndëtatšëmbo tšëngaftangna Abrahámbentsana entšanga šmomnana; pero tšëngaftanga šmontseboše atše jóbama, ntšamo atše cbontsëtsëtsnacá ainaniñe jóyëngacñama ndoñe quešmátsboše causa.

<sup>38</sup> Ntšamo atšbe Taitábioca tijinÿcá, cach soyëngama atše sëntsoyebuambná. Tšëngaftángnaca,

cachcá ntšamo tšëngaftangbe taitábentsana šmojouencá šmontsama ca –tojaněyana.

<sup>39</sup> Chora chënga tmojanjuá: –Bëngbe uámana bëts taitá, Abraham endmëna ca.

As Jesús tojaněyana: –Tšëngaftanga Abrahambe básenga ca jtsabáinama merecido šmojtsebuajónëse, chë ntšamo Abraham tojëftsema y cachcá tšëngaftanga šmattsama.

<sup>40</sup> Atšna ntšamo ndegombre yomncá sëndoyebuambná, ntšamo Bëngbe Bëtsábentsana tsouenancá. Pero mora tšëngaftanga šmontseboše atše jóbama; Abraham ndocna te chca chenausobuachjanguá.

<sup>41</sup> Tšëngaftangna, ntšamo tšëngaftangbe taitá tojëftsemcá y cachcá jtsamana ca –Jesús tojánayana.

Chora chënga tmojanianyana: –Bënga nÿe enaquécana básenga ndoñe queftsátsmëna. Chë nÿe canÿe taitá fsëndbomná, Bëngbe Bëtsá endmëna cá.

<sup>42</sup> Chora Jesús tojaněyana: –Bëngbe Bëtsá ndegombre tšëngaftangbe taitá tojtsemnëse, tšëngaftangna atše šmattsebobonshana. Er atšna, Bëngbe Bëtsábiocana sënjabo y muentše sëntsemna. Nÿe atšbe ponto ndoñe chiyátabo; Bëngbe Bëtsá sonjichmó.

<sup>43</sup> ¿Ndáyeca tšëngaftanga ndoñe šmontsobena atšbe palabrënga josértana? Co, ntšamo cbontsëtsësnacá joyeunayama ndoñe quešmátsboše causa chca.

<sup>44</sup> Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama

cachá ntšamo cha tojtsebošcá. Quem luare jobojátšama orscana, Satanás entšá obanayá endmëna. Satanasbe juabnoca, ndocna tšabe soyënga ni ndegombre soyënga ntsebínýnana. Chíyeca, ndocna te cha ntšamo ndegombre yomncá ntsamana. Cha canýe bostero endmëna, y chábentšana nyetsca bostero soyënga jtsóbocanana. Chíyeca, cha tojtsebostero ora, nye ntšamo cachá yomnama jtsichámuana.

<sup>45</sup> Atšna sempre ntšamo ndegombre yomncá cbondutsëtsná; chíyeca, chë sentsichamo soyiñe tšëngaftanga ndoñe quešmatošbuaché.

<sup>46</sup> ¿Nda tšëngaftanguentšá nanjobenaye jinýanýiyana atše ndaye bacna soye tijamama? Y atše, nye ntšamo ndegombre yomncá stsichámëse, ¿ndáyeca chë tijayaniñe ndoñe šmontsošbuaché?

<sup>47</sup> Nda Bëngbe Bëtsabe entšá tomna, ntšamo Bëngbe Bëtsá tojtsichamcá jtsuenanana. Pero tšëngaftangna ndoñe Bëngbe Bëtsabe entsanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsošboše jouenama ca —Jesús tojanéyana.

*Cristo Abrahambiana más natsana ya yojtsemna*

<sup>48</sup> Chora chë judiënga tmojanianana: —Ajá, bënga co ndegombre fstsichamo, aca nye samaritano y bacna bayëjbe juabna uambayá comna ca fst-sichamo ora ca.

<sup>49</sup> Y Jesús tojanéjua: —Atše ni mo canýe bayëjbe juabna quetsatambá. Ntšamo atše sentsamcá, endmëna jinýanýiyama atšbe Taitá Bëngbe Bëtsá uamaná yomnama; pero tšëngaftangna, atše chca tsmënama ndoñe quešmatinýinýná.

50 Atše ndoñe quetsátsboše ínŷenga atše más uamaná chašmobemama. Pero inŷa endmëna; cha aíñe endboše atše bëtsá bëtsemnana chaminŷanyëma. Y chánaca endmëna chë ínŷengbiana tšabá o ndoñe tšabá tmontsamama endbetsichamuá.

51 Ndegombre šcuayana, nda ntšamo atše sëntsichamcá tojouena y chca tojama, ndocna te queochatóbana ca —Jesús tojánayana.

52 Chora chë judiënga tmojaniana: — Mora cocayé fsëntsetatšëmbo aca ndegombre bacna bayëjbe juabna uambayá comnana. Abraham tojanóbana, y cachcá, nŷetscanga Bëngbe Bëtsabe juabna oyebuambnayëngnaca. ¿Y mora aca cochjátichamo, “Nda ntšamo atše sëntsichamcá tojouena y chca tojama, cha ndocna te queochatóbana ca”?

53 ¿O aca, bëngbe bëts taitá Abrahambiana más bëtsá comna? Cha tojanóbana, y Bëngbe Bëtsabe juabna oyebuambnayëngnaca. ¿Ndase cojátsmëna ca aca cojatsjuabná ca? —chënga imojtsichamo.

54 Chora Jesús tojanëjua: —Atše nŷe cach atše más bëtsá stsenobiamnasna, chë soye tondaye nantsámama. Pero chë más bëtsá šojtsebianná cha, atšbe Taitá endmëna, cach ndabiana tšëngaftanga šmondbétsichamo tšëngaftangbe Bëtsá canmëna ca.

55 Pero tšëngaftanga cha ndoñe quešmatábuatma; atše aíñe. Y atše, “cha ndoñe quetsatabuatma ca” stsichámëse, átsnaca cach tšëngaftangcá canŷe bostero stsemna. Pero ndegombre atše cha sënduábuatma, y ntšamo cha tojtsichamcá, atše sëndouenana y cachcá sëndbétsama.

<sup>56</sup> Tšëngaftangbe uámana bëts taitá Abraham, chë atše jabama te jinýama yojtsejuabnaye ora, puerte oyejuayá yojtsemna. Y pronto tojéftsaninýe, y puerte tojanoyejuá ca —Jesús tojánayana.

<sup>57</sup> Chora chë judiënga tmojanianyana: —Aca cabá ndoñe shachna bnëtsana uata quecátsbomna; y as, ¿ntšamo cochjátichamo, Abraham tcojéftsinye ca?

<sup>58</sup> Chora Jesús tojanējua: —Ndegombre cbëyana, Abraham cabá ndoñe ainá quenjatsmëna ora, atše ya sënjëtsemna ca.

<sup>59</sup> Jesús chca tojanējua ora, chënga ndëtšbenga tmojanájaca cha jtsatëchënganjama. Pero Jesusna oitanánana, Bëngbe Bëtsabe bëts yebnentšana tojésanbocna.

## 9

### *Jesús tojanma, canýe boyabása jtaná onýnaná chabuabínýnama*

<sup>1</sup> Canýe luarējana yojtsachnëjuana ora, Jesús canýe boyabásabioye tbojáninýe. Chë boyabásana jtaná inónýna.

<sup>2</sup> Chë uatsjëndayënga Jesús tmojantjá: — Buatëmbayá, ¿ndáyeca quem boyabása jtaná inónýna? ¿Camuá bacna soyënga tojamama, o chabe bëtsëtsangbe bacna soyënga causa ca?

<sup>3</sup> Chora Jesús tojanējua: —Ni cachabe bacna soyëngama, y ni chabe bëtsëtsangbe bacna soyënga causa. Chca endmëna ndayá entsanga jinýanýiyama ntšamo Bëngbe Bëtsá yobencá.

<sup>4</sup> Cabá yojtsësháchena ora, šontsamna jamana ntšamo chë šonjichmó cha yojtsebošcá. Ndoñe



usháchena tempo echanjóshjango; chora ndocná tondaye jamama queochatobenaye.

<sup>5</sup> Quem luariñe chjëftsemnëntscuana, atše quem luare entsangbe juabnënga binÿnayá chanjëftsemna ca –tojanëyana.

<sup>6</sup> Chca tojánayanentšana, Jesús fshantsiñe tojanbuashëtjo, y chë yebuáyeca batsá ngüiche tojánbema, y chë jtaná chë ngüicheca tbojanbucharëtjo.

<sup>7</sup> Chora chë jtaná tbojanianyana: –Motsa y metsobúchjabebiye, chë binche uafjajónaye entsangbe pormániñe, Siloé ca uabáiniyoca ca. (Siloé, judiëngbe biyañe endayana “Ichmoná ca”).

Y chë jtaná tojána; choca yojetsobúchjabebiye, y yebnoye tojtaná ora, ya ibojtsabinÿna.

<sup>8</sup> Chë juachañe oyenënga y chë jtaná tempo lemošna otjanañana tmojáninÿënga, imojtsentjanaye: –¿Mua ndoñe yondmëna chë enjanamana jótbemana lemošna jótjañama ca?

<sup>9</sup> Inÿënga imojtsichamo: –Cha entsemna ca.

Y ínÿënga: –Cha ndoñe quenátsmëna, pero chacá entsábona ca.

Y cach shnaná yojtsichamo: –Atše cha sëndmëna ca.

<sup>10</sup> As chë entsanga tmojantjá: –¿Ntsamo chca mora cmojtsabinÿna ca?

<sup>11</sup> Y cha tojanëjua: –Chë boyabása, Jesús ca uabainá, ngüiche yebuáyeca tonjábema, šonjabucharëtjo y šonjauyana: “Motsa y Siloé uafjajónayiñe metsobúchjabebiye ca”. Chcasna, atše sënjá, sënjetsobúchjabebiye y cachora šontsabinÿna ca.

12 Chora chënga tmojantjá: —¿Ndayentse cha yojtsemna ca?

Y chana: —Atše ndoñe quetsátstatsëmbo ca — tojanějua.

*Chë jtana shnanábioye fariseunga imojtsetjanaye*

13 Chora chë entsanga, chë jtaná inamná fariseúngbioye tmojanánatse.

14 Chë Jesús batšá yebuáyeca ngüiche tojánbema, y chë jtaná tojanma te, canye ochnayté inamna.

15 As chë fariseunga chë boyabása tmojantjá: — ¿Ntšámoyeca mora cmojtsabinýna ca?

Chora cha tojanějua: —Cha ngüiche yebuáyeca tonjábema y šonjabuchanëtjo. Sënjetsobúchjabebiyé, y cachora šonjuabinýna ca.

16 As chora básefta fariseunga imojtsichamo: — Chë jtaná chabotsabinýnama tojamá ndoñe tonjochná, y ochnayté tojatrabajá. Chíyeca cha Bëngbe Bëtsabe entšá ndoñe quenátsmëna ca.

Inýenga imojtsichamo: —Cha canye bacna soyënga amá tojtsemnëse, ¿ntšamo nantsobena canye bëts soye Bëngbe Bëtsabe obenánaca jamama ca?

Y chca, ínýenga Jesusbe pavor imojtsemna, y ínýengna chabe contra.

17 Chama chënga cachiñe chë jtaná inamná tmojtëtantjá: —Er aca mora chacmotsabinýnama cha tojamëse, ¿chabiamama ntšamo catjayana ca?

Chora cha tojanějua: —Chana canya Bëngbe Bëtsabe juabna oyebuambnayá entsemna ca.

18 Pero chë judiënga ndoñe montsanošbuaché, cha chë jtaná inamna y chora ibojtsabinýnama.

As chënga, ínÿenga tmojanichamó chë boyabásabe bëtšëtsata jobiatšama.

19 Chë bëtšëtsata tbojánashjango ora, chë judiënga tmojanatjá: —¿Quem boyabása tsëndatbe uaquiñá yomna ca? ¿Ndegombre tašojtsichamo cha jtaná inonÿnama? Chcase, ¿ntšamo mora cha ibojtsabinÿna ca?

20 Chora chë bëtšëtsata tmojanějua: —Aíñe fsëndétatsëmbo cha bëndatbe uaquiñá endmënama y jtaná tonjanonÿnama.

21 Pero ndoñe queftsátstatsëmbo ntšámoyeca mora chca ibojtsabinÿnama, ni bëndatbe uaquiñá chabotsabinÿnama nda tojamama cach ndoñe. Cachá motjanga. Ya bëtšá entsemna, y cachá entsobena tšëngaftanga razón jatšatayama ca — chata tbojánayana.

22 Tempo, chë judiënga imojenóyeunaye, chëngbe enefjuana yebnënguentsána jtëbuacanana chë Jesús ndegombre chë Uámana Uabuayaná, chë Cristo yojamna ca tmojayanënga. Chë bëtšëtsatna chama ibojtsauatja;

23 chíyeca tmojanéyana: “Cha ya bëtšá entsemna. Cachá motjanga ca”.

24 As cachiñe chë judiënga chë jtaná inamná tmojanchembo y tmojanianyana: —Bëngbe Bëtsabe delante cach acbiana ndegombre mobuambá. Bënga fsëndétatsëmbo chë boyabása canÿe bacna soyënga amá yomnama ca.

25 Chora cha tojanějua: —Cha canÿe bacna soyënga amá o ndoñe tondmënama, atše ndoñe quetsátstatsëmbo. Atše nÿe mëntšá sëntsetatsëmbo: Atše jtaná sënjanmëna, pero mora šontsabinÿna ca.

26 Chora chënga cachiñe tmojatantjá: — ¿Ntšamo tcmënjama? ¿Ntšamo cha tënjama chacmotsabinÿnama ca?

27 Y cha tojanëjua: —Ya tcbonjáuyana y ndoñe chešmatoyeuná. ¿Ndáyeca cachiñe šmojtseboše jatuenama? ¿Tšëngaftágnaca šmojtseboše chabe ústonënga jtsemnama ca?

28 Chora chënga cha tmojtsanóyenguango y tmojaniyana: —Acna canÿe chabe ustoná cojtsemna, pero bënga ndoñe; bëngna Moisesbe ústonënga fsëndmëna.

29 Bënga fsëndëtatsëmbo, Bëngbe Bëtsá Moisésbioye tbojanatsëtsama, pero chë boyabásabiamá ndoñe queftsátstatsëmbo ni mo ndëmocana cha tojabama ca —chënga imojtsichamo.

30 Chora chë boyabása tojanëjua: —¿Ntšamo chca nántsemna! Tšëngaftanga ndoñe šmontsetátatsëmbo ndëmocana cha tojabama; pero chašuabinÿnama cha tonjama.

31 Bënga tšabá mondëtatsëmbo, bacna soyënga amënga Bëngbe Bëtsá ndoñe queondbátayaunanama. Chana, nÿe chábioye adorayá y ntšamo cha tojtsebošcá amábioye joyeunayana.

32 Quem luare jobojátšama orscana ndocna te quenaisótatsëmbo canÿe jtaná onÿnanabiamá ndánaca cha chabotsabinÿnama tojëftsemama.

33 Quem boyabása, Bëngbe Bëtsabe ichmoná chabe soyënga jamama ndoñe tontsemnëse, tondaye nantsobena jamama ca —chë entšá tojánayana.

34 As chë fariseunga tmojanianya: —¡Ndayá! Aca tcojanonýná orscana, corente bacna soyënga amá tcomnëse, ¿ntšamo mora bënga šcochjatabuatambaye ca?

Y chora chë judiëngbe enefjuana yebnentšana cha tmojtanáocna.

*Chë Bëngbe Bëtsabe soyëngama mo jtanëngá imomnënga*

35 Chë jtaná tmojtanáocnama Jesús tojanuena ora, tojana cha janguanguama. Tbojáninýena ora tbojanianya: —¿Aca Bëngbe Bëtsá Entšá tbojanbemábeñe quecojtsošbuaché ca?

36 Y cha tbojanjuá: —¿Taita, nda cha yojtsemna, as atše chábeñe jtsošbuáchiyama ca?

37 As Jesús tbojanianya: —Aca ya tconjinýe; chë ácaftaca entsoyebuambná cha entsemna ca.

38 Chora, chë boyabása Jesús bentše tojanoshamentšé jëtschuayama y tbojanianya: —Atšbe Utabná, aíñe sëntsošbuaché ca.

39 Chora Jesús chë entšanga tojanëyana: —Atše quem luaroye tijabo ndayá entšanga jinýanýiyama ntšamo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyënga atše chanjínýanýiye ora, mo jtanëna shnanëngá mochántsemna; y chë Bëngbe Bëtsabe soyëngama corente imotátšëmbo ca juabnayëngna chanjínýanýiye, nýe batšá Bëngbe Bëtsabe soyëngama imotátšëmbuama. Y chca, chënga, masna mo jtanëngá mochántsemna y ndoñe mo chë jinýama obenëngá.

40 Básefta fariseunga Jesúseftaca imojtsemnënga chca tmojanuena ora, cha tmojanianya:

—Ndegombre bënga ndoñe mo jtanëngcá queftsátsmëna ca.

<sup>41</sup> Chora Jesús tojanējua: —Tšëngaftanga Bëngbe Bëtsabe soyëngama ndëtatsëmbënga šmojtsemna ca, y ndegombre chë soyëngama ndoñe cmontsësertana ca šmojobuambase, ndayá šmojtsamcá Bëngbe Bëtsá mo bacna soyënga cuenta ndoñe queochátonyaye. Pero tšëngaftanga corente Bëngbe Bëtsabe soyëngama cmojtsësertana ca šmojtsichámësna, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca —Jesús tojanējyana.

## 10

### *Chë oveshënga abujējñya y chabe oveshënga*

<sup>1</sup> As Jesús tojanējyana: “Ndegombre šcuayana: Nda chë oveshëngbe luaroye bësáshajana ndoñe tonjámashëngo, pero aíñe inyájana tojtsamáshëngo, chana canyë atbëbaná y abacayá jtsemnana.

<sup>2</sup> Pero chë bësáshajana tojamashënguana, chë oveshënga anyëná jtsemnana.

<sup>3</sup> Chë bësásha ebtafjuaná, chë bësásha jebëtafjuana, y chë oveshënga abujējñya ntšamo cada ona tmabaincá chë oveshënga jáchembuana. Y chë oveshënga jtsetatšëmbuana chëngbe abujējñya yojtsachembuanama; y chë luarentšana cha jubuacnana.

<sup>4</sup> Nyetsca oveshënga tmojábocana ora, chë abujējñya chënga jtsebënatsanana, y chë oveshënga jtsëstonana, er chabe oyebuambnayana chënga joyátëmbana.

<sup>5</sup> Pero chë tmonduabuatmábíoyana chë oveshënga ndoñe ntjuastana; nÿe chábentshana jtsachetëngana, chë oveshënga chabe oyebuambnayana ndoñe ntjoyátëmbana causa ca” —Jesús tojánayana.

<sup>6</sup> Jesús entsanga chca tonjanacuntá, pero chënga ndoñe ntjosértana ntšamo yojtsentsayancá.

*Jesús, chë oveshënga tsabe abujajëña*

<sup>7</sup> As Jesús cachiñe tojanëyana: “Ndegombre cbëyana: Atše sëndmëna chë bësásha oveshënga mondbétsamashjuanëjana.

<sup>8</sup> Nÿetscanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbiöye ntjóaunayana.

<sup>9</sup> Atše chë bësásha sëndmëna. Nda quem bësáshajana tojamashënguá, atsbocaná echántsemna. Canÿe oveshá jamashënguana y jabocnana, y shácuana jónÿenana. Cachcá, chë quemëjana tojamashënguá, lempe echanjónÿena.

<sup>10</sup> “Chë atbëbaná jabana nÿe jatbëbama, jóbama y lempe jtsepochócama; pero atšna, entsanga vida chamotsebomnama y átšeftaca bëtscá tsabe vida chamotsebomnama tijabo.

<sup>11</sup> “Atše sëndmëna chë oveshënga tsabe abujajëña. Chë oveshënga tsabe abujajëña sempre jtseprontánana chëngbiana jóbana, chabe oveshënga ababuánÿeshanayeca.

<sup>12</sup> Pero nda nÿe crocenánama totrabája y chë oveshënga ndoñe chábënga tmontsemna, cha nderado tojinÿe canÿe tjañe queše chë oveshëngbiöye tojtsobéocnama, cachora nÿe cachcá jesëñyayana

y jtsachana. Chë tjañe queše oveshënga jtsacamiyana, y chë oveshëngna nÿe cátoye jtsachetana.

<sup>13</sup> Cha jtsemnana nÿe crocenánama trabajayá; chabiamana nÿe chë uacanámana más uámana soye jtsemnana, y chë oveshëngbiamana tondayana ntsentsamnana; chíyeca cha jtsachana.

<sup>14</sup> “Atše sëndmëna chë oveshënga tšabe abujänÿa. Atše chënga sëndëubuatma, y chëngnaca atše šmonduábuatma.

<sup>15</sup> Cachcá, chë Taitá Bëngbe Bëtsá atše šonduábuatma y atše chábioye. Atše sempre sëndétseprontana jóbanama, atšbe oveshënga sëndababuanÿeshánayeca.

<sup>16</sup> Atše inÿe oveshënga sëndábamna, pero chënga ndoñe quem luariñe oveshënga quemátsmëna. Atše šontsemna chëngnaca moye junatsana. Chëngnaca atšbe oyebuambnayana mochanjouena, y muentša oveshëngaftaca cánÿiñe mochántsemna, y atšna nÿetsca chë oveshëngbiamana chë abujänÿa chántsemna.

<sup>17</sup> “Atše siempre sëndétseprontana jóbanama, chora jtayenama. Chíyeca chë Taitá šondbobonshana.

<sup>18</sup> Ndocná atšbe vida quešochatsbojuána, pero chënga sëndababuanÿeshánayeca siempre sëndétseprontana jóbanama, cach atše chca sëndbošeyeca. Derecho sëndëtsóbonñe chëngbiamana jóbanama, y chora jtayenama. Chca endmëna ntsamo atšbe Taitá šonjamandacá ca” —Jesús tojánayana.

<sup>19</sup> Chë soyënga chë judiënga tmojanuena ora, cachiñe banga Jesusbe contra y ínÿengna Jesusbe pavor imojtsemna.



20 Banga imojtsichamo: –Chana bacna bayëjbe juabna uambayá y corente juicio ndbomná entsemna. Y as ¿ndáyeca cha mochjátsyeunana ca?

21 Pero ínÿengna imojtsanichamo: –Ndocna bacna bayëjbe juabna uambayá ntsoobenana chca jóyebuambayama. ¿Canÿe bayëja nantsobena jamama canÿe jtaná chabotsabinÿnama ca?

*Chë judiënga ndoñe imontsošbuáchiye Jesús Bëngbe Bëtsabe Uaquiñá bëtsemnama*

22 Canÿe uaftena tempo inamna, y Jerusalenentše canÿe fiesta imojtsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entšanga jtenójuaboyama.

23 Jesús Bëngbe Bëtsabe bëts yebnocá vojétsana, canÿe amashjuana otsbojebniñe, Salomonbe Amashjuana ca uabáinentše.

24 Chora, chë judiënga tmojanóbobuashcona, y tmojantjá: –¿Buetaytentscuana bënga fchjëftsemna acbiamá ndegombre soye ntsetatšëmbcá? Aca chë Cristo cojtsemnëse, chama lempe tšabá šmanÿanÿé ca.

25 As Jesús tojanëjua: –Ya tcbonjáuyana y tšëngaftanga átšbeñe ndoñe ntsošbuáchiyana. Chë atše sëndama soyënga, atšbe Taitá Bëngbe Bëtsabe obenánaca, cmontsinÿanÿná nda atše bëtsemnana.

26 Pero tšëngaftanga átšbeñe ndoñe quešmatošbuaché, er tšëngaftanga atše ndoñe quešmatëstona, ntšamo chë oveshënga chë tšabe abuañëñya mondbetsëstoncá.

27 Chë atše šmondústonënga, atše šmondbóyeunaye y šmondbëuasto. Atše chënga sëndëubuatma.

28 Atše chanjama, quem entsanga chë nyetsca tescama yomna tšabe vida chamotsebomnama; chënga ndocna te pochocánënga quemochátsmëna, y ndocná quenátobena átšbentsana chënga jefcana.

29 Atšbe Taitá Bëngbe Bëtsá, chë entsanga atše chašmuastama tojamá, nyetscangbiamá más bëtsá endmëna, chíyeca ndocná quenátobena chábentsana chënga jefcana.

30 Chë Taitá y atše canya fsëndmëna ca —Jesús tojánayana.

31 Chora, chë judiënga cachiñe ndëtsbënga tmojanájaca Jesús jtsatëchënganjama.

32 Pero Jesús tojanëyana: —Atše tsëngaftangbeñe, ba bëts soyënga sënjama atšbe Taitá Bëngbe Bëtsabe obenánaca. ¿Ndëmua chentša soyama atše šmochtsatëchënganja ca?

33 Chora chë judiënga tmojanjuá: —Ni canye quem bëts soyëngama bënga queftsátsboše aca jtsatëchënganjama. Aca Bëngbe Bëtsabiamá ndoñe tšabá quecátichamo; mo chábioye cuafjoyenguangcá entsemna. Aca nye canye entsá condmëna, pero acna contsichamo cach aca Bëngbe Bëtsá comna ca; chíyeca bënga fsëntseboše ndëtsbéngaca aca jtsatëchënganjama ca —chënga tmojanianya.

34 Chora Jesús tojanëyana: —Bëngbe Bëtsabe uabemana palabrenguiñe mëntsá endayana: “Atše sënjayana tsëngaftanga diosënga šmomna ca.”

35 Bëngbe Bëtsá chca tojánayana chë chabe palábraca y cha chamotseservénama tojánamandangbiama; ndocná quenátobena jinÿanÿiyana ni mo canÿe soye Bëngbe Bëtsabe uabemana palabrenguiñe, ndoñe ndegombre soye yomnama.

36 Y atšbiamá, Bëngbe Bëtsabiacá uabuayaná y quem luare ichmoná, ¿ntšamo tšëngaftanga šmojtsoyobena jayanama, “aca Bëngbe Bëtsabiamá ndoñe tšabá quecátichamo ca”, chë Bëngbe Bëtsabe Uaquiñá sëndmëna ca atše tijayanama?

37 Ntšamo atšbe Taitá endamcá atše ndoñe sentsamëse, tšëngaftanga átšbeñe ndoñe šmattsošbuáchiye.

38 Pero, ntšamo atšbe Taitá endamcá atše aiñe stsamëse, masque ndoñe átšbeñe šmontsošbuaché, nÿe chë Taitabe obenánaca soyënga tijamama šmochtsošbuáchiye. As, canÿe ora chašmotsetátšëmbo y chacmësertá, chë Taitá átšbeñe yomnama y atše chábeñe tsmënama ca —Jesús tojanëyana.

39 Chora chënga cachiñe tmojánbošena Jesús jishachama, pero cha chëngbentsana tojanots-bocá.

40 Chentšana, Jesús Jordán bėjaye chenguana tojesaná y choca tojtsanoquedañe. Chentše Juan tempo entšanga yojanëbáyana.

41 Ba entšanga tmojána Jesús jinÿama, y mëntšá imojtsichamo: “Ndegombre, masque Juan ni mo canÿe bëts soye Bëngbe Bëtsabe obenánaca tonjëftsema, lempe ntšamo quem boyabásabiamá tonjanoyebuambacá, ndegombre yojamna ca.”

42 Y chentše, ba entšanga Jesúsbeñe imojtsanošbuaché.

## 11

### *Lázaro tojanóbana*

<sup>1</sup> Inamna canye boyabása šocá, Lázaro ca uabainá. Cha inoyena canye pueblo Betania ca uabáinentše, Marta y Maríaftaca, chabe uabénata.

<sup>2</sup> Quem María inamna nda Bëngbe Utabná Jesúsbe shecuatšiñe botamana uanguëtsiye tbojanáshecbuešcja, y chabe stjénashaca tbojtanshecbojó cha.

<sup>3</sup> Chë uta uabénatna ínÿenga tmojanichamó Jesús jauenayama: —Bëngbe Utabná, chë aca cond-bobonshaná šocá entsemna ca.

<sup>4</sup> Jesús chca tojanuena ora, tojánayana: —Quem šocana ndoñe quenátsmëna Lázaro chaóbanama. Pero aíñe entsemna Bëngbe Bëtsabe obenana entšanga jinÿanÿiyama, y Bëngbe Bëtsabe Uaquiñá chamuatschuama ca.

<sup>5</sup> Jesús corente yojánababuanÿeshana Marta, María y chatbe uaftše Lázaro.

<sup>6</sup> Masque chcasna, Lázaro šocá yojtsemna ca Jesús tmojaniyana ora, cabá uta te más cha yojétsemna luarentše tojtsanoquedañe.

<sup>7</sup> Chentšana, chabe uatsjéndayënga tojanëyana: —Judeoye cachiñe cuajna ca.

<sup>8</sup> As chë uatsjéndayënga tmojaniyana: —Buatëmbayá, baseftayté entsemna chë luaroca judiënga cmonjanbuachetá ndëtsbéngaca jtšóbama; y mora, ¿cabá choye jtésama cojtseboše ca?

<sup>9-10</sup> Chora Jesús tojanëyana: —Bnëtsana uta hora bnëté endmëna. Nda bnëté tojtsana, ndoñe

ntjojéstjiana, binÿniñe bétsemnayeca. Cachcá átšeftaca endmëna, tondaye quenátopodena átšeftaca jopásana, atše jóbanama cabá ndoñe tonjobuache ora. Pero ibeta tojtsanëse, cha jtsojéstjiana, ndoñe binÿniñe causa. Cachcá, bënga šontsamna yojtsësháchenëntscuana jatrabájana. Atšbe jóbanama tempo chaojóshjango ora, ya ndoñe queochátëshachena jatrabájama ca —tojánayana.

<sup>11</sup> Chentšana tojanëyana: —Bëngbe amigo Lázaro tojtsomaná, pero atše choye chanjá jetsefšenama ca.

<sup>12</sup> Chora chë uatsjéndayënga tmojanjuá: —Bëngbe Utabná, tojtsomanase yojtsayana chana tšabá yochtsatsmëna ca.

<sup>13</sup> Pero Jesús yojtsanëtsëtsná ndayá Lázaro tojtsanóbana ca, y chabe uatsjéndayëngna imojtsejuabnaye Lázaro ndegombre yojtsomáñama.

<sup>14</sup> As Jesús tšabá tojanëyana: —Lázaro tontsóbana.

<sup>15</sup> Atše sëntsoyejuá choca atše ndoñe tsmënama, tšëngaftangbe tšabiama chaotsemnama; chca, tšëngaftanga más átšbeñe chašmotsošbuáchema. Pero cuajna cha jinÿama ca.

<sup>16</sup> Chora Tomás, chë Gemelo ca uabobainá, chë inÿe uatsjéndayënga tojanëyana: “Bëngnaca cuajna, cháftaca mochjóbona ca.”

*Jesús iuama entšanga chámuatayenama y chë nÿetsca tescama yomna tšabe vida chamotsebomnama*

<sup>17</sup> Jesús chë béconana tojánashjango ora, tojántatšëmbona Lázaro ya canta te uatbontsána yojtsemnama.

18 Betania pueblo yojamna Jerusalén béconana, mo unga kilómetroca.

19 Ba judienga tmojána Marta y María jautsëtsayama y jatjëmbabayama ndoñe tša ngménaca chabondëtsemnama, chatbe uaftše tojanóbana causa.

20 Jesús yojtsashjajuanama Marta tojántatšëmbona ora, tojánbocna cha jajëbenguama, pero María cach yebnentše tojanoquedá.

21 Chora Marta Jesúsbioye tbojaniyana: —Bëngbe Utabná, aca muentše macmënese, atšbe uaftše ndoñe matënjóbana.

22 Pero atše sëntsetatšëmbo, masque ndayánaca mora Bëngbe Bëtsá chacojotjañe, y cha lempe chca cmochjátšetaye ca.

23 Y Jesús tbojanjuá: —Acbe uaftše echántayena ca.

24 Chora Marta tbojaniyana: —Aíñe, atše sëndëtatšëmbo cha yochtayenama, pero quem luare jopochócama te, nÿetsca obanënga mochtayena ora ca.

25 As Jesús tbojaniyana: —Atše sëndmëna chë entšanga chámuatayenama y chë nÿetsca tescama yomna tšabe vida chamotsebmnama endamá. Nda átšbeñe tojtsošbuaché, masque chaóbana, echántayena.

26 Y nda cabá ainá totsomñe y átšbeñe tojtsošbuaché, ndocna te queochatóbana. ¿Chë cbontsatsá soyiñe quecojtsošbuaché ca? —Jesús tbojantjá.

27 Chora Marta tbojaniyana: —Aíñe, Bëngbe Utabná, atše ácbeñe sëntsošbuaché, aca chë Cristo,

chë Bëngbe Bëtsabe Uaquiñá y chë quem luaroye jabamá comnama ca.

*Jesús, Lázaro yojtsátbontsana cuevëshentše yojenóbošachna*

<sup>28</sup> Chca tojánayanentšana, Marta tojtaná chabe quenata María jachembuama, y iytëcana tbojaniyana: “Buatëmbayá tonjášjango y entseboše aca jinýama ca.”

<sup>29</sup> María chca tojanuena y cachora tojëftsanbocna y tojána Jesús jinýama.

<sup>30</sup> Jesús cabá ndoñe chë puebloye tonjánamashëngo; yojëtsemna Marta tbojanjébengo luarentše.

<sup>31</sup> Chë yebnentše imojtsemna judiënga, María tša ngménaca ndoñe chaondëtsemnama tjëmbambnayënga, tmojánbocana María juastama; er chë tojëftsantsbaná y tojëftsanbocna ora, chë judiënga imojtsejuabnaye, Lázaro yojtsátbontsana luaroye María yojtsaye, choca jošachnama ca.

<sup>32</sup> Jesús yojtsemnentše María tojánashjango ora, chábentše tojanoshamentšé y tbojaniyana: — Bëngbe Utabná, aca muentše macmënëse, atšbe uaftše ndoñe matënjóbana ca.

<sup>33</sup> María y cháftaca tmojánashhajna judiënga, nyëtscanga imojetsenóbošachiye; y Jesús chca tojáninýe ora, corente tbojancochtsetšena ypuerte ngménaca yojtsemna.

<sup>34</sup> Chora Jesús tojanatjá: —¿Ndayentše cha šmojuatbontsá ca?

Y chënga tmojanjuá: —Bëngbe Utabná, mabo y cochjinýe ca.

<sup>35</sup> Chora Jesús tojánenobošachna.

<sup>36</sup> As chë judiënga tmojánayana: —¡Minyënga, tša ibnabobonshana ca!

<sup>37</sup> Pero inyë judiënga imojtsichamo: —Chë jtaná chabuabínynama tojamá, ¿tondaye tonjobená jamama, Lázaro ndoñe chaondóbanama ca?

### *Lázaro tojtanyena*

<sup>38</sup> Jesús, cachiñe puerte cochtsetšenaná, chë uatbontsánoye tojanobeconá. Chë luarna cuevëshe inamna, y amashjuanentse canyë bëts ndëtšbeca yojtsatámena.

<sup>39</sup> Chora Jesús tojanëyana: —Chë ndëtšbé mojuánanga ca.

Chora Marta, chë obanabe uabena tbojanianyana: —Bëngbe Utabná, mora ya bacá yojtsonguëtšé, er ya canta te entsemna cha tontsóbana ca.

<sup>40</sup> Y Jesús tbojanjuá: —Ndegombre, ya tcbonjauyana, aíñe átšbeñe tcojtsošbuáchese, cochjinýe Bëngbe Bëtsá puerte obená y bëtsá bëtsemnama ca.

<sup>41</sup> Chora chë ndëtšbé tmojanjuaná; Jesús celoye yojontješiyey y Bëngbe Bëtsábioyey tbojanianyana: “Taita, cbatschuá atšbe opresido tcojouenama.

<sup>42</sup> Atše sëndétatšëmbo aca sempre šcondbëtseyeunanama; atše chca tcbonjauyana, muentšey montsemna entšangbey tšabiyama, chca, aca atšey šcojichmoma, chënga chamotsošbuáchema ca.”

<sup>43</sup> Chca tojánayanentšana, jabuache tojánayana: “¡Lázaro, chentšana matsbocna ca!”

<sup>44</sup> Y cachora chë obaná tojtanbocna, cucuatšënga y shecuatšënga entšëjuaca batsëcná, y chabe jubiá base entšëjuaca uamochëcyaná. As



Jesús tojanéyana: “Motsejafjoná y jama chaot-sobena ca.”

*Chë judiëngbe amëndayënga tmojanenoyeuná  
Jesúsbioye jóbama*

*(Mt 26.1-5; Mc 14.1-2; Lc 22.1-2)*

<sup>45</sup> Chë soyëngama, banga chë judiënguentshana, María jatjëmbabayama tmojánanga, y ntšamo Jesús tojanmcá tmojáninýënga, Jesúsbeñe imojtsošbuaché.

<sup>46</sup> Pero inýe judiënga fariseúngbioye tmojána, ntšamo Jesús tojanmama chënga jacúntama.

<sup>47</sup> As, chë fariseunga y chë bachnangbe amëndayënga tmojánenefjna inýe judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama.

<sup>48</sup> Nýe cachcá chamojonýase, nýetsca entsanga chábeñe mochantsošbuáchiye; chë romanëngbe amëndayënga mochanjabo y lempe mochantse-pochóca, Bëngbe Bëtsabe bëts yebna y bëngbe luare Israel ca —chënga imojtsichamo.

<sup>49</sup> Pero canya chënguentshá, Caifás ca uabainá, chë uata chë bachnangbe más uámana amëndayá inamná, tojanéyana: —Tšëngaftanga tondaye quešmátstatšëmbo.

<sup>50</sup> Y ndoñe quešmatsjuabná, tšëngaftangbiana más tšabá yojtsemna nýe canye boyabása Israe-loca entsangbiana chaóbana, y ndoñe nýets bëngbe luare chamotsePOCHOCÁ ca —cha tojanéyana.

<sup>51</sup> Pero Caifás chë soye nýe cachabe juábnaca ndoñe chca tonjánayana. Cha, chë uata chë bachnangbe más uámana amëndayá inámnayeca, Bëngbe

Bëtsabe Espiritbe obenánaca tojánayana Jesús ibo-  
jamna Israeloca entsangbiana jóbana ca.

52 Y ndoñe nÿe Israeloca entsangbiana, sinó  
chë inÿe luarënguiñe Bëngbe Bëtsabe básenga tmo-  
janáshanënga chamuatábama, as chca, nÿetscanga  
nÿe canÿe luarentša entsanga chamotsemnama.

53 Chcasna, cach tescana judiëngbe  
amëndayënga tmojanenoyeuná Jesús jóbama.

54 Chíyeca Jesús entsángbeñe, Judea luariñe ya  
ndoñe yontsana. Chë luarentšana tojéftsanbocna  
y canÿe luaroye tojtsanoñe, entsanga  
ndoyeniñe béconana, canÿe pueblo Efraín ca  
uabáinoe. Y chentše chabe uatsjëndayëngaftaca  
tojtsanoquedañe.

55 Judiëngbe Bashco fiestama batšá yojtsájamna,  
y ba entsanga pueblënguentšana Jerusalenoie  
imojtsajna, soyënga choca jamama ntšamo  
tempo inamncá, chca, Bëngbe Bëtsabe bominyama  
tšábenga jtsemnama, chë Bashco fiesta cabá  
ndobuache ora.

56 Chocna, judiënga Jesús imojtsenguaye, y  
Bëngbe Bëtsabe bëts yebnentše imojtsentjanaye:  
“¿Ntšamo šmojtsejuabná, cha tayochjabo o ndoñe  
quem fiestama ca?”

57 Chë fariseunga y chë bachnangbe  
amëndayënga tmojanmandá, nderado nda  
Jesús ndayentše tojtsemnama tojtsetatšëmbësna,  
chaobuambá ca, as Jesús jishachama.

## 12

*María, botamana uanguëtsiye Jesúsbeñe*

*tbojanáshecbuešcja**(Mt 26.6-13; Mc 14.3-9)*

<sup>1</sup> Chněnguana te chë Bashco fiestama yojtsájamna ora, Jesús Betania puebloye tojtaná. Lázaro, chë Jesús tbojtanayená cha, choca inoyena.

<sup>2</sup> Chentšna bëts saná Jesusbiana tmojanábua. Marta tojanëjuatšé, y Lázaro yojtsemna chë Jesúseftaca juasama mesëshañe imojtsetbiámanënguëntše.

<sup>3</sup> As María canye jarrëtema tojanaca; chiñe yojanaftsuamna canye botamana uanguëtšiyé, bëtscá uámaniye, ena nárdoca pormániye. Chë uanguëtšiyé, María, Jesusbe shecuatšënguñe tbojanáshecbuešcja, y cachabe stjënashaca tbojtanshechojó. Chora, chë yebnentše ena nardiayana yojtsonguëtšiyé.

<sup>4</sup> Chora, canya Jesusbe uatsjendayënguëntšá, Judas Iscariote, chë Jesús uayayëngbe cucuatšíñe yochjanayentšbashejuaná, tojánayana:

<sup>5</sup> —Quem botamana uanguëtšiyé unga patse denario crocénana enduámana. ¿Ndáyeca ndoñe šmonjuiye y ndbomnjémënga chë crocénana mašmëntsatsatá ca?

<sup>6</sup> Pero Judas chca tojánayana, chë ndbomnjémëngbeñe ntsejuabnaycá, sinó cha atbëbaná inamna causa. Judas chëngbe crocénana shecnëšiñe yojánatbëna, y ba soye, chë shecnëšoye imojanatsuáma crocenánentšana cha yojánatbëbana.

<sup>7</sup> As Jesús tbojanjuá: —Cachcá monyá. María mëntscoñe chë botamana uanguëtšiyé iuabofjájona, cha jobenayama átšbeñe jabuéšcjama, er ndoñe bën y atše šmochanjaitëme.

<sup>8</sup> Chë ndbomnjémëngna tšëngaftangbeñe sempre mochanjesomñe, pero atše ndoñe ca –tojánayana.

*Judiënga tmojanenoyeuná Lázaro jóbama*

<sup>9</sup> Ba judiënga tmojántatsëmbona Jesús Betanioca yojtsemnana, y choye tmojána, ndoñe nýe Jesús jinýama, sinó Lázarnaca, chë Jesús tbojtanayená cha.

<sup>10</sup> As chë bachnangbe amëndayënga tmojanenoyeuná Lázarnaca jóbama.

<sup>11</sup> Chabe causa, ba judiënga chëngbioye cachcá tmojesanëñya y Jesúsbeñe imojtsošbuaché.

*Jesús Jerusalenoye tojánashjango*

*(Mt 21.1-11; Mc 11.1-11; Lc 19.28-40)*

<sup>12</sup> Chë yëfsana, mallajta entšanga, Jerusalenoca fiestama tmojánashjajnënga, tmojántatsëmbona Jesús choye yochjánashjanguama.

<sup>13</sup> As chëngna palma betiye buacuafjënga tmojanatëtsetše, y Jesús jajëbenguama tmojánbocana, y mëntsá imojtsáyebuache: “¡Bëngbe Bëtsá matschuanga! ¡Corente bendición bomná chë Bëngbe Utabnabe obenánaca tojabá! ¡Corente bendición bomná chë Israeloquëngbe Rey ca!”

<sup>14</sup> Jesús canýe burrotema tbojáninýena y chábeñe tojanenoyayé. Ntšamo Bëngbe Bëtsabe uabemana palabrënguiñe iuayancá, cachcá tojanopasá. Chiñe mëntsá endayana Jerusalenoca entšangbiama:

<sup>15</sup> Sión bëts puebloca oyenënga, ndoñe matau-atjëngana.

Minýënga, tšëngaftangbe Rey burrotémiñe enjaquená entsabó ca.

16 Chca orna, Jesusbe uatsjédayënga chë soyëngama ndoñe tonjanësertá; pero chentsana, Jesús corente bëtsá yomnama Bëngbe Bëtsá tojaninÿanÿé ora, chë uatsjédayënga chama tmojanenojuabó, lempe ntšamo Bëngbe Bëtsabe uabemana palabrenguiñe iuayancá y cachcá Jesúseftaca tojanopasama.

17 Chë Jesúseftaca imojtsemna entsanga, Lázarbioye uatbontsánoye tbojanchembo ora y chentsana tbojtanayená ora, ntšamo tmojáninÿama chora imojtsecuëntaye.

18 Chíyeca, ba entsanga tmojánbocana Jesús jajébenguama, chë bëts soye Bëngbe Bëtsabe obenánaca cha tojanmama tmojanuénayeca.

19 Pero chë fariseunga imojtsenatsëtsnaye: “Tšëngaftanga šmontsonÿá bënga tondaye jamama quemuátobenama y más, inÿetscanga cha montsëstona ca!”

*Básefta Grecia luaroca entsanga Jesús tmojánquango*

20 Bashco fiestama, chë Bëngbe Bëtsá jadórama Jerusalenoye tmojánangbeñe, básefta griego entsángnaca imojtsemna.

21 Chëngna, Felipe chë Galilea luarocá, chë Bet-saida pueblócábioye, tmojanobeconá y tmojanimpadá: “Señor, bënga fsëntseboše Jesús jinÿama ca.”

22 Chora Felipe tojána Andrés jauyanama, y chë útatna Jesúsbioye tbojána, chë grieguëngbiama jaue-nayama.

23 Jesús chata tojanëyana: “Chë Bëngbe Bëtsá Entšá tbojanbemá corente bëtsá yomnama jinÿanÿiyama te ya tocjobuache.

<sup>24</sup> Ndegombre šcuayana: Canye trigo jénaye ndoñe fshantsiñe tmonjuatbontsá y ndoñe tonjóbanese, nye cach canye trigo jénaye jesomñana. Pero tmojuatbontsá y tojóbanase, bētsá jashájonana.

<sup>25</sup> Cachcá, nda nye cachá tojtsenóbobonshana, cha chabe vida echanjēftsobuetše. Pero nda nye cachá ndoñe tontsenóbobonshana y ntšamo atše stsemandacá, quem luariñe vida tojtsebomnēntscuana cha tojtsamēse, chē nyetsca tescama yomna tšabe vida echántsebomna.

<sup>26</sup> Nda ntšamo stsemandacá jamama tojtseboše, atše chašotsēstona. Chca, ndayentše atše chaitsemna, chánaca, chē atše oservená, chentše chaotsemna. Atše šojtseservénabiama, atšbe Taitá Bēngbe Bētsá echanjínyanýie bētsá yomnama ca” —Jesús tojánayana.

### *Jesús tojánayana cha yochjanóbanama*

<sup>27</sup> Y más Jesús tojánayana: “¡Mora tša cochtsetšenaná sēntsemna! ¿Atše chjayana: ‘Taita, chē átšeftaca echanjopása soyēnga šmotsebojuaná ca?’ Ndoñe; er más chama atše quem luaroye tijabo.

<sup>28</sup> Taita, šminyanýé aca puerta bētsá y obená comnama ca.”

Y cachora, celocana canye oyebuambnayana tojanóbocna mēntšá: “Ya tcbonjínyanýé atše puerta bētsá y obená tsmēnama, y mora cachiñe cachcá chanjama ca.”

<sup>29</sup> Entšanga chca tmojanuena ora, ínýenga imojtsichamo nye tojanjuésase ca; pero ínýengna imojtsichamo: —Canye ángel chábioye tbonjuatsētsá ca.

30 Chora Jesús tojaněyana: –Ntšamo šmonjouencá, atšbiamana ndoñe quenátsměna, sinó tšěngaftangbiamana.

31 Mora chě tempo entsemna, chě quem luare entšanga tmojěftsema bacna soyěnga jiněyaněiyama y chěngbe castiguama jayanama. Y mora, chě něyetsca bacna soyěnga mandayá, quem luarentšana mochantábocna.

32 Pero atše fshantsocana atsbananá chaitsemna ora, něyetsca entšanga átšbioye chanjúbuaja ca –Jesús tojánayana.

33 Chca cha yojtsichamo, ana jiněyaněiyama ntšamo jóbanama ibojamnana.

34 Chora chě entšanga tmojanjuá: –Běngbe Bětsabe uabemana palabrěnguiñe endayana, y chíyeca běnga fsěndětatsěmbo chě Cristo něyetsca tescama vida yochtsebomna ca. As, ¿ndáyeca cojtsichamo, Běngbe Bětsá Entšá tbojanbemá chamuatsbanama yojtsemna ca? ¿Nda yojtsemna Běngbe Bětsá Entšá tbojanbemá ca? –chěnga imojtsichamo.

35 Y Jesús tojaněyana: –Něe baseftatescama chě entšangbe juabněnga biněynayá tšěngaftangbeñe entsemna. Chě biněynayá cabá tšěngaftangbeñe yojtsemněntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe biněniñe tojtsana, cha ndoñe ntsetatsěmbuana nděmuajana yojtsana.

36 Chě biněynayá cabá tšěngaftangaftaca endětsemněntscuana, chábeñe šmochtsošbuáchiye; as, tšěngaftangbe juabněnga biněniñe echántsemna ca –Jesús tojánayana.

Chë soyënga tojánayanentšana, Jesús tojtsanoñe y entšangbiama yojetsóitana.

*Ndáyeca chë judiënga Jesúsbeñe ndoñe montsanošbuaché*

<sup>37</sup> Masque Jesús, judiëngbe delante ba bëts soyënga Bëngbe Bëtsabe obenánaca tojëftsema, chënga ndoñe chábeñe ntsošbuáchiyana,

<sup>38</sup> ntšamo Bëngbe Bëtsabe juabna oyebuamb-nayá Isaías tojanabemcá, cachcá chaotsemnama. Isaías mëntšá tojánayana:

Bëngbe Utabná, ¿nda bëngbe buayenana soyiñe yojtsošbuaché?

Y ¿nda tbojosertá, acbe obenana tcojinýinyé ora ca?

<sup>39</sup> Chíyeca chënga ndoñe montsobena Jesúsbeñe jtsošbuáchiyama, er Isaías mëntšánaca tojëftsanabema:

<sup>40</sup> Bëngbe Bëtsá tojama chënga chabe soyëngama ndoñe botamana chamondëtsejuabnama y chabe soyënga ainaniñe ndoñe chamondóyëngacñama, as ndoñe chaondëtsësertánama ca.

Y Bëngbe Bëtsá entsichamo: “Chca entsemna, chënga atšbe benache ndoñe chamondishachama,

y atše ndoñe ntjátsebacama;

y chca, chënga mochántsemna mo ndëshnana entšangcá ca.”

<sup>41</sup> Isaías chca tojánayana, er tojáninye Jesús puerte bëtsá y obená yojannama, y chca chë uabemaniñe Jesusbiama yojanoyebuambná.

<sup>42</sup> Pero masque chca iuábemanëse, ba judiënga imojtsanošbuaché, y banga judiëngbe



amëndayëngnaca Jesúsbeñe imojtsanošbuaché. Pero chëngna, Jesúsbeñe imojtsošbuáchema entšángbeñe ndoñe montsichamo. Chca imojánama chë fariseungbiana auatja causa, chë judiëngbe enefjuana yebnënguentsana ndoñe chamondëtëbuacnama.

<sup>43</sup> Chëngbiana más yojanámana, entšanga chëngbiana chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

*Jesube palabrëngaca yochtsótatšëmbo entšanga tšabá o ndoñe tšabá tmonjamama*

<sup>44</sup> Chora Jesús mëntšá jabuache tojánayana: “Nda átšbeñe tojtsošbuaché, ndoñe nÿe átšbeñe ntsošbuáchiyana; chë nda šojichmó chábeñnaca cha jtsošbuáchiyana.

<sup>45</sup> Cachca, nda atše šojtsonÿá, chë šojichmó chábioynaca cha jtsonÿayana.

<sup>46</sup> Atše quem luaroye tijabo entšangbe juabnënga jacobínÿnama, chca, nda átšbeñe tojtsošbuaché, mo ibetiñcá ndoñe chaondëtsemnama.

<sup>47</sup> Pero nda atšbe soyëngama tojouena, pero ntšamo sentsichamcá ndoñe tontsama, atše chabiama ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentša entšanga tmojamama tšabá o ndoñe tšabá yontsemna ca jatichámuama; quem luaroye sënjabo ndayá chënga jabátsebacama.

<sup>48</sup> Nda atše šojtsaboté y atšbe palabrëngama ndoñe šonjoyeuná, ya entsebomna nda chabiana yochjayana bëts castigo jtsebomnama ibojtsemna

ca. Atše tijanoyebuambá palabréngaca, quem luare jopochócama te chabiamá chca echántsayana.

<sup>49</sup> Er atše ndoñe nýe atšbe juábnaca quetsatoyebuambná. Chë Taitá, chë šonjichmó cha, šonjamandá ntšamo jayanana y ndayá jabuátambana.

<sup>50</sup> Atše sëndétatšëmbo, atšbe Taitá tojamandá orna, cha jamándana entšanga chë nýetsca tescama yomna tšabe vida chamotsebomnama. Chíyeca, ndayá sentsichamcá, endmëna ntšamo atšbe Taitá Bëngbe Bëtsá šojamandacá ca” —Jesús tojánayana.

## 13

### *Jesús chabe uatsjéndayënga tojanashecjabebé*

<sup>1</sup> Bashco fiesta cabá ndobuache ora, Jesús yojtsetátšëmbo chabe tempo tojanóshjanguama, quem luarentšana jëftsebocnama y chabe Taitábioye jtama. Ntšamo Jesús chábenga yojanababuanýeshancá, chë quem luare imojamnënga, chórna yojtseboše chë bëts bonshánana puerte más jinýanýiyana.

<sup>2</sup> Pero Satanás, Júdasbe ainaniñe bacna juabnënga tojanajó, uayayëngbe cucuatšiñe Jesús jayentšbáshejuanama. Judas Iscariote, Simonbe uaqiñá.

<sup>3</sup> Jesús yojtsetátšëmbo chabe Taitá Bëngbe Bëtsá nýets obenana tbojánatšetama. Cachcá, Jesús yojtsetátšëmbo, Bëngbe Bëtsábicana cha tojánabama y cachábioye jtama ibojtsemnama.

<sup>4</sup> Chcasna, chë ibeta jasama tmojanpochocá ora, mesëshentšana tojantsbaná, chabe juatsboye

uichëtjoníya tojanenátsejca y canýe tuallëjuca tojanenasná.

<sup>5</sup> Chentshana, canýe bachešiñe búyeshe tojanbuešcja y tojanontsé chabe uatsjédayënga jushecjabebiyana y jtéshechojuana cha vojtsasnana tuallëjuaca.

<sup>6</sup> Pero, Simón Pedro tbojanobuache ora, Jesúsbioye tbojaniyana: —Atšbe Utabná, ¿aca šcochjuashecjabiá ca?

<sup>7</sup> Chora Jesús tbojanjuá: —Atše séntsama soye mora ndoñe quecmátësertana; pero más chcoye aíñe cmochanjosérta ca.

<sup>8</sup> As Pedro tbojaniyana: —¡Ndocna te šcatjuashecjabiá ca!

Pero Jesús tbojaniyana: —Ndoñe chacbonjuáshecjabese, atšbia ndoñe quecochátsmëna ca.

<sup>9</sup> Y Simón Pedro tbojaniyana: —¡Atšbe Utabná, as nýe atšbe shecuatšënga ndoñe, ndayá atšbe cucuatšënga y bestšášnaca ca!

<sup>10</sup> Pero Jesús tbojanjuá: —Nda bebená tojtsemna, nýe shecuatše jtsashecjabiamajtsajabótana, ndoñe nýetšá cachiñe. Nda tojtsobebé, ndoñe tsengá ntsemnana. Cachcá, mo bebënënga cuenta tšëngaftanga šmontsemna; pero canýa muentše entsemna, y cha mo bebenacá ndoñe quenátsmëna.

<sup>11</sup> Jesús yojtsetátšëmbo nda chë uayayëngbe cucuatšíñe boshjuaná yochtsanmënama, chíyeca tojánayana: “Tšëngaftanguentšá canýa entsemna, cha mo bebenacá ndoñe quenátsmëna ca”.

<sup>12</sup> Jushecjabebiyama tojanpochocá ora, chabe juatsboye uichëtjoníya tojtaníchëtjo, y mesëshentše tojtanótbema. Chora tojanëyana:

—¿Chë tcbonjábiamá soyama quecmojsésertana ca?

<sup>13</sup> Tsëngaftanga atše šmondbauyana Buatëmbayá y Bëngbe Utabná ca; tšabá chca šmonsichamo, er atše ndegombre chca sëndmëna.

<sup>14</sup> Atše, tsëngaftangbe Buatëmbayá y Utabná, tcbonjushecjabebé; chcasna, tsëngaftángnaca cmontsamna jenášhecjabebiyana.

<sup>15</sup> Ntšamo quem sóyeca tcbonjanÿanÿecá, tsëngaftanga cachcá šmochtsama.

<sup>16</sup> Ndegombre šcuayana, chë oserverná chabe nduiñbiamá ndoñe más uamaná ntsemnana. Cachcá, chë ichmoná chë tbojichmobiamá ndoñe más uamaná quenátsmëna.

<sup>17</sup> Quem soyënga chašmojuatsjinÿe y chca chašmojamëse, tsëngaftanga puerte oyejuayënga vida šmochanjëftsebmna.

<sup>18</sup> “Atše sëndëtatšëmbo chë tijábacacangbiamá, chíyeca atše nÿetscangbiamá ndoñe chca quetsatoyebuambná. Y ntšamo Bëngbe Bëtsabe uabemana palabrenguiñe endayancá cachcá chaotsemnana, chë ‘canÿa átšeftaca tandëse tonjasá, atšbe contra echántsemna ca’, cachcá echanjopása.

<sup>19</sup> Mora, cabá ndoñe chca tonjopasá ora, lempe chë soyënga sentsichamo. As, chca chaojopasá ora, átšbeñe šmochantsošbuáchiye, y as šmochántsetatšëmbo atše tsmëna chë nda sëndmëná.

<sup>20</sup> Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chë nda šojichmóbioye bochanjofja ca” —Jesús tojánayana.

*Jesús tojánayana uayayëngbe cucuatšïñe Judas bochjãnboshjonama*

*(Mt 26.20-25; Mc 14.17-21; Lc 22.21-23)*

<sup>21</sup> Chë soyënga tojánayanentšana, Jesús corente cochtsetšenaná yojtsemna, y tojánayana: — Ndegombre šcuayana, canya tšëngaftanguentšá uayayëngbe cucuatšïñe šochanjáboshjona ca.

<sup>22</sup> Chora, chabe uatsjëndayënga tmojanontšé enonÿinÿnayana, y ndoñe montsetátšëmbo ndabiama Jesús chca tojánayanama.

<sup>23</sup> Canye uatsjendayá, chë Jesús puerte ibn-abobonshaná, Jesusbe juachaca inatbemana.

<sup>24</sup> As, Simón Pedro chábioye tbojánefjatšëmbo, ndabiama Jesús chca tojánayanama Jesúsbioye chabotjama.

<sup>25</sup> Chë puerte bonshana uatsjendayá, Jesúsbioye batšatema más tojanosjoná y tbojantjá: —Bëngbe Utabná, ¿nda cha yojtsemna ca?

<sup>26</sup> Chora Jesús tbojanjuá: —Atše canye base tandëtema chanjafchécuacuaye y ndábioye chajoyé, cha entsemna ca.

As Jesús canye base tandëtema tojanfchecuacuá, y Judas, Simón Iscariotbe uaquiñábioye, tbojanoyé.

<sup>27</sup> Tandëse tojanóyëngacñe y cach ora, Satanás Júdasbe ainaniñe bacna juabnënga tbojáncochëngo. As Jesús tbojaniana: “Chë cochanjama soye, cam ora moma ca.”

<sup>28</sup> Pero ni canya chë jasama imojtsetbiamanënguentsá tbojanësertá, ndayama Júdasbioye chca tbojanianama.

<sup>29</sup> Judas inamna chëngbe crocénana shecnëšïñe uambayá; chíyeca ínÿenga tmojanjuabó Jesús

chca ibojtsatsaye, ana ndayá yojtseita soye chë fiestama chauabuámiyama, o ndbomnjémënga ndayánaca chauatšatama ca.

<sup>30</sup> Júdasna chë base tandëtema tojanóyëngacñe, y cachora chentsana tojëftsanbocna. Chora ya ibeta yojtsemna.

### *Chë tsëm mando*

<sup>31</sup> Judas tojëftsanbocnentsana, Jesús tojánayana: —Ora tojjobuache, Bëngbe Bëtsá Éntšá tbojanbemá corente bëtsá y obená yomnama jinÿanÿiyama; y mua echanjínÿanÿiye Bëngbe Bëtsá corente bëtsá y obená yomnama.

<sup>32</sup> Cha echanjínÿanÿiye Bëngbe Bëtsá chca yomnama, chíyeca Bëngbe Bëtsánaca echanjínÿanÿiye corente bëtsá y obená yomnama, y mora entsemna chë ndaye ora Bëngbe Bëtsá chca chabiamama yochjínÿanÿiye.

<sup>33</sup> Atšbe básenga, baseftatescama tšëngaftangaftaca sëntsemna. Chora šmochántsenguaye, pero ntšamo judiënga sënjauyancá, mora cachcá tšëngaftanga cbëyana: Chë chanjá luaroye, tšëngaftanga ndoñe quešmátobena jama ca.

<sup>34</sup> Canÿe tsëm soye cbetsamëndá: Nÿetscanga šmochtsenbobonshana. Ntšamo atše tšëngaftanga cbondábabuanÿeshana, cachcá tšëngaftanga šmochtsenbobonshana.

<sup>35</sup> Tšëngaftanga šmojtsenbobonshánëse, nÿetsca entšanga mochántsetatšëmbo, tšëngaftanga atšbe uatsjëndayënga šmomnama ca —Jesús tojanëyana.

*Jesús tojánayana, chábioye ndoñe bonjanabuátma ca Pedro yochjánayanama*

*(Mt 26.31-35; Mc 14.27-31; Lc 22.31-34)*

<sup>36</sup> Chora Simón Pedro tbonjantjá: —Bëngbe Utabná, ¿ndémoye cochjá ca?

As Jesús tbojanjuá: —Atše sèntsá luaroye, mora aca ndoñe quecátobena atše juastana, pero más chcoye aíñe šcochanjuasto ca.

<sup>37</sup> As Pedro tbojanayana: —Atšbe Utabná, ¿ndáyeca ndoñe sèntsobena mora aca juastama? ¡Atše sèntseprontana acbiana jóbanama ca!

<sup>38</sup> Chora Jesús tbojanayana: —¿Ndegombre cojtseprontana atšbiana jóbanama? Ndegombre cbëyana, cabá ngallo ndëcánta ora, aca unga soye atšbiana cochanjayana: “Cha ndoñe quetsatabu-atma ca”.

## 14

*Jesús beyeca entsanga jobenayana Bëngbe Bëtsábioye jama*

<sup>1</sup> Mëntsánaca Jesús tojánayana: —Ndoñe ainana tsetšanënga matsmënana. Tšëngaftanga Bëngbe Bëtsábeñe šmondošbuaché; átšbeñnaca šmochtsošbuáchiye.

<sup>2</sup> Atšbe Taitá Bëngbe Bëtsá endmënoca, ba luarënga joyéanama endmëna. Ndoñe chca tontsemnëse, atše chca matchënjáuyana. Morna, cha endmënoye atše chanjá tšëngaftangbiana canýe luare joyéanama jabuáprontama.

<sup>3</sup> Atše chajáy chë luare chacbojabuaprontá ora, cachiñe moye chanjésabo, tšëngaftanga átšeftaca junatsama. As, atše chaitsemnoye, tšëngaftángnaca chašmotsá joyéanama.

4 Atše chanjá choye ntšamo jama y jashjanguama ya šmontsetátšëmbo ca — Jesús tojánayana.

5 Chora Tomás Jesúsbioye tbojaniyana: — Bëngbe Utabná, ndémoye cochjama ndoñe queftsátstatšëmbo. As, ¿ntšamo bënga fchtsetátšëmbo ntšamo choye jama ca?

6 Chca tbojaniyana ora, Jesús tbojanjuá: — Atše sëndmëna benachcá; chëjana tcojtsase, pronto jashjanguana. Atše sëndmëna ntšamo ndegombre yomncá sempre oyebuambnayá, y entšanga chë nyetsca tescama yomna tšabe vida chamotsebomnama endamá. Nye átšbeyeca endopodena ndayëjana jama, y atšbe Taitá Bëngbe Bëtsábioca jashjanguama.

7 Tšëngaftanga atše šmojtsábuatmëse, atšbe Taitánaca šmattsábuatma. Morscana ya cha šmontsábuatma y cha šmontsonyá ca — tbojaniyana.

8 Pero Felipe tbojaniyana: — Atšbe Utabná, nye chë Taitá šmanyanyé, ndayama más ca.

9 Chora Jesús tbojaniyana: — Chëfta te tšëngaftangaftaca sëntsemna, y ¿cabá ndoñe atše šcontsábuatma, Felipe? Nda atše šojinye, chë Taitá Bëngbe Bëtsábioynaca jinýana. As, ¿ntšamo atše šcojtsatsá, chë Taitá šmanyanyé ca?

10 ¿Ndoñe condošbuaché, atšbe Taitá átšbeñe y átšnaca chábeñe nye canýacá ftsmënama? Chë cbontsëtsësná soyënga, ndoñe nye atšbe juábnaca chca quetsatoyebuambná. Atšbe Taitá, chë átšbeñe vida endbomná jtsamana lempe ntšamo stsamcá.

11 Muiñe šmochtsošbuáchiye: Atšbe Taitá átšbeñe endmëna, y átšnaca chábeñe mo



nÿe canÿacá sëndmëna. Chama ndoñe šmontsošbuachese, as nÿe chë tijama soyëngámnaca átšbeñe šmochtsošbuáchiye.

<sup>12</sup> Ndegombre šcuayana, nda átšbeñe tojtsošbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átšbeñe ošbuachiyá, chama más bëtš soyënga echanjama.

<sup>13</sup> Tšëngaftanga ndaye sóynaca Bëngbe Bëtšábioye šmojtjañe, y chca šmojama atše jótšëmbonëse, átšbeñe šmošbuachéyeca, lempe šmochanjóyëngacñe; chca, chë Uaquiñá echanjínÿanÿiye chë Taitá corente bëtšá y obená yomnama.

<sup>14</sup> Tšëngaftanga ndaye sóynaca atše šmojtjañe, y chca šmojama atše jótšëmbonëse, átšbeñe šmošbuachéyeca, atše chë soye chanjama ca — Jesús tojánayana.

*Jesús tojanašebuachená chë Uámana Espíritu jíchmuama*

<sup>15</sup> Mëntšánaca Jesús tojánayana: “Tšëngaftanga atše šmojtsebobonshánëse, ntšamo cbontsamëndacá cachcá šmochanjama.

<sup>16</sup> Chca chašmojamëse, atšbe Taitá Bëngbe Bëtšá tšëngaftangbiana chanjaimpáda, tšëngaftanga jabújabuachama y jabáñemuayama inÿa cha chabuichmoma, chë Uajabuachaná nÿetsca tescama tšëngaftangaftaca chauétsemnama.

<sup>17</sup> Cha, chë Uámana Espíritu endmëna chë nÿetsca soyënguiñe ntšamo ndegombre yomncá oyebuambnayá. Chë nÿe quem luarama enójuabnaye entšanga, chë átšbeñe

ndošbuáchiyënga ndoñe quematonýá, ni quematábuatma. Chíyeca chënga ndoñe quemátobena cha jóyëngacñana. Pero tšëngaftanga aíñe cha šmotsábuatma. Cha tšëngaftangaftaca entsemna, y tšëngaftangbe ainaniñe sempre echanjëftsiyena.

18 “Atše ndoñe quebocháisabashejuana, mo uajchonga cuenta chašmotsemnama. Tšëngaftangbioye chanjésabo.

19 Muentšana baseftaytese, chë nýe quem luarama enójuabnaye entšanga ndoñe más quešmochátonýaye; pero tšëngaftangna aíñe, atše cachiñe šmochántinýe. Atše ainá chántsemna, chíyeca tšëngaftanga átšeftaca tšabe vida šmochántseboamna.

20 Chë Uámana Espíritu tšëngaftangbe ainaniñe chašmojóyëngacñe ora, tšëngaftanga šmochántsetatšëmbo, atše atšbe Taitábeñe nýe canýacá tsmënama; cachcá, tšëngaftanga šmochántsetatšëmbo, tšëngaftanga átšeftaca cachcá nýe canýacá šmomnama y átšnaca tšëngaftangaftaca.

21 Nda totátšëmbo ntšamo atše tija-mandacá y siempre chca tojtsama, cha ndegombre šojtsebobonshana. Nda átšbioye šojtsebobonshana, chábioye atšbe Taitánaca bochántsebobonshana. Atšnaca cha chántsebobonshana, y nda atše tsmënama cha chanjinýinýiye ca” —Jesús tojánayana.

22 Chora, inýe Judas, ndoñe Judas chë Iscariote, Jesúsbioye tbojaniyana: —Bëngbe Utabná, ¿ntšamo chca yojtsemna, nýe bënga šcochjínýanýiye

ntšamo cach aca comnama, y nyetsca quem luarentšengbioye ndoñe ca?

23 Chora Jesús tbojanjuá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábioye bochántsebobonshana, y bëndata chábioye fchanjabo y chábeñe vida fchantsebmna.

24 Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nye atšbe juábnaca quenátsmëna, sinó chë Taitá, chë šonjichmó chabe juábnaca.

25 “Atše cabá tšëngaftangaftaca sëntsemnëntscuana, lempe quem soyëngama sëntsoyebuambná.

26 Chë Uajabuachaná, chë Uámana Espíritu, atšbe impadanánaca atšbe Taitá bochanjíchmua. Cha lempe cmochántsabuatambaye, y echanjama nyetsca chë tcbonjáuyana soyëngama chašmuatenójuaboma.

27 “Chë atšbe ainaniñe puerte tšabe ebionana tšëngaftangbiamá šcuétseboshjona, cbetsatšatá. Chë nye quem luarama enójuabnaye entšanga cmondbétsatšatnaye soyëngcá ndoñe quenátsmëna, chë atše cbontsatšatná ainaniñe puerte tšabe ebionana. Ainana tsetšanënga ndoñe matsmënana, ni matauatjëngana.

28 Ya šmonjouena ntšamo tcbonjauyancá: ‘chanjá y tšëngaftangbioye chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábioye jama šojtsemnama, er chë Taitá atšbiamá más bëtsá endmëna.

<sup>29</sup> Quem soyënga tcbonjáuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmotsošbuáchema.

<sup>30</sup> “Chë quem luarentša bacna soyënga mandayá endabó; chíyeca atše ya ndoñe bëtscá tšëngaftangaftaca quichaisóyebuambaye. Pero cha tondaye quenátobena atše jabórlana.

<sup>31</sup> Masque cha chca endmëna, chca entsemna, atše chë Taitábioye tsbobonshánama quem luar-entša entsanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanéyana.

## 15

### *Jesús yomna mo chë tšabe uvas betiy cá*

<sup>1</sup> Mëntsánaca Jesús tojánayana: “Atše sëndmëna mo chë tšabe uvas betiy cá, y atšbe Taitá Bëngbe Bëtsá chë tšabe uvas betiye inýenacá.

<sup>2</sup> Chë inýená, chë uvas betiyentša buacuafjënga ndëshajuanëfjënga jtsebuácuetëtsetšana; pero chë uvas betiyentša buacuafjënga shajuanëfjënga jtsobolímpiana, bëtscá chaotseshájuanama. Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábioye corente bochantsecastíga.

<sup>3</sup> Tšëngaftanga šmonjouena ntšamo tijayancá; bëtscá chca šmontsama. Chíyeca mora tšëngaftanga šmontsemna mo chë limpiana y shajuana buacuafjëngcá.

<sup>4</sup> Atšeftaca cányiñe mo canyáca šmochtsemna y atše tšëngaftangafácna. Chë buacuafja uvas betiyentsana juanánëfja ndoñe ntsoobenana nyë cachabe ponto jashájonana. Cachcá, tšëngaftanga átšeftaca ndoñe cányiñe mo canyáca šmontsemnëse, ndoñe šmattsobena Bëngbe Bëtsabiana bëtscá soyënga jamama.

<sup>5</sup> “Atše chë tšabe uvas betiyáca sëndmëna y tšëngaftanga chë buacuafjëngcá. Nda átšeftaca cányiñe mo canyáca tojtsemna y atše cháftacnaca, cha Bëngbe Bëtsabiana bëtscá soyënga echanjama, mo canyë buacuafja becá tojtseshajuancá. Er, tšëngaftanga atšbe uajabuáchenana ndoñe šmontsebomnëse, átšeftaca cányiñe mo canyáca ndoñe šmontsemna causa, tondaye šmattsobena jamama.

<sup>6</sup> Canya átšeftaca cányiñe mo canyáca ndoñe tontsemnëse, cha jtsemnana mo canyë buacuetëtšena buacuafja, utšenëfja y buashánëfjá. Chca buacuafjënga, entšanga jtsatbanana, íñeshoye jtsëtšenana y chentše jtsejuinýiyana. Cachcá, nda ndoñe átšeftaca cányiñe mo canyáca tontsemna, ndoservená jtsemnana y luaroca cha mochantsesegóra.

<sup>7</sup> “Tšëngaftanga átšeftaca cányiñe mo canyáca šmojtsemna y ntšamo atše tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe.

<sup>8</sup> Chë shajuana buacuafjëngcá tšëngaftanga chašmojtsemna ora, šmochanjínyanýiye atšbe Taitá corente bëtscá y obená yomnama. Y chca, tšëngaftanga atšbe ndegombre uatsjëndayënga

šmochántsemna.

<sup>9</sup> Ntšamo chë Taitá šondbobonshancá, átsnaca cachcá tšëngaftanga cbondábabuanÿeshana. Chíyeca, šmochtsiyena atšbe bonshánama jtsejuabnayëse.

<sup>10</sup> Atšë sëndama ntšamo atšbe Taitá šondëmandacá. Chíyeca atšë sëndoyena chabe bonshánama jtsejuabnayëse. Cachcá tšëngaftángnaca, ntšamo atšë cbontsamëndacá šmojtsamëse, atšbe bonshánama jtsejuabnayëse šmochantsiyena.

<sup>11</sup> “Atšë chca cbontsëtsëtsná, chë atšë sëntsebomna oyejuayana tšëngaftángnaca chašmotsebomnama, y tšëngaftanga puerte chašmotsóyejuama.

<sup>12</sup> Mëntšá cbetsamëndá: Ntšamo atšë cbond-ababuanÿeshancá, cachcá šmochtsenbobonshana.

<sup>13</sup> Chë chabe amiguëngbiamá tojóbanabiamá, ndocna quenátobena chabiamá más bonshánana jtsebomnana.

<sup>14</sup> Ntšamo atšë tijamandacá tšëngaftanga šmojtsamëse, atšbe amiguënga šmochántsemna.

<sup>15</sup> Chë oserverná ndoñe ntsetatšëmbuana ndayá chabe nduiño tojtsamama. Chíyeca atšë tšëngaftanga oservénënga ca ndoñe quecbatëtsëtsná. Morscana mëntšá cbontsëtsëtsná: ‘Tšëngaftangna atšbe amiguënga šmontsemna ca’, er lempe ntšamo atšbe Taitábentšana tijuatsjinÿcá, tšëngaftanga tcbonjinÿanÿé.

<sup>16</sup> Tšëngaftanga ndoñe atšë chešmatábuayana, pero atšë aíñe tšëngaftanga tcbonjabacacá y tcbonjubuáyana, Bëngbe Bëtsabe trabajo jamama; y chca, mo canÿe betiye sempre tojtseshajuana y chë shajuana ndocna te tontsopochocacá,

tšëngaftanga chašmotsemnama. Chca, lempe ntšamo atšbe Taitá šmojotjañcá, y chca šmojama atšbe jótšëmbonëse, átšbeñe šmošbuachéyeca, cha lempe cmochanjátšataye.

<sup>17</sup> Mëntšá atšbe cbetsamëndá: Smochtsenbobonshana ca” –Jesús tojanëyana.

*Jesús y chabe entsanga, chë nÿe quem luarama enójuabnayëngbiama uaboyëñjanënga*

<sup>18</sup> Mëntšánaca Jesús tojánayana: “Pero chë nÿe quem luarama enójuabnaye entsanga tcmojtsëbuayëñjëse, šmochjenójuaboye, natsana chënga atšbe šmonjanáboyëñjama.

<sup>19</sup> Tšëngaftanga, chë nÿe quem luarama enójuabnaye entsanguentsana šmojtsemnëse, chënga cmattsababuánÿeshana cachëngbengbioycá. Pero tšëngaftanga ndoñe chë nÿe quem luarama enójuabnaye entsanguentsana quešmátsmëna, y atšna, chë quem luare oyenënguentsana tšëngaftanga tcbonjabacacá. Chíyeca chë nÿe quem luarama enójuabnaye entsanga tšëngaftanga cmontsëbuayëñja.

<sup>20</sup> Smochjenójuaboye ntšamo tcbonjáuyanama: ‘Chë oservená chabe nduiñbiana ndoñe más uamaná quenátsmëna ca’. Chënga monjánama atšbe chaisufrima; tšëngaftángnaca chašmotsesufrínama mochántsama. Entšanga ntšamo atšbe tijayanentsana ntsachetšá tmojtsamcá, cachcá chënga mochántsama ntšamo tšëngaftanga chašmojtsëtsëtsná chentsana.

<sup>21</sup> Chë chacmojtsëbuayëñjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

22 “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebmna. Pero mora, chëngbe bacna soyëngama chënga ndoñe quemátobena jayanana, ‘¡Chca fsënjama ntsetatšëmbcá ca!’

23 Nda atše šojtsáboyënja, atšbe Taitábioynaca jtsáboyënjana.

24 Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebmna. Pero mora, masque ntšamo sënjamcá tmonjinÿëse, chënga atše šmontsáboyënja y atšbe Taitábioynaca.

25 Chca chënga montsama, ntšamo chëngbe leyënguiñe enduabemancá cachcá chaopasama. Chiñe mëntšá endayana: ‘Nÿe tondayama chënga šmonjanáboyënja ca.’

26 “Atše, atšbe Taitábentšana chë Uajabuachaná y añemuayá tšëngaftangbioye chanjíchmua. Cha chë Uámana Espíritu endmëna, chë nÿetsca soyënguiñe ntšamo ndegombre yomncá oyebuambnayá. Cha endmëna chë Taitábentšana ichmoná; y cha lempe atšbe tšabe soyënga cmochantsëtsëtsnaye.

27 Chorscana, tšëngaftángnaca atšbiama entšanga šmochantsëtsëtsnaye, er tšëngaftanga átšeftaca šmondétsemna, entšanga jábuayenama atše sënjanbojatsé orscana ca” —Jesús tojánayana.

## 16

1 Mëntšánaca Jesús tojánayana: “Atše quem soyënga cbontsëtsëtsná, tšëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora.



2 Chëngna, chë judiëngbe enefjuana yebnënguentsana cmochantëbuacana. Chca tempo chaojobuache ora, chë tšëngaftanga chacmojtsëbáyënga mëntšá mochántsejuabnaye: ‘Bënga tšabá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’

3 Chënga, chë Taitá Bëngbe Bëtsá ndoñe quematábuatma, y átšbioye cach ndoñe. Chíyeca, chca cmochanjáborlaye.

4 Atše chca tšëngaftanga cbontsëtsëtsná, ntšamo tcbonjáuyanama chašmuenójuaboma, chca tempo chaojobuache ora ca” —Jesús tojánayana.

### *Ndayá chë Uámana Espíritu inétsama*

Mëntšánaca tojánayana: “Entšanga jábuayenama sënjanbojatšé orscana, chë echanjopása soyëngama ndoñe quecbënjatanëtsëtsná, er atše tšëngaftangaftaca sënjëtsemna.

5 Pero morna, chë šojichmó cha yomnoye chantá; y tšëngaftanguentsá ndocná šochanjatjaye, ‘¿ndëmoye cojtsá ca?’

6 Mora, tšëngaftangbe ainana ngménaca entsemna, atše chca tcbonjáuyana causa.

7 Pero ndegombre šcuayana: Atše chanjá y chca tšëngaftangbe tšabiamá echántsemna. Atše ndoñe quetsjase, chë Uajabuachaná y añemuayá ndoñe tšëngaftangbioye queochátabo. Pero aíñe chanjá, y chora cha tšëngaftangbioye chanjíchmuá.

8 Cha chaojášhango ora, echanjama quem luarentša entšanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominiñe tšabia jtsemnana, y ndayá

yomna chë Bëngbe Bëtsá entsangbiamama jayanana tšabá o ndoñe tšabá tmonjamama.

<sup>9</sup> Entsanga átšbeñe ndoñe quematošbuaché. Chíyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana.

<sup>10</sup> Chë Taitábioye chanjá y atše ndoñe más quešmochátinÿe. Chíyeca chë Uajabuachaná echanjama chënga corente chamotsetátšëmbo ndayá ndegombre yomna Bëngbe Bëtsabe bominiñe tšabia jtsemnana.

<sup>11</sup> Quem luarentša bacna soyënga mándayabiamama Bëngbe Bëtsá ya tonjayana, ntšamo cha tojamama ndoñe tšabá yontsemna ca y nyetsca tescama castiganá chaotsemna ca. Chíyeca chë Uajabuachaná echanjama entsanga corente chamotsetátšëmbo, ndayá ndegombre yomna chë Bëngbe Bëtsá entsangbiamama jayanana tšabá o ndoñe tšabá tmonjamama.

<sup>12</sup> “Atše cabá ba soyënga séntsebmoma tšëngaftanga jáuyanama. Masque chcasna, mora tšëngaftanga ndoñe quešmátobena chë soyëngama josértana.

<sup>13</sup> Pero chë Uámana Espíritu, chë nyetsca soyënguiñe ntšamo ndegombre yomncá oyebuambnayá, chaojáshjango ora, lempe ntšamo ndegombre yomncá cmochanjabu-atambá. Cha ndoñe nÿe cachabe juábnaca queochátoyebuambnaye. Ntšamo chë Taitá chábioye tbojauyancá, tšëngaftanga cachcá cmochanjáuyana, y cha cmochanjábuayenaye ntšamo yochjopásama.

<sup>14</sup> Atšbe soyënguentšana cha echanjójyëngacñe, y

cach soyëngama cmochanjabuatambá. Chcase cha cmochanjínÿanÿiye atše bëtsá y obená bëtsemnama.

15 Lempe ntšamo chë Taitá endbomncá, atšbe soyëngnaca endmëna. Chíyeca atše tcbonjáuyana, chë Uámana Espíritu atšbe soyënguentšana yochjóyëngacñe y cach soyëngama cmochjabuatambá ca.”

16 “Baseftayté y atše ndoñe más quešmochátinÿe. Inÿe baseftayté y cachiñe šmochantëtínÿe ca” — Jesús tojanëyana.

*“Tšëngaftangbe ngménana, oyejuayana echanjóbema”*

17 Chora Jesusbe básefta uatsjëndayënga imojt-sentjanaye: —¿Ntšamo yojtsentšáyana, chë “baseftayté y atše ndoñe más quešmochátinÿe, y inÿe baseftayté y cachiñe atše šmochantëtínÿe, er atše chë Taitábioye chanjá ca”?

18 ¿Ntšamo yojtsentšáyana, chë “baseftayté ca”? Ndoñe quemuátstatšëmbo ntšamo yojtsentšáyanama ca —chënga imojtsichamo.

19 Jesús yojtsetátšëmbo chënga chca jatjayama imojtsebošama, y tojanëyana: —Atše tcbonjáuyana: “Baseftayté y atše ya ndoñe más quešmochátinÿe, y inÿe baseftayté y cachiñe atše šmochantëtínÿe ca.” ¿Chë soyëngama šmojtsentjaná ntšamo stsentšáyanama?

20 Ndegombre šcuayana: Tšëngaftanga šmochanjenóbošachna y puerte ngménënga šmochántsemna, pero chë nÿe quem luarama enójuabnaye entšanga corente oyejuayënga mochántsemna. Masque tša ngménënga

šmochántsemna, chentšana tšëngaftangbe ngménana, oyejuayana echanjóbema.

21 Canye shembása tbojontšabuache šešona jónynama ora, tša ngménaca cha jésemnana, puerte tbojtsetsetše causa. Chë šešona ya tojonyná ora, cha ndoñe ntsenójuabnayana chë tša ibuántsetšama. Canye šešona quem luaroye cháuashjanguama chë shembása tojámayeca, chora cha tšabá y oyejuayá jtsemnana.

22 Ndegombre, tšëngaftángnaca cachcá, chora tša ngménaca šmochántsemna. Pero atše tšëngaftangbioye chaijésabo ora, atše šmochantëtinye y corente oyejuayënga šmochántsatsmëna. Y ndocná queochatobenaye chë oyejuayana jabuajuánana.

23 “Chë te chaojóshjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá šmojotjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye.

24 Mëntscoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjóyëngacñe, y chca, bëtscá oyejuayana šmochántsebomna ca” —Jesús tojanëyana.

*Jesucristo, quem luarentse mandayábioye yëñjanayá*

25 Mëntšanaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atše ya ndoñe más cuentëngaca quebochátëtsësnaye; chë cuentna, puerte botamana lempe atšbe Taitabiana cbochanjáuyana.

26 Chë tena, atše jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atše cbéyana; chca, chë te ndoñe quešochatájaboto tšëngaftangbiana atšbe Taitá jatsimpadánana.

27 Atše ndoñe quichatsimpadana, er cach Taitá tšëngaftanga cmondábabuanÿeshana. Tšëngaftanga atše šmondobonshánama, y Bëngbe Bëtsábíocana atše tijabama šmojtsošbuáchema, chë Taitá cmondábabuanÿeshana.

28 Atše chë Taitábíocana sënjábocna y quem luaroye sënjabo. Pero mora quem luare chanjëftseboshjona atšbe Taitábioye jtama ca” —Jesús tojánayana.

29 Chora chabe uatsjéndayënga tmojaniana: — Mora ya ndoñe cuenténgaca quecatoyebuambná, chíyeca lempe paselo josértama bëngbiana entsemna.

30 Mora fsëntsetatšëmbo aca nÿetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabuatmana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábíocana tcojabama ca —chënga tmojaniana.

31 As Jesús tojanéyana: —¿Mora chiñe šmojtsošbuaché ca?

32 Ya tempo tocjobuache y cam ora entsemna, tšëngaftanga nÿetsquénache šmochanjuáshana y atše nÿe canÿa šmochanjéseboshjona. Pero atše ndoñe nÿe canÿa quichátsmëna, chë Taitá átšeftaca entsémnayeca.

33 Atše lempe quem soyënga cbontsëtsëtsná, tšëngaftangbe ainaniñe tšabe ebionana

chašmotsebomnama, átšeftaca cányiñe mo canyáca jtsemñese. Quem luarentše šmochanjasufrina; pero añemo šmochtsebomna, atše ya chë quem luarentša mandayá sënjayënjaná ca —Jesús tojánayana.

## 17

*Jesús chabe uatsjéndayëngbiama Bëngbe Bëtsábioye tbojanimpadá*

<sup>1</sup> Jesús chë soyënga tojánayanentsana, celoye tojanontješé y Bëngbe Bëtsábioye tbojaniyana: “Taita, atšbe te ya tocjobuache. Minyänyé, atše acbe Uaquiñá, corente bëtsá y obená bëtsemnama. As, atše acbe Uaquiñá, aca corente bëtsá y obená comnama chainyänyema.

<sup>2</sup> Mora aca nyets obenana šconjatšetá nyetsca entšángbeñe, nyetscanga chë atšbiamá tcojábacacanga chë nyetsca tescama yomna tšabe vida chamotsebomnama atše chaimama.

<sup>3</sup> Chë nyetsca tescama yomna tšabe vida jtsebomnana endmëna aca, chë nyë canye y ndegombre Bëngbe Bëtsá jtsabuatmana, y atše Jesucristo, acbe ichmoná.

<sup>4</sup> “Lempe ntšamo šconjamandacá atše sënjapochocá, y chca quem luariñe sënjama aca corente bëtsá y obená comnama jinyänyiyama.

<sup>5</sup> Taita, quem luare cabá ndoñe quenjatsmëna ora, aca tconjaninyänyé atše corente bëtsá y obená ácaftaca bëtsemnama. Mora moma atše cachcá ácaftaca chaitsemnama.

<sup>6</sup> “Aca quem luarentša entšanguentsana quem boyabásenga tconjabacacá y atšbiamá šconjininyé. Atše chënga sënjaninyé ntšamo

ndegombre aca comnama. Chënga acbe entšanga mondmeña; y acna, chë atšbiana chënga šconjinñiyá. Chënga acbe palabra tmonjouena y tšabá tmonjoyeuná.

<sup>7</sup> Chíyeca chënga mondëtatšëmbo, lempe ntšamo atše tsbomncá ácbentšana tijóyëngacñama.

<sup>8</sup> Atše chënga sënjáuyana ntšamo aca šcojauyancá, y chënga montsošbuaché chë atše sënjauyaniñe. Chíyeca, chënga ndegombre mondëtatšëmbo atše acbiocana tijabama, y montsošbuaché aca chë atše šcojichmó cha comnama.

<sup>9</sup> “Atše chëngbiana cbontseimpadana. Chë nñe quem luarama enójuabnaye entšangbiana ndoñe quecbátsimpadana, pero aíñe chë atšbiana šcojinñiyëngbiana, er chënga acbe entšanga mondmeña.

<sup>10</sup> Lempe ntšamo atše tsbomncá, acbiámnaca endmeña; y cachcá, lempe ntšamo cobomncá, atšbiámnaca endmeña. Acbengbe vidëngaca aca tcojinñanyé atše corente bëtsá y obená bëtsemnama.

<sup>11</sup> “Atše ndoñe quem luarentše quešocháisetotona, pero chënga aíñe cabá camuentše mochanjëftsemna. Atše chantá ácaftaca jtsatsmënama. Uámana Taitá, chë atšbiana šconjinñiyënga acbe obenánaca cochtsanñena. Chca ntšamo bëndata mo canñacá bondmeña, chëngnaca cachcá chamotsemnama.

<sup>12</sup> Atše chëngaftaca sëntsemnëntscuana, chënga sëntsanñena, aca šconjatšetá obenánaca. Atše chënga sëndánñena, y ni canña queochátsmëna infiernoca pochocaná, nñe chë infiernoca

pochocaná jtsemnama ibomná chana aíñe, ntšamo acbe uabemana palabrënguiñe endayancá, cachcá chaotsemnama.

13 “Morna chë aca condmënoye chantá; pero atše cabá quem luariñe sëntsemnëntscuana chca chënga sëntsëtsëtsná, chca, chë atše sëntsebomna puerte bëtscá oyejuayana chëngnaca chamotse-bomnama.

14 Atše chënga sënjáuyana ntšamo aca šconjauyancá. Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna. Chíyeca, chë nÿe quem luarama enójuabnaye entšanga chënga montsëbuayënja.

15 Atše ndoñe quecbátsimpadana, chënga quem luarentšana chacúbuacanama; pero aíñe, nÿetsca bacna soyënguentsana chacuatsebacama.

16 Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna.

17 Cochjama chënga acbe entšanga chamuétsemnama, y chca, nÿe acbiama vida chamotsebomna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna.

18 Ntšamo aca quem luaroye šconjanichmocá, cachcá átšnaca chënga sëntsachamná, quem luare entšanga jábuayenama.

19 Chëngbiamá atše cachiñe mëntšá cbëyana: Atše nÿe acbiama sëndmëna. Y chca, chëngnaca, ntšamo acbiama ndegombre yomncá jtsóyebuambnayëse acbe entšanga chamotsemna, y



chca, nje acbiamana vida chamuétsebomna, ntšamo ndegombre yomncá chënga imoyenama.

20 “Pero nje chëngbiamana ndoñe quecbátsimpadana, sinó chë átšbeñe mochtsošbuáchiyëngbiamnaca, chë atšbiamana šconjínjinyiyënga, chëngbioye atšbiamana ínÿenga chamojtsabuayíyná ora;

21 as chënga nÿetscanga cánÿiñe mo canÿacá chamotsemnana. Ntšamo aca, Taita, átšeftaca cánÿiñe mo canÿacá bondmëna y átšnaca ácaftaca, cachcá chëngnaca cánÿiñe mo canÿacá bëndátaftaca chamotsemnana cbontseimpadana. Y chca, quem luarentša nÿetsca entšanga, atše šcojichmoma chamotsošbuáchema.

22 Ntšamo chë obenana y uámanana šconjatšetacá, cachcá átšnaca chënga sënjatsatá. As, ntšamo bëndata cánÿiñe mo canÿacá bondmëna, chëngnaca cachcá cánÿiñe mo canÿacá chamotsemnana.

23 Atše chëngbe ainaniñe sëntsemna, y aca átšeftaca cánÿiñe mo canÿacá bondmëna; as, chëngnaca nÿetsca soyënguiñe cánÿiñe mo canÿacá chamotsemnana. Y chca, quem luarentša entšanga chamotsetátšëmbo aca šcojichmoma, y chamotsetátšëmbo ntšamo atše scondbobonshancá, chëngnaca cachcá condábabuanÿeshanama.

24 “Taita, atšbiamana chënga šconjínjinyiye. Atše mëntšá sëntseboše: chë atše chántsemnoca, chëngnaca chamotsemna, y chentše, chë šconjatšetá obenana y uámanana chënga chámuinÿe. Quem luare cabá ndoñe quenjatsmëna orscana, šconjánbobonshana; chíyeca, cachora

tconjaninÿanÿé atše corente bĕtsá y obená bĕtsemnama.

<sup>25</sup> Taita, nÿetsca soyĕnguiñe tšabá amá, masque chĕ nÿe quem luarama enójuabnaye entšanga ndoñe quecmatábuatma, atše aiñe cbonduábuatma, y quem boyabásenga montsetátšĕmbo, aca comna chĕ šcojichmó cha.

<sup>26</sup> Atše chĕnga sĕnjinÿanÿé ntšamo ndegombre aca comnama, y más chanjínÿanÿiye; chca, ntšamo šcondbobonshancá, chĕngnaca cachcá chamot-senbobonshánama y atše chĕngbe ainaniñe chait-semnama ca” —Jesús tojánayana.

## 18

*Uayayĕnga Jesús tmojánishache  
(Mt 26.47-56; Mc 14.43-50; Lc 22.47-53)*

<sup>1</sup> Chĕ soyĕnga Jesús tojĕftsanayanentšana, chabe uatsjĕndayĕngaftaca tojĕftsanbocna, chĕ binche béjaye Cedrón ca uabáiniye chenguana jama. Chentše inamna canÿe tjashetema; y Jesús chabe uatsjĕndayĕngaftaca choye tojánamengo.

<sup>2</sup> Y Judas, chĕ Jesús uayayĕngbe cucuatšĭñe boshjuaná, tšabá chĕ luare yojanábuatma, er Jesús y chabe uatsjĕndayĕnga ba soye chentše imojánenefjuana.

<sup>3</sup> Chora Judas tojánashjango, y cháftaca ba soldadĕnga y básefta Bĕngbe Bĕtsabe bĕts yebnocá josticiĕnga; chĕnga imojamna chĕ bachnangbe amĕndayĕnga y fariseungbe ichmónĕnga; nÿetscanga uajuinÿanĕshangaca, lamparĕshangaca y espadĕjangaca uajátĕnga.

<sup>4</sup> Jesusna yojtsetátšëmbo lempe ntšamo cha yochjanpásama; chíyeca, natsanoye tojánbocna y chë entsanga tojanéyana: —¿Nda šmojtsenguá ca?

<sup>5</sup> Y chënga tmojanjuá: —Jesús, chë Nazaretocá fsëntsenguá ca.

As Jesús tojanéjua: —Atše cha sëndmëna ca.

Y Judas, chë boshjuaná, chánaca chë entsángaftaca yojtsemna.

<sup>6</sup> Jesús tojanéyana: “Atše cha sëndmëna ca”, y cachora chë entsanga tmojtanostëtšánanga y fshantsoye tmojánshajaye.

<sup>7</sup> Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

<sup>8</sup> As Jesús tojanéyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachcá šmochjónyaye chamotsóñengama ca.

<sup>9</sup> Chca tojanopasá, ana ntšamo Jesús tojanayancá cachcá chaotsemnama, chë “Atšbe Taitá Bëngbe Bëtsá, chë šconjínýinýiye entsanguentšana ni canya pochocaná queochátsmëna ca”.

<sup>10</sup> Simón Pedro canye espadëja inasëngbuájonýana; asna, tojanenosëngbotëntšena y chë bachnangbe más uámama amëndayabe canye oservenábioye catsbioica matscuaše tbojtsanéštjango. Chë oservená Malco ca inauabaina.

<sup>11</sup> As Jesús, Pédrëbioye tbojanianyana: “Acbe espadëja matosëngbuajonýá. Ntšamo atšbe Taitá Bëngbe Bëtsá tojanmandacá, chë atše puerte ngménana jtsebomnama, ¿ndoñe chca chaondëtsemna ca?”

*Jesús, Anasbe yebnoca**(Mt 26.57-58; Mc 14.53-54; Lc 22.54)*

<sup>12</sup> Chentšana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmojánishache y tmojanëcuébatsëca.

<sup>13</sup> Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá.

<sup>14</sup> Caifás yojamna nda judiënga tojanëyana: “Tšëngaftangbiana más tšabá entsemna canye boy-abása Israeloca entšangbiana chaóbana ca.”

*Pedro tojánayana Jesúsbioye ndoñe bon-janabuátma ca**(Mt 26.69-70; Mc 14.66-68; Lc 22.55-57)*

<sup>15</sup> Simón Pedro y inye uatsjendayá Anasbe yebnoye Jesús imojtsëstona. Chë inye uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúseftaca chabe chashjóntscoñe jashjanguana.

<sup>16</sup> Pero Pédrëna nye shjoca, amashjuanentše tojanoquedá. Chcasna, chë inye uatsjendayá tojánbocna y chë bëšáša ebtafjuana shembásaftaca tojanoyebuambá. Chora Pedro tbojanëmashëngo.

<sup>17</sup> As chë shembása Pédrëbioye tbojanianyana: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabuatma ca.

<sup>18</sup> Tša yojtsesëсна causna, chë oservënga y chë josticiënga shjoca tmojanniñé y chentše imojtósboniye. Y Pédrënaca chëngaftaca yojtsešbonena.

*Ntšamo chë bachnangbe más uámana pasado amëndayá, Jesúsbioye tbojantjá*

*(Mt 26.59-66; Mc 14.55-64; Lc 22.66-71)*

<sup>19</sup> Chora, chë bachnangbe más uámana pasado amëndayá tojanontsé Jesús jatjayama chabe uatsjédayëngbiana y ndayá cha entšanga yojánabuatambamnaca.

<sup>20</sup> Y Jesús tbojanjuá: —Atše nÿetsca entšangbe delante sënjoyebuambá. Sempre chë entšangbe enefjuana yebnënguenache sëndabuatambá, y Bëngbe Bëtsabe bëts yebnócnaca, nÿetsca judiënga mondbëtsenefjuantšë; y chca, iytëmencá tondaye chiyatoyebuambá.

<sup>21</sup> ¿Ndáyeca chca šcojtsetjaná? Atšbe palabra tmojouenënga májtjaye, as chënga chacmëyana ntšamo atše tijáuyanama. Chënga mondëtatšëmbo ntšamo atše tijayancá ca —Jesús tbojanjuá.

<sup>22</sup> Jesús chë soyënga tojánayana ora, canÿe josticio chentše yojtsemná, Jesúsbioye tbojanjueb-jantšetá y tbojaniyana: —¿Chca chë bachnangbe más uámana amëndayá cuanjojuá ca?

<sup>23</sup> Y Jesús tbojanjuá: —Ndoñe tšabá tijayanësna, šmëyana ndayentše chë podesca palabra yojtsemna; y tšabá tijóyebuambasna, ¿ndáyeca šcojajuebjantšetá ca?

<sup>24</sup> Chentšana, Anás tojanmandá, chë bachnangbe más uámana amëndayá Caifasbe yebnoye, Jesús batsëcná chamuánatsama.

*Pedro cachiñe tojánayana Jesúsbioye ndoñe bon-janabuátma ca*

*(Mt 26.71-75; Mc 14.69-72; Lc 22.58-62)*

25 Chëntsçuana, Pedro yojtsešbonena, tsanana chë iñe juachaca. Chora chë entsanga tmojantjá: — ¿Aca ndoñe chabe uatsjendayënguentsá condmëna ca?

Y Pedro ndoñe ca tojánayana: —Atše ndoñe quetsátsmëna ca —cha tojánayana.

26 Chora, chë bachnangbe más uámana amëndayabe canye oservená Pédrëbioye tbojaniana: —¿Atše ndoñe cháftaca chë tjashetémoca tcbonjinye ca?

Chë oservená inamna chë Pedro tbojtsanmatstëtšabe pamillo.

27 Y Pédrëna cachiñe ndoñe ca tojánayana, y ca-chora canye ngallo yojacánta.

### *Jesús Pilatbe delante*

*(Mt 27.1-2, 11-14; Mc 15.1-5; Lc 23.1-5)*

28 Chentšana, Caifasbe yebnentšana Jesús tmojanánatse chë romano mandadbe yebnoye. Ya yojtsebínýana, y chë bëts yebnoye chë judiënga ndoñe tmonjánamashjna, er chënga imojtseboše chë Bashco saná jasama. Judiënga ndoñe imonjobena Bashco saná jasana, chca tempo canye ndoñe judiëbe yebnoye nda tojámashënguse.

29 Chíyeca Pilato tojánbocna y chënga tojanéyana: —¿Ndayá quem boyabásabe contra šmochjayana ca?

30 Chora chë entsanga tmojanjuá: —Bacá uamaná ndoñe tontsemnëse, ndoñe matifjuánatse ca.

31 As Pilato tojanéyana: —Tšëngaftanga matánatse, y ntšamo cach tšëngaftangbe leyiñe iuayancá muabiama šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátsbomna ndocná jóbama ca.

<sup>32</sup> Chca tojanopasá, ana ntšamo Jesús cachá jóbana tojanayancá cachá chaotsemnama.

<sup>33</sup> As Pilato cach yebnoye tojtanamáshëngo, Jesús tbojanchembo y tbojantjá: —¿Aca chë judiëngbe Rey cojtsemna ca?

<sup>34</sup> Y Jesús tbojanjuá: —¿Ntšamo šconjatjacá, cach aca chca cojtsejuabnýeca chca yojtsemna o ínÿenga atšbiana tcmojacuentáyeca ca?

<sup>35</sup> Chora Pilato tbojaniyana: —¿Mo atše judío quetsmëna? Cach ábioca entšanga y chë bachnangbe amëndayënga muentše tcmönjúshjango. ¿Ndayá tcojama ca?

<sup>36</sup> Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojtsemnésna, atšbe ústonënga muantsatsejaye atše chë judiëngbe cucuatšiñe ndoñe chašmondboshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

<sup>37</sup> As Pilato tbojaniyana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tijonÿná y quem luaroye tijabo; y atše sënjabo ndegombre soyëngama jabóyebuambayama. Y chca soyënga jtsamëse tmoyenënga, atše jtseyeunanana ca.

<sup>38</sup> Chora Pilato tbojaniyana: —¿Y ndayase chë ndegombre soye yomna ca?

*Jesusbiana tmojánayana chaóbana ca  
(Mt 27.15-31; Mc 15.6-20; Lc 23.13-25)*

Chca tbojantjá chentšana, Pilato cachiñe tojánbocna judiëngaftaca jóyebuambayama, y tojanéyana: —Atse ni mo canye soye chiyátinyena, quem boyabása castiganá chaotsemna ca jayanama.

<sup>39</sup> Pero tšëngaftanga šmondétatšëmbo, Bashco fiestama atse canye utamená cachcá jëtsboshjonama. ¿šmojtseboše chë judiëngbe Rey chjëtsboshjona ca?

<sup>40</sup> Chorna nÿetsca entšanga cachiñe tmojanáyeuachena: —¡Ndoñe, cha ndoñe! ¡Barrabás matsboshjona ca!

Barrabasna canye bacá uamana entšá inamna.

## 19

<sup>1</sup> Chora Pilato, Jesús tbojanánatse y tojanmandá chamotsetjanjama.

<sup>2</sup> Y canye coronësha uchmašëfjangaca chë soldadënga tmojanapormá y Jesús tmojanabestšajó; y canye shbuenda uafjatsenga entšayá mo reycá tmojanichëtjo.

<sup>3</sup> Chorna chënga imojtsóbobecocnaye y jtsafchayama imojtsatsëtsnaye: “¡Bayté judiëngbe Rey cochtsemna ca!” Y imojtsejuebantšetaye.

<sup>4</sup> Pilato cachiñe tojánbocna y entšanga tojanéyana: —Smochjouena; cha chanjuábocna, chë boyabása castiganá chaotsemna ca jayanama atse ni mo canye soye ndoñe sënjinÿenama chašmotsetatšëmbuama ca.

<sup>5</sup> As Jesús tojánbocna chë uchmašëfjangaca coronësha uabestšajoná y chë shbuenda uafjatsenga entšayá mo reycá uichëtjoná. Y Pilato tojanéyana: —¡Muentse chë boyabása entsemna ca!



6 Chë bachnangbe amëndayënga y chëngbe josticiënga cha tmojáninÿe ora, tmojanontsé uayebuáchana: —¡Motsecrucificá! ¡Motsecrucificá ca!

Chora Pilato tojanëyana: —Cach tsëngaftanga mánatse y šmochjacrucifíca; atše ni mo canÿe soye chiyátinÿena quem boyabása castiganá chaotsemna ca jayanama ca.

7 Chora chë judiënga tmojanjuá: —Bëngna canÿe ley fsëndbomna, ntšamo chiñe endayancana, quem boyabása jóbanama bontsemna, Bëngbe Bëtsabe Uaquiñá entsenobiamná causa ca.

8 Pilato chca tojanuena ora, más yojtsauatja.

9 Cachiñe chabe yebnoye tojtanamáshëngo y Jesús tbojantjá: —¿Ndëmocá aca cmëna ca?

Pero Jesús ndocá tbonjanjuá.

10 Chora Pilato tbojaniyana: —¿Ndoñe šcochanjojuá ca? ¿Ndoñe condëtatšëmbo, aca jacrucificama o jëtsboshjonama atše tsobenama ca?

11 As Jesús tbojanjuá: —Acbe obenana Bëngbe Bëtsá ndoñe macmënjánatšetase, tondaye cattsobena átšeftaca jamama; chíyeca, acbe cucuatšiče šonjaboshjoná, acbiana más bëts bacna soye tonjama ca.

12 Cach orscana Pilato yojtsenguaye ntšamo jama, jobenayama Jesús jëtsboshjonama; pero chë judiënga imotsáyebuache: —¡Chacojëtsboshjonësna, Césarbe amigo ndoñe condmëna! ¡Nda rey tojtsenobiamná chana, Césarbe uayayá jtsemnana ca!

13 Pilato chë soyënga tojanuena ora, chashjoye Jesús tbojanábocna. Pilato tojanótbema chabe pues-tentše tribunaloca. Chë tribunaloca chashjaña

hebreo biyañe Gabata ca inauabaina, y endayana “ndëtsbéngaca pormániñe ca”.

<sup>14</sup> Bashco fiestama canye te yojtsájamna, y mo nÿetsto ora yojtsemna. Chora Pilato chë judiënga tojanëyana: —¡Muentse tšëngaftangbe rey entsemna ca!

<sup>15</sup> Pero chënga tmojanáyebuachena: —¡Chaóbanal ¡Chaóbanal ¡Motsecrucificá ca!

As Pilato tojanatjá: —¿Tšëngaftangbe rey atše ch-jacrucificá ca?

Y chë bachnangbe amëndayënga tmojanjuá: —Bëngbe rey nÿe César endmëna, ndocná más ca.

<sup>16</sup> Chentšana Pilato, chëngbe cucuatšinë Jesús tbojánboshjona chamocrucificama y chë judiënga cha tmojanánatse.

### *Jesús tmojanrucificá*

*(Mt 27.32-44; Mc 15.21-32; Lc 23.26-43)*

<sup>17</sup> Jesús tojánbocna chabe cruz tantšajónana y tmojanánatse canye luaroye, “Obanabe Bestsashe ca” uabáinoye (hebreo biyañe Gólgota ca inauabaina).

<sup>18</sup> Chentše cha tmojanrucificá y inÿe útatnaca cátaoica tmojanacrucificá; Jesusna tsëntsaca.

<sup>19</sup> Pilato tojanmandá canye uabemana soye chë cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca.

<sup>20</sup> Y ba judiënga chë uabemana soye tmojanalía, er chë Jesús tmojanrucificá luare Jerusalemó béconana inamna, hebreo, latín y griego biyañe yojetsábemana.

<sup>21</sup> Chca juabemama tojanmandáyeca, chë bachnangbe amëndayënga Pilato tmojanianyana:

—Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

<sup>22</sup> Pero Pilato tojanējua: —Ntšamo tijuábema cachá chaotsábemana ca.

<sup>23</sup> Chë soldadënga Jesús tmojanrucificá chentšana, chabe entšayangá tmojanájaca y cántañe tmojanajatá, nÿetsca canta soldadëngbiana. Chabe cmešējua tmojanaca; chējuana yojanamna nduajonanējua, nÿetsējua uabianánējua.

<sup>24</sup> As chë soldadënga tmojáneniyana: “Ndoñe matjuátanëca; más tšabana tsbanánoye mochjútšena, ndabiama yochjuáquedama chaotsotatšëmbuama ca.”

Chca tojanopasá ana ntšamo Bëngbe Bëtsabe uabemana palabrënguiñe endayancá cachá chaotsemnama, chë “Atšbe entšayangá tmojatenájataye; atšbe cmešėjuaamna tsbanánoye tmonjanëtšena, ndabiama juaquédama jtsotatšëmbuama ca.” Y lempe chca chë soldadënga tmojanma.

<sup>25</sup> Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena.

<sup>26</sup> Jesús chabe mamábioye tbojáninÿe, y chabe juachacna chë Jesusbe bonshana uatsjendayá yojtsemna. Chora chabe mamá tbojanianya: “Mama, chentše acbe uaquiñá entsemna ca.”

<sup>27</sup> Y chë bonshana uatsjendayá tbojanianya: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

*Jesús tojanóbana**(Mt 27.45-56; Mc 15.33-41; Lc 23.44-49)*

28 Jesús yojtsetátšëmbo ya lempe tojanchnënguama, chíyeca chentsana y ntšamo Bëngbe Bëtsabe uabemana palabrënguifne endayancá cachcá chaotsemnama, tojánayana: “Sontsajuendá ca.”

29 Chentše inamna canye matbaja buajútjena untja vínoyeca. As, chë soldadënga canye esponjëshe chë vínoyeca tmojanfchecuacuá, canye hisopo niñëfjiñe tmojananguësëtjo y játsbanase, Jesusbe uayášoye tmojanbeconá.

30 Chë untja vínoye Jesús tojanofšé ora, tojánayana: “Ya lempe tocjochnëngo ca.”

Tojanotsejbé y tojanóbana.

*Canye soldado chabe lanzëshaca costillaca Jesúsbioye tbojanashacuá*

31 Bashco fiestama canye te yojtsájamna, y chë judiënga ndoñe imontseboše chë crucificánënga cachentše chë ochnayté chamotsemnama, chë te puerta uámana te bétsemnayeca. As Pilato tmojanimpadá chë crucificánënga shecuatšënga jetsatcayama y chë cuerpënga chentsana jtsejuánama chaomandama.

32 As chë soldadënga tmojána y shecuatšënga imojtsatcacaye, natsana canya y chentsana chë inya, Jesúseftaca yojtsecrucificaná.

33 Pero Jesúsbioye tmojanobeconá ora, ya obaná tmojáninye; chíyeca chabe shecuatšënga ndoñe tmonjanatcacá.

<sup>34</sup> Masque chca, canye soldado Jesúsbioye costil-laca canye lanzésaca tbojanashacuá. Y cachora buiñe y búyeshe chentšana tonjanóbocna.

<sup>35</sup> Chë mëntśá cuentayá chentše enjamna y tonjáninye, y ndegombre entsichamo; cha endětatsëmbo ndegombre yojtsichámuama, chca, tsëngaftángnaca chiñe chašmotsošbuáchema.

<sup>36</sup> Chë soyënga chca tojanopasá, ntšamo Bëngbe Bëtsabe uabemana palabrënguiñe endayancá cachcá chaotsemnama. Chiñe endayana: “Ni mo canye betaše cha quemochatsëntśátca ca.”

<sup>37</sup> Y ínÿoca, Bëngbe Bëtsabe uabemana palabrënguiñe endayana: “Chë tmojenachentśá bominye mochanjabuájua ca.”

### *Jesús tmojanatbontśá*

*(Mt 27.57-61; Mc 15.42-47; Lc 23.50-56)*

<sup>38</sup> Chë soyënga tojanopasá chentšana, José Arimateocá, Pilátbioye tbojanimpadá Jesusbe cuerpo jesocñama chabolesenciamana. José inamna Jesusbe canye ustoná, masque nÿe iytëcana, chë judiëngbiama auatja causa. Pilato aínne tbojanlesenciá; as José tojána y Jesusbe cuerpo yojtsámabañe.

<sup>39</sup> Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnëtsana kilo mirra y áloe enájua bnana.

<sup>40</sup> As José y Nicodemo Jesusbe cuerpo tbojanca y tmojanandmaná chë botamana uanguëtše soyëngaca unëtjona entsëjuangaca. Judiënga chca imnauamana, obaná juatbontsama ora.

<sup>41</sup> Jesús tmojan crucificá luarentše canye base jajañe inamna, y chiñe canye tsëm cuevëshe,

entsangbe pormánēshe, obanēngbiamā; chēshiñe cabá ndocna obaná mondējajo.

<sup>42</sup> Asna, n̄ye chentše Jesusbe cuerpo tmojansegorá, chē Bashco fiestama can̄ye te yojtsájamna causa, y chē cuevēshe chē béconana inámmayeca.

## 20

### *Jesús tojtānayena*

*(Mt 28.1-10; Mc 16.1-8; Lc 24.1-12)*

<sup>1</sup> Chē in̄ye semana bojatsenté, cabá cachēse, cabá ndēbin̄yna ora, María Magdalena chē cuevēshoye tojána y tojánin̄ye in̄yoca yojtsemna chē cuevēshoye amashjuanentša ndētšbé.

<sup>2</sup> Asna, tojēftsānótjajo y tojána chē Simón Pedro y chē in̄ye uatsjendayá, ndábioye Jesús tša ibn-abobonshana ibojtsemnoye. Chora tojanēyana: “Bēngbe Utabnabe cuerpo chē cuevēshentšana tmojtsámbañe y ndayentše tmotsejájoma ndoñe queftsátstatšēmbo ca.”

<sup>3</sup> Chora Pedro y chē in̄ye uatsjendayá chentšana tbojēftsānbocna y chē cuevēshoye tbojánata.

<sup>4</sup> N̄yets útata ibojtsēchamana, pero chē in̄ye uatsjendayá Pédrēbiamā más betscō tojanótjajo y natsana chē cuevēshoye tojánashjango.

<sup>5</sup> Tojanotsejbé y chē chentše tmojanacjá entšējuangá tojánin̄ye, pero choye ndoñe tonjánamashēngo.

<sup>6</sup> Chentšana, Simón Pedro chabe ústonoye tojánashjango y chē cuevēshoye tojánamashēngo, y tojánin̄ye chē chentše tmojanacjá entšējuangá.

7 Y chë Jesús juabestšëntsacjuama tojanaservé entšëjuana ndoñe chë inÿajúangaca yontsamna, sinó inÿoca botamana uandmanánëjua.

8 Chora chë inÿe uatsjendayá, chë cuevëshoye natsana tojanashjanguá, choye tojánamashëngo. Tojáninÿe y Jesús tojtanayenama yojtsanošbuaché.

9 Chëntscoñe chë útata cabá ndoñe yontsósertana ntšamo Bëngbe Bëtsabe uabemana palabrënguiñe endayancá, chë Jesús obanënguentšana jtayenama ibojamnama.

10 Chentšana chë uatsjéndayata chatbe oyenoye tbojtaná.

*Jesús, María Magdalénbioye tbojánëbëbocna  
(Mc 16.9-11)*

11 Pero María chentše tojanoquedá, chë cuevëshe juachaca šachénaca; yojtsošachentscuana tojanotsejbé cuevëshoye jarrepárama.

12 Y tojáninÿe uta angelotémata uafjantsëjua uichëtjonata, Jesusbe cuerpo yojëftsejajónentše ibojtsetbemana. Canÿa tsëntsënëshoica y chë inÿana matsëskoica.

13 Chora chata tmojanियana: —Shembása, ¿ndayama cošaché ca?

As cha tojanjuá: —Atšbe Utabná tmojtsámabañe, y ndayentše tmojtsejájoma ndoñe quetsátstatšëmbo ca.

14 Chca tojánayana ora, tojanostëtsantjesé y tojáninÿe chentše Jesús yojtsemna, pero María ndoñe yontsetátšëmbo cha Jesús bëtsemnama.

15 Chora Jesús tbojanियana: –Shembása ¿ndayama cošaché? ¿Nda conguá ca?

María yojtsejuabnaye chë boyabásana yojtsemna chentša base jajañe uaishanÿá ca; chíyeca tbojantjá: –Bacó, aca tcojuambësna, šmëyana ndayentše cojtsejajó, as atše cha jesocñama ca.

16 As Jesús tbojanियana: –¡María ca!

Chora María chábioye tojanontješé y tbojanियana: –¡Rabuni ca! (hebreo biyañe chca endayana “Buatëmbayá ca”.)

17 Chora Jesús tbojanियana: –Ndoñe šcatábojajo, er atše cabá ndoñe atšbe Taitábioye quetstëtstsjua. Pero motsa atšbe catšátangbioye y cochjáuyana, atše stsetsjuá atše y tšëngaftangbe Bëtsábioye, atše y tšëngaftangbe Taitábioye ca.

18 As María Magdalena tojána y Jesusbe uatsjëndayënga tojanéyana cha chë Utabnábioye tbojáninÿe ca y cha chë palabrënga tojánayana ca.

*Jesús chabe uatsjëndayënga tojánëbëbuacna  
(Mt 28.16-20; Mc 16.14-18; Lc 24.36-49)*

19 Tojanibétata ora, cach semana bojatsenté, chë uatsjëndayënga tmojánenefjna canÿe luarentše, pero lempe tmojtanatame, chë judiëngbiamama au-atja causa. Chora Jesús tojánamashëngo, chëngbe tsëntsaca tojantsá y mëntsá tojanacheuá: “Chë atšbe ainaniñe tsabe ebionana tšëngaftangaftaca chaotsema ca.”

20 Y chca tojanéyana ora, chabe cucuatšënga y costillaca tojaninÿanÿé. Chora chë uatsjëndayënga oyejuayënga imojtsemna, chëngbe Utabná tmojáninÿama.



21 As Jesús cachiñe tojanéyana: “Chë atšbe ainaniñe tšabe ebionana tšëngaftangaftaca chaotsemna. Ntšamo atšbe Taitá Bëngbe Bëtsá šojichmocá, átsnaca cachcá tšëngaftanga cbontšachamná ca.”

22 Chca tojánayana ora, chëngbioye tojangouo y tojanéyana: “Chë Uámana Espíritu šmochjójyëngacñe.

23 Ndëmuanýënga chëngbe bacna soyëngama chašmojáperdonanga, perdonánënga mochántsmëna; y ndoñe chašmonjáperdonasna, ndëperdonánënga mochántsemna ca.”

*Tomás, Bëngbe Utabnábioye ainá tbojáninýe*

24 Pero Tomás, chë Gemelo ca uabobainá, canya chë bnëtsana uta uatsjendayënguentsá, chë uatsjendayëngaftaca ndoñe yontsemna, Jesús tojánashjango ora.

25 Chíyeca, “bënga chë Utabná fsëjinýe ca”, chë inýe uatsjendayënga tmojanियana ora, Tomás tojanéjua: “Atše chabe cucuatšine chë uajabonjana uinýniñe ndoñe sënjinye, y chiñe atšbe ntšabuafja ndoñe sënjajué y atšbe cucuatše chabe costillaca ndoñe, ndoñe quichátošbuachiye ca.”

26 Canýe semana tojanochnëngo ora, chë uatsjendayënga cachiñe canýe luarentše tmojánenefjna. Y Tomásnaca chëngaftaca yojtsemna. Masque chentše atámeniñe yojtsemna, Jesús tojánamashëngo, chëngbe tsëntsaca tojantsá y tojanéyana: —Atšbe ainaniñe tšabe ebionana tšëngaftangaftaca chaotsemna ca.

27 Chora Tomásbioye tbojanियana: —Acbe ntšabuafja muentše mojué y atšbe cucuatše

minÿe; acbe cucuatſe miyëbo y atſbe costillaca mojué. Y ndoſbuachiyá ndoñe matsmënana, sinó atſe tijtayenama cochtſoſbuáchiye ca.

<sup>28</sup> As Tomás tbojaniyana: —¡Atſbe Utabná y atſbe Bëtsá ca!

<sup>29</sup> Chora Jesús tbojaniyana: —Tomás, nÿe ſconjínÿeyeca cojtſoſbuaché. ¡Bëngbe Bëtsá chaoma puerte oyejuayënga chamotsemna chë nÿe ntjinÿcá tmojoſbuachenga ca!

*Ndayama quem librëſa tmojanábema*

<sup>30</sup> Jesús, chabe uatsjëndayëngbe delante inÿe bëts soyënga Bëngbe Bëtsabe obenánaca tonjëftſema, pero quem librëſañe ndoñe quenatábemana.

<sup>31</sup> Y quem librëſañe soyëngna, entsábemana tſëngaftanga chaſmotſoſbuáchema, Jesús, chë Cristo y Bëngbe Bëtsabe Uaquiñá bëtsemnama; y chcase, chábeñe chaſmojtſoſbuachese, chábeyeca chë nÿetsca tescama yomna tſabe vida chaſmotſebomnama.

## 21

*Jesús, canÿſëfta chabe uatsjëndayënga tojánëbëbuacna*

<sup>1</sup> Chca tojanopasá chentſana, Jesús inÿe soye chabe uatsjëndayënga tojánëbëbuacna, Tiberias mar béjaye tsachañe. Chora mëntſá tojanopasá:

<sup>2</sup> Cánÿentſe imojëtsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblócá; Zebedeobe uaquiñata y Jesusbe inÿe uta uatsjëndayata.

<sup>3</sup> Simón Pedro chënga tojanëyana: —Sëntſá beonga jashebuáyama ca.

As chënga tmojanjuá: –Bëngnaca ácaftaca fchanjá ca.

As tmojána y canye barquëshoye tmojánamashjna; pero chë ibeta tondaye tmonjáninÿena.

<sup>4</sup> Ya yojtsebínÿana orna, Jesús chë tsachoca yojtsemna, pero chë uatsjëndayënga ndoñe imontsetátšëmbo cha Jesús yojamnama.

<sup>5</sup> Chora Jesús tojanatjá: –Básenga, ¿tondaye šmonjashbuá ca?

Y chënga tmojanjuá: –Tondaye ca.

<sup>6</sup> As Jesús tojanëyana: –Barquëshha catšbioica chë atarraiešha mëtšena y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nÿetšá beonga tmojánishëche causa.

<sup>7</sup> As chë Jesusbe bonshana uatsjendayá, Pédrëbioye tbojaniyana: “¡Bëngbe Utabná entsemna ca!”

Simón Pedro chca soye tojanuena y cachora entšayá tojtaníchëtjo, er nduichëtjoná yojtsemna, y chë béjayoye tojanoshbuetše.

<sup>8</sup> Chë inÿe uatsjëndayënga chë barquëshhañe tmojána, y chë atarraiešha jútjena beóngaca imo- jtsásjaye, er chë tsachocama bécoñe imojtsemna, nÿe canye patse metroca.

<sup>9</sup> Fshantsoye tmojánastjajna ora, chënga tmojáninÿena canye chebániñe pormániñe, y chentšna canye beona y tandëšnaca yojtsesegorana.

<sup>10</sup> Chora Jesús tojanëyana: “Chë šmonjáshebuaye beonguentšana báseftanga miyëbo ca.”

11 Simón Pedro chë barquëshoye tojánamashëngo, y chë atarraiëshha jútjena bëts beóngaca, uasjojónana tsachóntscoñe tojanëyamba. Mo canÿe patse y shachna bnëtsana y unga beóngaca; pero masque nÿetsá beonga, chë atarraiëshha ndoñe ntjuatanëcanana.

12 Chora Jesús tojanëyana: “Mabënga, šmochjase ca.”

Chë uatsjëndayënguentsana ni canÿa yontsenñémua cha jatjayama nda cha yojamnama, er nÿetscanga imojtsetátšëmbo cha chë Utabná bëtsemnama.

13 Chora Jesús tojanobeconá, chë tandëse tojanca y chënga tojanatšatá, y chë beónacnaca cachcá tojanma.

14 Chóracna, Jesús ya unga soyama chabe uatsjëndayënga yojsanebëbuacana, obanënguentsana tojtanayenentsana.

### *Jesús, Simón Pédroftaca tojanoyebuambá*

15 Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaqiñá, ¿quemëngbiamama más quešcbobonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniyana: —Atšbe entšanga, mo oveshatemëngcá imomnënga, cochtsanÿena ca.

16 Chora cachiñe tbojantjá: —Simón, Juanbe uaqiñá, ¿quešcbobonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniyana: —Atšbe entšanga, mo oveshëngcá imomnënga, cochtsanÿena ca.

17 Y unga soyama tbojtětantjá: —Simón, Juanbe uaquiñá, ¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbonjantjá causa; y tbojanjuá: —Atšbe Utabná, aca lempe condětatsëmbo. Aca condětatsëmbo atše aífne cbondbobonshánama ca.

As Jesús tbojaniyana: —Atšbe entsanga, mo oveshëngcá imomnënga, cochtsanÿena.

18 Ndegombre cbëyana: Más bobontse conjamna ora, conjanamana cach aca jtichëtjuana y ndëmoye jama cojtseboše choye jtsoñana; pero tanguá chacojtsemna orna, buacuatšënga cochanjatsbaná, y inÿa cmochantichëtjo y ndëmoye jama ndoñe chacontseboše choye cmochanjuánatse ca —Jesús tbojaniyana.

19 Chca tojánayana, ana jtsotatsëmbuama ntšamo Pedro jóbanama ibojamnama, y chë chca jóbanëse, Bëngbe Bëtsá corente bëtsá y obená bëtsemnama Pedro yochjáninÿanÿiyama. Y chca tojánayanentšana, Pédrëbioye tbojaniyana: —Smasto ca.

### *Jesube bonshana uatsjendayá*

20 Pedro tojesanenostëtšantješé y tojáninÿe, Jesube bonshana uatsjendayá ústonoye yojtsaye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbonjantjá: “Bëngbe Utabná, ¿nda chë boshjuaná yochtsemna ca?”

21 Pedro chábioye tbojáninÿe ora, Jesúsbioye tbojantjá: —Atšbe Utabná, y cháftaca, ¿ntšamo yochjopása ca?

<sup>22</sup> Chora Jesús tbojanjuá: –Atše quem luaroye jesabáměntscuana cha ainá chauesomñama atše stsebošěse, ¿aca ndayá chama cmatjátsěntšamna? Acna nŷe šmasto ca.

<sup>23</sup> Chíyeca, chentšana, Jesucrístbeñe ošbuáchiyěngbenache nŷetscanga imojánichamo, chě uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabáměntscuana cha ainá chauesomñama atše stsebošěse, ¿aca ndayá chama cmatjátsěntšamna? ca”.

<sup>24</sup> Mua endmēna chě uatsjendayá; cha entsichamo quem soyěnga ndegombre yojamnama, y camuá quem librěsañe lempe tonjuábema. Y bēnga mondětatsēmbo cha ndegombre soye endóyebuambnama.

<sup>25</sup> Jesús inŷe ba soyěnga tonjěftsema; tša bětscá soyěnga endmēna, nderado lempe cada canŷe soye tcojuábema y librěsangá tcojuapormá, atše sěntsejuabná, nŷetsca chěsangá quem luarentše ndoñe nanjuába.

**Bëngbe Bëtsa Cabëngaftaca Entsoyebuambna  
New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Camsá

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files  
dated 29 Jan 2022  
19104c0e-9046-5ff3-82fb-eb838c88dcf9